

# Sumbí Ayɔpú Ámu Gyumagyihe

**1** <sup>1</sup>Mí wíé Tiofilo,  
Mí Luka dé ɔwulú ánfɛ wanlín sísí fú. Mí ɔwulú gyankpapu amutɔ á, nɔwanlín Yesu atɔ bwehé pú mu atosunáhé fée; tsú bréá olefi mu agyúmá asi, <sup>2</sup>bɔfun ekeá Bulu lótsu mu ya ɔsúsú. Asa Bulu lótsu mu náti á, ɔlɔtsun \*Ɖɛ Wankíhé túmito bláa ahá ámúbú ɔlele ɔbéé, bubwée mu \*sumbí ayɔpú ámu t́á bubwée. <sup>3</sup>Mu iwɛɔsin wúun pú mu lowu ɔma a, oletsíá lé iwɛ ɔwan ɔkpa ɔtsan-ɔtsansu súná amú, púsúná ání lélé otsie nkpa nke advana ání ɔlelatsíá ɔwulúsu fée; ɔde \*Bulu iwíegyí iwɛ asún blí. <sup>4</sup>Bré kuá mva amúnɔ befia a, ɔleda amú ɔlá ɔbéé, “Mlumánatí Yerusalem. Mltsia unv gyo mí Sí atokiehé ámúbú ɔlehɛ yáí ɔbéé méha mli, nebláa mli mú iwɛ asún ámu. <sup>5</sup>Asú Ɖɔpú Yohane lópu ntsu bó ahá \*asú, táme nke kútúklú ku ɔma a, Bulu ɔbópu Ɖɛ Wankíhé amu bó mli asú.”

## Yesu Ɖsúsú Yɔ

<sup>6</sup>Mú sv bréá mva amúnɔ belafia a, befité mu beɛ, “Ani Wíé, bré ánfɛtɔ féyinkía iwíegyí amu há Israelfɔ ní?”

<sup>7</sup>Yesu lébláa amú ɔbéé, “Imehián ání mlébi nke ntée bréá mí Sí nkule lahié mu onutó túmito. <sup>8</sup>Mboún ní Ɖɛ Wankíhé amu owíé mlɔ á, mlénya túmi tálí gyi mí iwɛ adánsɛ tsú Yerusalem wúlutɔ, Yudea pú Samaria ɔmátɔ fée yɔfun ɔyi ɔka.” <sup>9</sup>Bréá ɔleblí asún ánfɛ tá á, amú ansítɔ unv Bulu lótsu mu ya ɔsúsú, ɔlɔfwɛ wíé nwulótáatɔ.

<sup>10</sup>Besi bude nwulótáa kú alu. Beláki a, ayin abanyɔ akvá ɔɔwa atadiɛ futútú líí amú wá á. <sup>11</sup>Ayin ámu befité amú

bee, “Óo Galileafɔ ayin, ntɔ mludékú nwulótáasu alí? Alí ánfí mlilawun Bulu latsú Yesu ɔya ɔsúsú ánfí á, alí kén obéyinkía mu ba nɛ.”

### Matias Yuda Otsiákpá Tsiá

(Mateo 27:3-10)

12Lnu beyinkí kplí tsú Nfɔ-nyíbu ámusu<sup>a</sup> ba Yerusalem. Ɖkpa ámu íbɔ́bwe máli fun. 13Bowie wúluto á, bɔɔɔ yó abansúruto, ɔtíné ámúú butsie yaí ámu. Sumbí ayɔpúá bɔɔɔ unu gyí: Petro, Yohane, Yakobo mua Andrea, Filipino mua Toma, Bartolomeo mua Mateo, Alfeo mu bi Yakobo, Simon ání ogyi iwɛtsiá adunkápú ɔpasuato ɔha pú oyin ɔkúá butetí mu Yakobo mu bi Yuda. 14Ahá ání betrá du yó unu gyí, atsi aku, Yesu mu yin \*Maria pú Yesu apíó. Ahá ánfí féé létsiá bwé ikule bó mpái.

15Nke ámutɔ á, ahógyipu bɔ́bwe fé lafakule-advanyɔ (120) befia. Lnu Petro lókusú líí amú nsuné bláa amú ɔbée, 16“Mí apíó ahógyipu, Ɖɔɔ Wankíhé asún ámúú ɔleblí tsun Owíe \*Dawidsu, íbu Bulu asun wanlínhé amutɔ, tsú Yuda Iskariot ámúú ɔlekpa ahá beyékutá Yesu iwí ámu ilaba mútɔ. 17Yuda Iskariot anfi létsiá anutɔ. Ania munyɔ lóyɔ osum agyúmá ánfí.”

18Yuda lópu mu lalahe ání ɔɔbwe ikɔ́á beka mu yóho ɔsulúv kv. Ɖlekpa tsú ɔsúsú beda ɔsulúv amusu pɔ, mu ipu lefa po, mu mpúni é lefen dali wurɔɔɔ. 19Ɖhagyíɔha ání ɔbu Yerusalem lónu asún ánfí. Bedunká ɔsulúv amu dá amú ɔblítɔ bee, “Hakeldama.” Mú asi gyí, “Ɖsulúv á obugya lawólí músú.”

20Petro lóyɔ mu asúnú ɔbée, “Tsúfé bɔwanlín wá \*Israelfɔ ilu ɔwulú ámutɔ bee,

‘Mu wóyí idí kpan.

Ɖhaa mátsiá mútɔ.’

Betrá wanlín tswi bee,

<sup>a</sup> 1:12 *Nfɔ-nyíbu* igyi obubwí kuá íbu mantáa Yerusalem, butetí mú Olifbu.

‘Dha bambá otsía mu otsiákpá.’

21-22 “Mú su ilehián ání ɔku ɔbétsa aní Yesu afúlitɔkusu ánfu ɪwɪ adánsɛ gyí. Ilehián ání ɔhá ámu obótsu ayin ámúbú betsiá anɪtɔ bré ámúbú anulóbuo aní Wíe Yesu, náti kí ntíné-ntíné amutɔ. ɔhá ání olobuo aní tsú bréá Asú ɔbɔpú Yohane léblí \*asúbɔ asún alu ɔɔfɔn eke ámúbú Bulu lótsu Yesu ya ɔsúsú sí aní ámu.”

23 ɪnu su bele ahá abanyó, bugyi \*Yosef ání butetí mu Barsaba, butetráa ti mu Yustus mua Matia. 24 Múú ɔɔɔ mpái beɛ, “Aní Wíe, fuyin ɔhagyíɔha klɔntɔ asún. Suna aní ahá ánfutɔ ɔmuá falé, 25 otsia Yuda amúbú alakíná agyómá ánfu, nyá mu ɪsubutí ámu otsiákpá, ɔɔɔ fú osum agyómá ámu.” 26 Múú bekapú atɔ amú abanyó nwunsv. Ileyi Matiasu. Mú su ɔɔpɔ mu wá sumbí ayɔpú dúɔkun ámutɔ, belabwé dúanyɔ.

### ɔɔɛ Wankíhé lbáto

**2** 1 \*Pentekoste Eke, igyi Israelfɔ atɔ pɔpwe ɔnɔ ɔdaké ámu ɔɔfɔn a, ahógyipu amu féé beba befia amú ofiakpa. 2 ɔtsáwule pé á, olú kvá igyi fé afú kpɔnkpɔntɪ ilotsu ɔsúsú ɔɔbulá wóyí ámúbú bubu mútɔ ámu. 3 ɪnu bowun tɔkvá igyi fé ogya plenplen, ɪlehan ɔdandu. ɪledasáin dínká amútɔ okugyíɔkusu. 4 \*ɔɔɛ Wankíhé ɔɔbulá okugyíɔkɔtɔ, ɪleha okugyíɔku léfi asú ɔde ɔblí bambá blí.

5 Bré ámutɔ á, \*Yudafɔá butenyá Bulu ifú, bubu ndítɔ féé baba butsie Yerusalem. 6 Bréá ɔɔɔm anfi bonu okitikíti amu a, besrí befia ɪv. Amútɔ okugyíɔku lónu mu wúlutɔ ɔblí. Mú su ɔnɔ lobwie amú. 7 ɪɔwa amú ifú, wá amú wánwan. Mú su befité beɛ, “Ahá ánfu budetɔí á, megyí Galileafɔ sɔ́n bugyi? 8 Mú nkáli ɪɔbwe asa anidenuá buɔde anɪtɔ okugyíɔku wúlutɔ ɔblí blí? 9 Anɪtɔ aku atsú Partia, Media, Elam, Mesopotamia, Yudea, Kapadokia, Ponto, Asia, 10 Frigia, Pamfilia, Egyipte ɔmátɔ pú Libia awúlu ání ɪbu mantáa Kirene wúlutɔ. Aku é botsú Roma wúlutɔ, 11 búgyi Yudafɔ pú amúá bumegyí Yudafɔ bawíé Yudafɔ Bulusúmtɔ aná féé bubu anɪtɔ. Kretafɔ pú Arabifɔ é bubu anɪtɔ. Táme

anidenuá bude Bulu atɔ kɔɔnkɔntɪ ání alabwé blí antɔ okugyíɔku ɔblítɔ.” <sup>12</sup>Alí ámú asún ámu ilobwie amú ɔnɔ ámu su bɔbwe yɔɔ, sí bude amú aba fité bee, “Ngya amansu é ní?”

<sup>13</sup>Táme amútsɔ aku bɔbwe ahógyipu amu ahinlá bee, “Ntá banu bu.”

### Petro Asúntóle Súná Ahá Ámu

<sup>14</sup>Inu Petro mua mu aba dúɔkun ámu bɔkusu líí. Mú Petro lótsu ɔme fúá bláa ɔɔm amu ɔbé, “Apíó aba Yudafɔ pú mli fééá mlibu Yerusalem, mlihe yaa asu, anle asúntɔ suna mli. <sup>15</sup>Mlumáki mliaa ahá ánti babú, tsúfé ɔyí mɔkúke. Bréá dokwebá ladá ní. <sup>16</sup>Mbóún asún ánti ulaba nde ánti Bulu ɔnɔsú ɔɔɔpú Yoel léblí yáí ní. ɔbé,

<sup>17</sup>‘Bulu ɔbé, “Nke tráhe amutɔ á,

nɔpu mí ɔhé wá anyánpúsa féétɔ.

Mli abi yinhé pú mli abi tsihé béblí asún ánti  
nɔpuwá amú ɔnɔ.

Mli nyasubi bówun atɔ.

Mli ayin dehen bókun nkude.

<sup>18</sup>Nke ámutɔ á, nɔpu mí ɔhé wá mí asúmpú  
atsi múa ayin féétɔ.

Mú su béblí asún ánti nɔpuwá amú ɔnɔ.

<sup>19</sup>Nɔbwe ofúla nwulútáasu,  
bwé osúna ɔsulúsu.

Ogyá, obugya pú ogyási tuun béba ɔyítɔ.

<sup>20</sup>Owí ɔbéta ɔpá.

ɔtsra é ɔbépe kɔɔ fé obugya,

asa aní Wíe numnyam eke kɔɔnkɔntɪ ámu  
lɔbɔn.

<sup>21</sup>lɔbéba ánti ɔhagyíɔha ánti okpólí aní Wíe a, ɔbéha  
mu obénya nkpa.” ’ ’ ”

<sup>22</sup>Petro lóyɔ músú ɔbé, “Mí apíó Israelfɔ, mliyaa asu amlinu asún ánti. Bulu lɔbwe ofúla múa atɔ kɔɔnkɔntɪ pú osúna tsɔtsɔɔtsɔ tsun Yesu Nasaretyin amusu, púsúná ánti mulówa mu. Mli féé mliulówun mú, tsúfé mli ansísú ín

fée leba. <sup>23</sup>Igyi tóá Bulu yin yaí dodo, igyi mu apé ání béle Yesu há mli. Mlúléha ahá ání butamagyi mblasu beda mu mántá \*oyikpalíhesu, mó mu. <sup>24</sup>Táme Bulu léle mu lowu sínsínsíntó, kúsú mu tsú afúlitó. Tsúfé lowu méetalí gyi musu, osin afúlitó. <sup>25</sup>Íni sù Owíe \*Dawid léblí mu iwí asún óbée,

‘Brégyíbré á, ntowun aní Wíe mí ansísú.

Tsúfé óhí mí gyɔpsu, su tɔtɔ mɔ́owa mí ifú.

<sup>26</sup>Mú su ansí tegyi mí,  
ntɔtɔ́í ansigyísú.

Nyankpusa ngyi. Lowu da gyo mí,  
táme nde Bulu ɔkpa kí.

<sup>27</sup>Tsúfé fuméesi mí ɔkláa wá afúlitó.

Fuméeha mí fú osúmpú wankíhé mmɔ́opló.

<sup>28</sup>Fúlósuná mí ɔkpa ání ntsúvun músú, mí anya nkpa  
ání itamatá.

Ní fúvú mí wá á, ansí bégyi mú ekekegyíeke.’ ”

<sup>29</sup>Petro létrá bláa amú óbée, “Mí apíó Israelfó, mbúa hue bla mli amlinu. Aní náin Owíe Dawid lówu, bopolá mu. Bótu nde mu ntsán da aní wá nfi. <sup>30</sup>Bulu ɔ́nsú ɔ́tɔ́pú ogyi, oyin ání ntam ání Bulu léka há mu béba mútó. Bulu léka ntam há mu óbée, méha mu natuna ɔku obétsiá mu obíasú eke kú. <sup>31</sup>Íniá aní náin Owíe Dawid lówun mú yáí su á, ɔ́tɔ́tɔ́í tsú \*Kristo, (ɔhá ámúú Bulu ladá mu ofúli amu) kusú tsú afúlitó iwí óbée,

‘Bulu méesi mu wá afúlitó.

Mú su mu ɔ́vɔ́lúv mɔ́opló.’ ”

<sup>32</sup>Petro lóyɔ músú óbée, “Yesu gyí ɔhá ání Bulu lókusúa tsu afúlitó, aní fée anigyí mú adansífo. <sup>33</sup>Bulu lótsu Yesu ya ɔ́súsú, há mu otsiákpá yilé mu gyɔpsu. Aní Sí Bulu lópv Dɔ́e Wankíhé ání ɔ́lehɛ yáí óbée, mɔ́pvhá mu ahógyipv há mu. Dɔ́e ámv Yesu lapóhá aní á. Mú gyumagyihe mlidéwúun, mlidénu á. <sup>34</sup>Megyí Owíe Dawid Bulu lótsu ya ɔ́súsú, táme mléblí yáí óbée,

‘Aní Wíe Bulu lébláa mí Wíe óbée,

Tsia mí gyɔpsu,

<sup>35</sup>yǒfun bréá nǒpu fú alupú bwé fú ayabi oyíkpa.’ ”

<sup>36</sup>“Mú su mli Israelfǒ fée mlinu. Ibo mútǒá mliléda Yesu mántá oyikpalíhesu. Táme mlihié bi ání Bulu ladá mu ofúli, bwé mu Kristo pú aní Wíe.”

<sup>37</sup>Bréá Israelfǒ ámu bonu asún ánfí á, ilehié han amú. Mú su befíté Petro mua mu aba \*sumbí ayǒpú atráhe amu beé, “Apíó, ntǒ abwée?”

<sup>38</sup>Mú Petro léle mú ǒnǒ ǒbéé, “Mlito okugyǒku ǒdámli klntǒ, abǒ mli \*asú Yesu Kristo dátǒ, méni Bulu obési mli lakpan kíé mli, há mli ǒhe Wankíhé amu. <sup>39</sup>Tsúfé mli mli abí-aná pú ahá ání bǒbu tsútsúútsú ání Bulu ǒbétí fée ǒlehié ǒhe Wankíhé anfi há.”

<sup>40</sup>Petro léblí asún tsǒtsǒtsǒ, pútǒí kplá amú ǒbéé, “Mlile mli iwí tsu ndemba-abí laláhe anfiǒ.” <sup>41</sup>Amútǒ ahá tsǒtsǒtsǒ bǒhǒ Petro asún ámu. Mú su bǒbǒ amú asú. Eke ámu a, ahá bǒbwe fé mpím-sa (3,000) betsiá ahógyipu amutǒ. <sup>42</sup>Ahógyipu amu bele ansí kítá sumbí ayǒpú ámu atosunáhé, amú ikulebwe tógyítǒtǒ, ǒpasua ámutǒ atogyihetǒ yée pú mpáibǒtǒ.

### Ahógyipu Amu Tsiátǒ

<sup>43</sup>Sumbí ayǒpú ámu bǒbwe ofúla pú osúna tsǒtsǒtsǒ, ǒnǒ lobwie ǒhagyǒha. <sup>44</sup>Ahógyipu amu fée bǒbwe tógyítǒ kule. Betsiá ye amú atǒ há aba. <sup>45</sup>Betsiá fé amú atǒ, ye kǒba ání benyatǒ há amútǒ okugyǒkuá ǒma. <sup>46</sup>Amú fée betsiá fía \*Bulu ǒtswékpa wunsínésú ekekegyíeke. Bǒpu amú klntǒ-ǒdwe tsíá gyi atǒ ǒpasuatǒ amú aba wóyítǒ. <sup>47</sup>Betsiá kánfú Bulu, ahá fée bekle amú asún, aní Wíe Bulu létsiá pú ahá ání ǒdele betsiá amútǒ ekekegyíeke.

### Petro Mua Yohane Ibo ǒku Tsa

**3** <sup>1</sup>Eke ǒku ntǒpwe dǒsatǒ mpáibo bré á, Petro mua Yohane bǒyǒ Bulu ǒtswékpa amu wunsínésú. <sup>2</sup>Oyin ǒkuá bǒkwí mu ibǒ tetsiá Bulu ǒtswékpa amu ǒkpa ǒnǒ kuá butetí mú “ǒkpa ǒnǒ Wankláán.” Ahá butotsú mu ba beyaí unu ekekegyíeke, ǒtǒkúlí ahá ání bǒwie ǒtswékpa unu kǒba.

<sup>3</sup>Bréá ɪbo amu lówun ání Petro mua Yohane budebitíwíé Ɔtswékpa inu á, ɔɔkulí amú kóba. <sup>4</sup>Petro mua Yohane besi líí buɔe mu kú díín. Múú Petro lébláa mu ɔbée, “Fú mú kú anɪ wule.” <sup>5</sup>ɪbo amu kɪ ɔbée, béha mu tɔku. Mú su olotsu ansí fúá ɔɔe amú kú. <sup>6</sup>Táme Petro lébláa mu ɔbée, “Mma sika futútú ntée pépe, táme néha fú tśá mbu. Kusɪ lu, afunati Yesu Kristo Nasaretyin amu dátó!” <sup>7</sup>ɪnu Petro lékitá mu gyɔɔɔ bɪ, tsú mu líí, inunu ɔwunlín lowie mu ayabi pú mu ntsakpátó. <sup>8</sup>Olofulí kpáyí ɔtsáwule pé, wá natí bɪ. Mú su ɔlekplá buo Petro aná wíé \*Bulu ɔtswékpa wunsínésú inu; ɔna odefulí kpáyí; ɔɔe Bulu kanfú. <sup>9</sup>Ahá ání bubu inu féé bowun mu ání ɔna ɔɔe Bulu kanfú. <sup>10</sup>Mú su bréá ɪɔwankí amú ání ɪbo amúú otetsíá Ɔkpa Ɔnó Wankláán inu kólí ató ámu nɪ á, ɪɔwa amú wánwan, bwíé amú ɔnó.

### Petro Tóí Bulu Ɔtswékpa Wunsínésú

<sup>11</sup>Oyin ámu pú Petro mua Yohane kínkíínkín \*Bulu ɔtswékpa wunsínésú, ɔtɪnekvá butetí inu Salomo Abrándaású. Mu ɪɔtsa ɪɔwa amú wánwan. Mú su besrí ba amú wá inu. <sup>12</sup>Bréá Petro lówun amú á, ɔlefíté amú ɔbée, “Mí apíó Israelfɔ, ntogyi sú asún ánfɪ lawá mlɪ wánwan alɪ? Ntogyi sú mlɪlaba mlɪdé anɪ kú alɪ? Mlɪkí mlɪaa, anɪ onutó túmɪ ntée anɪ Bulusúm wankláán láhá su oyin ánfɪ lakúsú ɔna? <sup>13</sup>Bulu ámuú anɪ anáin \*Abraham, \*Isak pú \*Yakob bosúm ámu ɪɔwa mu osúmpú Yesu numnyam. Táme mlɪlɔpu mu há mlɪaa bumóɔ mu. Mlɪlékiná ɔhá ánfɪ tɛkɪ Pilato ɪɔbwe agywun ání mési mu ɔnati ánfɪ. <sup>14</sup>Mlɪlékiná Ɔha Wankíhé pú Yilé Ɔbwepú ánfɪá ɔɔwanlín mu ɪwɪ asún wá Bulu asún ɔwulótó anfi, bláa Pilato mlɪaa, osíi ahá ɔmɔpú ámu mboún ha mlɪ. <sup>15</sup>Mlɪléha ɔmɔ nkpa ɔhapú ánfɪ, táme Bulu ɪkúsúa mu tsú afúlitɔ. Anigyí mú ɪwɪ adansɪfɔ ní. <sup>16</sup>Yesu túmɪ láhá ɪbo anfi mlɪyin yaí, mlɪdékú anfi ɪwɪ lawá mu ɔnɪn. Anɪ Yesu hógyi látsá mu, mlɪ féé mlɪdewúun a.

<sup>17</sup>“ɪnɪ su mí apíó, nyin ání mábí léha mlɪa mlɪ ahande mlɪlɔpu ɪnɪ féé gyi Yesu. <sup>18</sup>Táme a, Bulu léblí tsun mu ɔnósú atɔpú amu féésú yaí ɔbée, “\*Kristo, (ɔhá ámuú neda mu

ofúli amu) obówun iwɔsun.’ Mú su ɔleha ɔleba ahi ní. <sup>19</sup>Mú su mlɔdamli klɔntɔ, amlɔyinki ba Bulu wá, ménu obési mli lakpan fée kíe mli, wá mli ɔwunlín pɔpwe, <sup>20</sup>lápú Yesu sísí mli. Mu Bulu léda ofúli yáí há mli ní. <sup>21</sup>Ilehián ání Yesu obétsiá ɔsúsú unu yófun bréá Bulu ɔbéla tógyítɔ bwé, fé ahiá ɔleha mu ɔnósú atɔírú wankíhé amu beblí tswi. <sup>22</sup>Ani náin Mose léblí ɔbéé, ‘Mli Wíe Bulu ɔbéha mu ɔnósú atɔírú ɔkúvá ogyi fé mí ɔbédalí tsú mlɔtɔ há mli. Mlɔgyi mu asun blíhé féesú. <sup>23</sup>ɔhagyícha ání omobu ɔnósú atɔírú anfi á, Bulu ɔbéle mu lé mu ahátɔ, mɔ mu.’

<sup>24</sup>“Tsú Samuelsu á, Bulu ɔnósú atɔírúba beba fée ɔtɔɔí tsú asún anfi ɔdebá nke ánfítɔ wi. <sup>25</sup>Mlɔgyí Bulu ɔnósú atɔírú amu abí-aná. Mlibú itɔ ámúú Bulu léhɔe yáí há aní anáin amu. Tsúfé Bulu lébláa Abraham ɔbéé, ‘Nótsun fú abí-anású yúlá ɔyítɔ ahá fée.’ <sup>26</sup>Íni sù bréá Bulu léle mu osúmpú Yesu a, olegyankpá pú mu sísí mli Israelfɔ, ɔbéé obóyulá mli, amlɔsi lakpan bwe ní.”

### Petro Mva Yohane ɔnóle Yudafɔ Asún Ogyíkpa

**4** <sup>1</sup>Bréá Petro mva Yohane bubu músú budetɔí kplá ahá ámu a, Bulu igyí ahapú mva Bulu ɔtswékpa agyópu ɔhande pú \*Sadukifɔ aku beba ɔtɔtɔ amú. <sup>2</sup>ɔblí lekítá ahande anfi. Tsúfé \*sumbí ayɔpú ámu buɔe ahá ámu atɔ suná beé, Yesu lawú kúsú tsú afúlitɔ. Mú su wukúsú bu unu há ɔhagyícha. <sup>3</sup>Ahande amu bekítá Petro mva Yohane. Owí deta su ɔɔpu amú yówa obu yéha ɔyi kehe. <sup>4</sup>Táme ahá ámúú bonu amú atosunáhé amutɔ ahá tsɔtsɔtsɔ bohogyi, betsiá ahógyipu amutɔ. Mú su ahógyipu amutɔ ayin ɔɔbwe fé mpím-nu (5,000).

<sup>5</sup>ɔyi kehe nyanki a, \*Yudafɔ awíe, amú ahande pú Mose \*mbla asunápú beba befia Yerusalem. <sup>6</sup>Ahá anfi pú ahande ání befia asún ámu asi gyí; Bulu \*igyí ɔhapú dehen Hana, mu wóyítɔ ahande Kaiafa, Yohane, Aleksandro pú wóyí ámutɔ ahá fée. <sup>7</sup>Beha ɔɔpu Petro mva Yohane belí amú ansítɔ, befítɔ amú beé, “Ma túmitɔ ntée ma dátɔ mlílétsa oyin anfi?”



8Inu á, \*Dhe Wankíhé lɔbulá Petrotɔ. Mú su ulɛha mu túmi ɔlebláa Yudafo awíe pú amú ahande amu ɔbé, 9“Nde mú mlidé aní futé tsá svá anlawá awitɔle há ibɔ anfi, tsá mu ibɔ? 10Mómú tsú nde mlia Israelfɔ féé mlibi ání Yesu Kristo, Nasaretyin amu túmi pú mu dátɔ oyin ání ɔlú mli ansítɔ ání lanyá ulɔtsá. Mugyí ɔhá ámúú mliléda mántá \*oyikpalíhesu mó mu asa Bulu lókusúba mu tsú afúlitɔ ámu ni. 11Yesu anfi iwí asún bɔwanlín wá Bulu asún ámutɔ be, ‘Ibwi ámúú mli obu ayípu mlilékiná ámu lábɔbwe okonkísúbwi ní.’

Gyu

12Yesu anfi nkule pé gyí ɔhá ání Bulu lópuhá aní ɔyí ánfítɔ ɔbé, atsubun musu nya nkpa. ɔhaa trá ɔma unvá ɔdun mu.”

13Inúá Yudafo ahande amu buyin ání Petro mva Yohane bumɔkúkásí ɔwulɔ kɪ, táme ifú medé amú su á, ɔnɔ lobwie amú. ulɔwankí amú ání babuo Yesu kɪ. 14Ahande amu bumenya asvansu blí. Tsúfé bowun ání ibɔ amúú alanyá ulɔtsá ámu líí Petro mva Yohane wá. 15Mú su bebláa Petro aná be, budáli asún ogyíkpá unu kpalobí, abukita agywun. Múú ahande amu befité aba be, 16“Nkálí abɔbwe ahá ání? ɔhagyíɔha labí Yerusalem wúlutɔ ání amú labwé osúna kpɔnkpɔnti ání. Animéetalí gyi mú nwéen. 17Táme alíá ibɔbwe asún ání méetrá kleí á, mliha ada amú ɔlá kinkíinkín aníaa bumátra bláa ɔhaa asvansu Yesu dátɔ ε.”

18Inu belatí Petro mva Yohane ba obuto unu, beda amú ɔlá be, bumátra bláa ɔhaa asúngyíasún ntée súná atɔ Yesu dátɔ ekekeke. 19Múú Petro mva Yohane bebláa amú be, “Mli onutɔ mliki. Mɔmu bu alé Bulu ansítɔ, ání abónu mli asún lóó, ntée Bulu klé? 20Tsúfé aní mú animéetalí sí tsá anlawun pú asún ání anlanú blí.” 21Bumetalí bíí amú isu, tsúfé ahá ámu féé buɔe Bulu kanfú ofúla kpɔnkpɔnti ámúú alabwé ámu su. Mú su ahande amu betrá da amú ɔlá kinkíinkín, besi amú benatí. 22Oyin ámu ulɔtsá lówa ifú, tsúfé alahɔ dun ní advana (40) alí bré ámutɔ.

### Ahógyipu Amu Atɔ Kulíhé

23Yudafo ahande amu benya sí amú alí, Petro mva Yohane beyinkí ba amú aba ahógyipu amu wá. Bebláa amú

asún ání Bulu igyí ahapú dehen pú Yudafɔ ahande amu beblí fée. <sup>24</sup>Bréá ahógyipu amu bonu asún ámu a, amú fée bɔpu ɔme kule kúlí Bulu beɛ, “Ani Wíe Bulu Otúmípu, fúlóbwe ɔsú ɔbwe asi, ɔpu múa ntsu pú mótɔ atɔ fée. <sup>25</sup>Fɔtsun Dɔe Wankíhésu há aní náin Dawid, ogyi fú osúmpú léblí ɔbée, ‘Ntogyi sù ɔmá-ɔmá banyá ɔblɔ?

Ntogyi sù ahá fée babwé agywun kuku kpaali?

<sup>26</sup>Ɔsulúsu awíe badídá atɔ.

Wúlu ahande batí aba fia,

kítá agywun laláhe aní Wíe Bulu mua \*Kristo, (ɔhá ámúú ɔleda mu ofúli) amusu.’ ”

<sup>27</sup>Petro lóyɔ mu asúnsú ɔbée, “Lélé á, asún ánfɔ laba mótɔ. Owíe \*Herode mua Pontio Pilatoá bomegyí Yudafɔ pú Israelfɔ babwé kule wúlu anfɔtɔ, kúsú líí Yesusu. Mbugyí fú osúmpú wankíhéá féda mu ofúli ni. <sup>28</sup>Táme bomebɔ ání tɔá fehíhe yaí fee íbéba mótɔ fú apé pú fú túmitɔ dodo babwé á. <sup>29</sup>Aní Wíe Bulu, kí alíá baká anisu, afukpa fú asúmpú, méní abétalí blí fú asún ámu, anuméenya ifú. <sup>30</sup>Tsa ahá ɔlɔ fú túmitɔ, afuha abwe ofúla pú osúna fú osúmpú wankíhé Yesu dátɔ.”

<sup>31</sup>Bréá bɔbɔ mpái ánfɔ tá á, amú offiakpa unu fée ɔlɔkpinkí. Dɔe Wankíhé lɔbulá amótɔ. Mú su bɔwa klun dá Bulu asún ámu ɔkan.

### Ahógyipu Amu Atótɔ Yée

<sup>32</sup>Ahógyipu amu fée bɔpu klun kule múa agywun kule tsíá. Ɔkuku méblí ɔbée tɔá mubɔ igyi mu nkule klé. Mboún okugyíɔkuku atɔ ɔbwe amú fée klé. <sup>33</sup>Sumbí ayɔpú ámu bɔpu túmi kpɔnkpɔɔnkpɔntɔ gyi aní Wíe Yesu iwɔ adánsɛ beɛ, Bulu lakúsúa mu tsú afúlitɔ. Bulu léhɛ wá awítɔle há ahógyipu amu fée. <sup>34</sup>Amótɔ ɔkuku mégyi ohian, tsúfé amúá bubɔ ɔsulúv pú wóyí betsiá fé mú, pú mú ɔnɔ kɔba ba <sup>35</sup>sumbí ayɔpú ámu, betsiá ye mú há ɔhagyíɔha alíá ilehián mu.

<sup>36-37</sup>Mú su alí kén Lewiyin ɔkúá butetí mu \*Yosef léfe ɔsulúv, ɔlɔpu kɔba amu ba sumbí ayɔpú ámu ni. Yosef anfi

otsú Kipro omátó, sumbí ayópú beha mu idá Barnaba, (mó así gyí, “Ahá atetɔ-ɔnlɔ ɔwapú.”)

### Anania Mva Safira

**5** <sup>1</sup> Inu oyin ɔkuá butetí mu Anania mva mu ka Safira é befe amú siadie ku. <sup>2</sup> Táme Anania léle kóba amu ku ñáín, mu ka é yin mó iwɛ. Ɔɔpu kóba amu tráhe ba \*sumbí ayópú ámu. <sup>3</sup> Mú Petro léfuté mu ɔbéé, “Anania, ntogyi sù fahá Ɔbunsám lagyi fusu, fapú kóba amú fenyá ámu ku ñáín, bówa afunu suná Ɔɛ Wankíhé? <sup>4</sup> Fúbú fú ɔsulú asa fefe mú. Íniá fefe mú é á, fúbú fú kóba. Ntɔ láhan fu sù fabwé útá igyi alí? Bulu fawá afunu súná o, megyí anyánkpúsa.” <sup>5</sup> Anania lénya nú asón ánfɛ alí á, ɔletɔ da wú. Mú su ifú lehɛ kítá ahá ání bonu asón ánfɛ féé. <sup>6</sup> Inu nyasubi aku bókusú tsú tati kíklɛ mu iwɛ, tsú mu yópulá.

<sup>7</sup> Ilegyi fé dɔnhwírɛ asa ɔma asa mu ka Safira é lóbowie unu. Alí bré ámutɔ á, omeyín tóá ɔlaba mu kulusu. <sup>8</sup> Petro léfuté mu ɔbéé, “Safira, bla mɛ. Kóba anfi gyí tóá fúá fú kulu mlúnya bréá mlúfé ɔsulú amu nɛ?”

Safira léle mú ɔnɔ ɔbéé, “Ee, alí anlúnya ní.”

<sup>9</sup> Mú su Petro léfuté mu ɔbéé, “Ntogyi su fúá fú kulu mlúlabwé ɔɔ-ɔkule mlúaa mlóɔ Aní Wíe Ɔɛ kí? Kɛ, nyasubi ání bayópulá fú kulu yínkí lawíé obu-ɔnɔ unu á. Bósvrá fú é ya.” <sup>10</sup> Inu ɔtsɛ ámu é létɔ da Petro ayabitɔ unu wú. Bréá nyasubi ámu bobowie unu á, bowun ání Safira é lawú, su botsu mu yópulá mu mantáa mu kulu. <sup>11</sup> Ifú lehɛ wíe ɔpasua ámu pú ahá ání bonu asón ánfɛ féétó.

### Sumbí Ayópú Ámu Ofúla Pú Osúna Bwe

<sup>12</sup> Bulu lótsun sumbí ayópú ámusu bwé ofúla pú osúna tsɔtsɔtsɔ wúlu amutɔ. Ahógyipu amu féé ɔɔbwe kule tsíá fia ɔtnekúá butetí unu Salomo Abrándaású. <sup>13</sup> Ahá ání bomegyí ahógyipu kóráá betɛ ahógyipu amu ɔdayilé. Táme ɔkuku móbwe agywun ɔbéé, mébetsíá ahógyipu amutɔ. <sup>14</sup> Igyi alí óó á, atɛ múá ayin tsɔtsɔtsɔ bɔhɔ aní Wíe Yesu gyi. Bulu létsiá pú amú tsíá ahógyipu amutɔ. <sup>15</sup> Sumbí ayópú

ámu ofúlábwe su wúlu amuto ahá betsiá tsú amú alɔpu ba brɔnusu, beyaí nklan tswi pú amú tswi mósú. Fówun ní Petro ɔbá bɔtsun unu á, mu yiyí bówulí amósú. <sup>16</sup>Ɔɔm ání bɔtsú awúluá ibu bomlí Yerusalemtɔ é bɔpu amú alɔpu pú ahá ání \*ɔɛ laláhe dé amú háan ba, sumbí ayɔpú ámu betsa amú ilo.

### Sumbí Ayɔpú Ámu Lu

<sup>17</sup>Sumbí ayɔpú ámu iwi lówa Bulu \*igyí ɔhapú dehen amu mua mu aba ání bubu Saduki ɔpasuato olu. <sup>18</sup>Íni su bekíta sumbí ayɔpú ámu wá obu. <sup>19</sup>Táme onyé, \*Bulu-ɔɔpu ɔku léba befinkí obu ámu, kpá sumbí ayɔpú ámu dáli. <sup>20</sup>Bulu-ɔɔpu amu lébláa amú ɔbé, “Mliyo amliyelí Bulu ɔswékpa wunsínésú unu, amlibla ahá nkpa ɔɔwe amu iwi asún féé.” <sup>21</sup>Sumbí ayɔpú ámu begyi Bulu-ɔɔpu amu asúnsú. Mú su benatí yɔ wunsínésú unu bake, bude ahá atɔ suná.

Ɔma-ɔma a, Bulu igyí ɔhapú dehen amu létɔ Yudafo asún agyípú amu féé fia. Mú ɔɔwa abí beɛ buyéle sumbí ayɔpú ámu ba. <sup>22</sup>Táme bɔyo á, sumbí ayɔpú ámu buma unu. Íni su beyinkí bebláa ahande amu beɛ, <sup>23</sup>“Anilóyo unu á, anilówun ání aklun amu fin wankláán. Obu adipúsú akípu amu bulí bude aklun amu ɔnɔ gyo. Táme bréá aniléfinkí aklun amu a, animówun ɔhaa obu ámutɔ.” <sup>24</sup>Bulu ɔswékpa agyópu ɔhande mua Bulu igyí ahapú dehen amu bonu asún ántɔ a, bɔbwe yɔɔ, sí bude asún ání ibéba mú ɔma gywúín. <sup>25</sup>Unu ɔha ɔku lébebláa amú ɔbé, “Mlíki, ahá ámúú mlilówa obu ámu bulí Bulu ɔswékpa wunsínésú unu, bude ahá atɔ suná.” <sup>26</sup>Mú su Bulu ɔswékpa agyópu ɔhande amu mua mu aba bɔyo yékpa sumbí ayɔpú ámu ba. Bekpa amú díín pú amú ba, tsúfé benya ifú ání ní bɔpu ibi da amú á, ahá béda amú abwi.

<sup>27</sup>Bɔpu amú ba belí Yudafo asún agyípú amu ansítɔ. Mú Bulu igyí ɔhapú dehen amu léfuté amú ɔbé, <sup>28</sup>“Animéda mli ɔlá aniaa, mlumátrá ti oyin ántɔ dá súná atɔ? Táme mlíki tɔá mlilabwé. Mlilahá mli atosunáhé labólá Yusalem wúluto féé. Mludékléá mlópu mu lowu súra aní.”

<sup>29</sup>Petro mva sumbí ayɔpú atráhe amv beɛ mú ɔnɔ beɛ, “Bulu asúnɔ lehián ání abégyi, megyí anyánkɔpúsa. <sup>30</sup>Mlúléda Yesu mántá oyikpalíhesu mó mv. Táme aní anáin Bulu lókúsbá mv tsú afúlitɔ. <sup>31</sup>Olotsu mv ya ɔsúsú, pú mv yéyaí mv gyɔpɔsu, bwé mv ahá ɔkparú pú Nkpa ɔhɔp. Fówun ɔkpa ɔdɔ ha Israelfɔ abudamli kluntɔ, Bulu osi amú lakpan kie amú. <sup>32</sup>Anɔgyí alí asún ánfi ɔwɔ adanstɔ ní. ɔɔe Wankíhé amú Bulu lópokíé ahá ání butegyí mv asúnɔ amv é dé mú ɔwɔ adánsɛ gyí.”

<sup>33</sup>Bréá Yudaɔ ahande amv bonu asún ánfi á, ɔlɔwa amú ɔblɔ. Mú sv ɔɔbwe agywun beɛ, bómɔ sumbí ayɔpú ámv. <sup>34</sup>Táme Yudaɔ ahande amɔɔ ɔkúá ogyi Farisiyin, mv dá gyí Gamaliel, ogyi Mose mbla osunápú ání ahá féé butobú mv lókúsú líí, blí ɔbéé bukpa sumbí ayɔpú ámv dalɔ kpalobí. <sup>35</sup>ɔnu ɔlebláa Yudaɔ ahande amv ɔbéé, “Israelfɔ ayin, mlíkɔ wankláán ɔtɔ ánfi mlíaa mlɔpugyi ahá ánfi ɔwɔ. <sup>36</sup>Mlíkaun ání bré kutɔ á, oyin ɔkúá butetí mv Teuda létsiá. ɔɔbwe mv ɔwɔ fé ɔha kɔnkɔntɔ ɔkɔ. Mú sv ahá ɔɔbwe fé lafana (400) sɔ́n bobuo mv. Táme ɔmɔ mv, mv abúopv féé bedasáín, mv bwehé é féé lowie ntsu. <sup>37</sup>Mv ɔma a, Yuda ání ogyi Galileayin é léba aháklábi. Mv é ɔlekpa ɔɔm buo ɔwɔ. Táme ɔmɔ mv, mv abúopv amv féé bedasáín. <sup>38</sup>Mú sv nde mlí bláa mbéé, mlísi ahá ánfi. Mlímápv ɔbi da amú. Tsúfé ní itsú anyánkɔpúsa wá á, mú féé ɔbéba ɔɔtsun. <sup>39</sup>Táme ní itsú Bulu wá á, mlíméetalí ká amú itin. Mú sv mlímábwe amú ɔtɔ, ménu ɔmɔɔbwe fé mlí Bulunɔ mlúdékɔ.”

Yudaɔ ahande amv botsulá dínká Gamaliel asún ánfi sv. <sup>40</sup>ɔnu beha betɔ sumbí ayɔpú ámv ba obuto ɔnu. Beha ɔɔnwen amú atɔ, beda amú ɔlá beɛ, bumátra tɔ Yesu dá súná atɔ ekekeke, besi amú benatí. <sup>41</sup>Bréá sumbí ayɔpú ámv bedalɔ Yudaɔ asún ogyíkpa ɔnu ɔɔyɔ á, ansí de amú gyí. Tsúfé Bulu lahá amú é bawun ɔwɔsvn Yesu sv. <sup>42</sup>Sumbí ayɔpú ámv betsiá súná atɔ ekekegyíkeke, dá Bulu \*asun wankláán ámv ɔkan Bulu ɔtswékpa ɔnu pú wóyígyíwóyítɔ beɛ, Yesu gyí Kristo, (ɔhá amú Bulu ladá mv ofúli amv).



wɔ Bulu ɔtswékpa wankíhé pú Mose mbla ámu ekekegyíeke. <sup>14</sup>Anulónu ání ɔdeblí ɔbéé, ‘Yesu Nasaretyin amu obóbwie Bulu ɔtswékpa amu, tse amándíé ání Mose lósuná aní fée.’” <sup>15</sup>Yudafɔ Asún Agyípú amu fée besi buɔde Stefano kú díín. lnu beki a, mu ansító de ogyá kpa fé Bulu-ɔɔɔɔ ansító.

### Stefano lwi ɔnóle

**7** <sup>1</sup>Bulu \*igyí ɔhapú dehen amu léfité Stefano ɔbéé, “Asún ánfɔ bablí tsú fú iwɔ ánfɔ fée bu mútɔ?”

<sup>2</sup>Stefano léle mú ɔnɔ ɔbéé, “Mí apíó pú mí así, mliyaa asu amlnu! Bulu Onumnyampu amu léle iwɔ ɔwan súná aní náin \*Abraham bréá otsie Mesopotamia ɔmátɔ, Kaldeafɔɔ asa olotu yétsiá Haran wúluto. <sup>3-4</sup>lnu Bulu lébláa mu ɔbéé, ‘Tu dali fú ɔmátɔ si fú abusan, afuyɔ ɔsulóv kuá nósuná fúsú.’ Mú su Abraham lótu tsú Kaldeafɔ ɔsulósv yétsiá Haran wúluto. Mu si lowu ɔma a, Bulu léha mu olotu ba ɔtíné ánfɔ mltsie nde ánfɔ. <sup>5</sup>Bré ámutɔ á, Bulu mɔkúnyá há Abraham ɔsulóv anfi yabi oyíkpa kule kúráá. Táme Bulu léhie mu asɔ yaí ɔbéé, muv mu abí-aná obégyi ɔsulóv anfi ekekú. Alɔ bré ámutɔ á, Abraham mɔkúkwíí obí. <sup>6</sup>Asún ání Bulu lébláa mu gyí, ‘Fú abí-aná bóbwe afɔɔ ɔsulóv kusu. Bóɔv amú bwé nkpábi, wá amú amumuyɔ nfí lafana (400). <sup>7</sup>Táme négyi ɔmá ámúv fú abí-aná béyetsiá amú asɔ ámu asún, bítí amú isv. Mú ɔma a, néle amú lé amú ibitɔ, fówun béba bosúm mí nfi.’ <sup>8</sup>Bulu léka ntam há \*Abraham. Ntam amu ɔnɔ á, Abraham ɔbétun mu abí-aná \*keté. Mú su mu bi \*Isak lóhɔ nkekwe á, Abraham létun mu keté. Isak é létun mu bi \*Yakob keté. Yakob é létun mu abí, bugyi aní anáin dúanyɔ ámu keté amú nyebitɔ.

<sup>9</sup>“Aní anáin anfi befe amú gyama \*Yosef, mu iwɔ olu sv. Mú su ɔɔyɔ yébwe ɔkpábi Egyipte ɔmátɔ. Táme Bulu lélu mu ɔma, <sup>10</sup>lé mu lé mu asun wunhe féeɔ. Bulu léha mu nyánsa, há Egyipte owie lénya mu iwɔ ansigyí. Mú su ɔɔbwe Yosef mu ɔmá pú mu wóyí féeɔsv ɔkípu. <sup>11</sup>Akún ku lébá Egyipte pú \*Kanaan ɔsulósv fée. lɔɔpu ɔkplán ba ɔmá ámutɔ. Aní anáin amu bumenyá atɔ gyi. <sup>12</sup>Mú su bréá Yakob lónu

Gyu

ání atogyihe bu Egipte a, ɔɔwa aní anáin anfi sísí. Bɔyɔ unu eke gyankpapu yénya atogyihe ba. <sup>13</sup>Beyinkí yɔ otse nyɔɔsi a, Yosef léle iwɔ ɔwan súná amú ɔbéé, mugyí amú gyama Yosef ni. Íni su Egipte owíe é lébi Yosef abusuan. <sup>14</sup>Mú ɔma a, Yosef lówa mu apíó sísí ɔbéé, buyékpa mu si Yakob pú mu abusuanfɔ, bɔbwe fé ahá aduesienɔ́-nu (75) ba, abubetsiá Egipte ɔmátɔ. <sup>15</sup>Ínu Yakob lóyɔ Egipte. Ínú mua aní anáin amu bowu ní. <sup>16</sup>Nfí tsɔtsɔɔtsɔ ɔma a, bɔpu amúɔ́ aku afúli ya Sekem. Wúlu anfitɔ Abraham légyankpá tsíá ní. Bopolá amú ulán kuá Abraham lópu kóba hɔ tsu oyin ɔkuá butetí mu Hamor abí wátɔ.

<sup>17</sup>“Nke ámú Bulu léhie Abraham amu lotsutsúa ibɔfun a, aní anáin amu bakléí wá Egipte ɔmátɔ. <sup>18</sup>ɔma a, Egipte owíe ɔkuá ɔmebi Yosef lébetsiá obíá ámusu. <sup>19</sup>Owíe anfi lówa owuntɔlin aní anáin amusu. ɔleka amú híe ɔbéé, butswí amú abi ɔɔbwe tsalífwi abuwu. <sup>20</sup>Alí bré ámutɔ bɔkwí Mose ni. Ogyi obí ání ɔhíe ɔbu akíle, Bulu ansí legyi mu iwɔ. Mu yin léyai mu tsra asa mu si wóyítɔ. <sup>21</sup>Bréá bele mu mu wóyítɔ a, Farao mu bi tsíhé lótsu mu, pú mu bwé mu bi alí, ɔledan. <sup>22</sup>Egiptefɔ bosuná Mose amú amándíe kugyíku. ɔɔbwe ɔha kpɔnkpɔnti mu utí pú mu bwehétɔ.

<sup>23</sup>“Bréá Mose lóhɔ nfí adwana (40) á, ɔɔbwe agywun ɔbéé, móyɔ yéku alá Egiptefɔ bɔpu buɔe mu apíó Israelfɔ kpa. <sup>24</sup>Ínu á, olowun ání Egipteyin dé mu apíó Israelfɔ ámutɔ ɔku da. Mú su ɔɔyɔ ɔyɔhɔ mu pio ámú ɔde mu dún amu, ilemlí mua Egipteyin amu nyɔ. Ínu ɔleda Egipteyin ámu mɔ. <sup>25</sup>Mose mú kɔ ɔbéé, íbɔwankí mu apíó Israelfɔ ání Bulu dépu mu hɔ amú nkpa, táme ímɔwankí amú. <sup>26</sup>Mú ɔyi kehe a, olowun Israelfɔ abanyɔ buɔe. ɔɔyɔ ɔyékpátá amú, ɔlebláa amú ɔbéé, ‘Mlíki, apíó mlígyí. Ntogyi sù mlí wulewule mlíde aba amumuyɔ wa?’ <sup>27</sup>Táme ɔmuamú ɔde mu ba da ámu lówutá Mose sísí, fíté mu ɔbéé, ‘Ma lówa fú ɔbéé fubégyi anisu, afugyi aní nsuné asún? <sup>28</sup>Fudekléá fómó mí, fé alí ámú ígye fómɔ Egipteyin amu lóó?’ <sup>29</sup>Mose lénya nú asún anfi alí, ɔlesrí dalí Egipte ɔmátɔ yɔ Midiafɔ ɔsulósu. Oletsíá unu kwí abi anyɔ.



30“Nfí advana ɔma a, Bulu-ɔɔɔpu léle iwɪ ɔwan súná Mose dimbísú oyíbi kuá ibu awu, ogyá detsíí mótótó, mantáa Sinaibu. 31 Mose lówun mú á, ulɔwa mu ifú. Bréá ɔɔɔkpukpé ɔyó yéku mú wankláán á, Bulu lébláa mu ɔbéé, 32‘Mígyí fú anáin Abraham, Isak pú Yakob Bulu.’ Mose lénya ifú, ɔdekpunkí kpakpakpakpa. Mú su ɔmetalí ki mú. 33 Aní Wíe Bulu lébláa mu ɔbéé, ‘Wɔi fú ntukuta tswi, tsúfé ɔtíné ánfɪ fulú ánfɪ igyi ɔtine wankíhé. 34 Nawun ání mí ahá bude iwɔɔsin wúun Egyipte ɔsulúsu. Nanú amú isú. Mú su nakplí nebá ɔɔɔ amú. Ba, anwa fú Egyipte.’

35“Mose anfí Israelfɔ bekiná Egyipte ɔmátó, fíté mu bæ, ‘Ma lówa fú ɔbéé fubégyi anɔsu, afɔgyi anɪ nsuné asún?’ ní. Mose anfi kén Bulu léha ɔbéé, ɔbwéé anɪ anáin amúsú ogyípú pú amú ɔlepú ní. Bulu lówa mu sumbí ánfɪ tsɔn Bulu-ɔɔɔpu amú ɔlele iwɪ súná mu ogya plenplentɔ ámusu. 36 Mu kén gyí ɔhá ání ɔlekpa amú dali Egyipte, bwé ofúla pú osúna tsɔtsɔɔtsɔ Egyipte ɔsulúsu, ɔpu Pepe amu ɔnɔ pú dimbí ámusu nfí advana (40) kéké ní. 37 Mu kén lébláa Israelfɔ ámu ɔbéé, ‘Bulu ɔbéle mu ɔnɔsú ɔtɔípú ɔkuá ogyi fé mí tsú mlɔtɔ há mli’ ní. 38 Bréá mua Israelfɔ ámu befia dimbí ámusu á, Mose anfɔsu Bulu-ɔɔɔpu amu lótɔi tsɔn Sinaibu ámusu há anɪ anáin amu ni. Mu kénsú Bulu lópu mu nkpa asún ámu tsɔn, ide anɪ é tu ní.

39“Táme anɪ anáin bumobu mu. Bekiná mu asún nu. Amú nkɔle su mú á, tekɪ butráa bubu Egyipte ɔmátó. 40 Ínɪ su bebláa \*Aaron bæ, ɔyáɪ ikpi ání békpa amú ha amú. Tsúfé bumeyín tɔá ulabwé Mose amú ɔlekpa amú tsú Egyipte amu. 41 Alɪ bré ámutɔ á, beblí sika pepe ɔnantswiebí púbwé ɔkpi, tsíá há mú igyí. Amú ansí legyi amú ibu ɔnɔ itɔ bwehé ánfɪ iwɪ. 42 Bulu lési amú asún, ɔɔɔɔ bude owí múa ɔtsra pú ntsrakpabi tswéé. Fé alá ɔɔwanlín wá Bulu ɔnɔsú atɔípú amu ɔwulótó bæ,

‘Israelfɔ! Megyí mí mlulómɔ mbwɪ bɔ afɔɔɔ há  
nfí advana (40) amú mlulétsiá dimbí ámusu.

43 Mboún ɔkpi Molok tati-obu  
pú Refan ntsrakpabi ɔkpi

mlilóbwe súra, náti tswε.

Íni su négya mli yówa \*Babilonfɔ ɔsulúv ɔma  
ɔtineku.’

44“\*Tati-obu ámúb itosúná amú ání Bulu bu amú wá ámu  
é letsiá anɪ anáin amu wá dimbí ámusu. Mose lóbwe mú  
aliá Bulu lósuná mu ɔbéε, ɔbwéε mú pépéépé. 45Anɪ anáin  
amu bowu sí Bulu \*tati-obu ámu há anɪ así, \*Yosua légya  
amú nkpá bɔpuba ɔsulúv anɪsu. Amú onutó ansító Bulu  
légya ɔmá-ɔmá lé ɔsulúv anɪsu púhá amú. Bulu tati-obu  
ámu letsiá amú wá alu ɔɔtu Owíε \*Dawid brésú. 46Bulu  
ansí legyi Owíε Dawid iwɪ. Mú su Dawid lókulí mu ɔbéε,  
muyíi obu ha mu, méni anɪ Yakob abí-aná féé abósum mu  
uw. 47Táme Owíε \*Salomo mboún lébeyi obu ámu.

48“Táme Ɔsúsúv Bulu tamatsiá nyankpusa obu yihεɔ.  
Fé aliá Bulu ɔnósú ɔɔɔpú ɔku léblí ɔbéε,

49‘Anɪ Wíε Bulu ɔbéε, “Ɔsúsú gyí mí owíε obíá,  
ɔsulúv é igyi mí ayabi oyíkpa.

Ntɔ obu mhaa mléyi ha mí?

Nkúnu gyí mí ɔkpúnú ɔdakpá?

50 Megyi mí lóbwe ntobí áni féé?” ’ ”

51Stefano lómɔ mu asún ɔnó ɔbéε, “Asutɔ-ɔnlɪn awíε,  
klɔntɔ bu mli odwin. Mlilakíná Bulu asún ámu nu. Mli é  
mlitɔkúsú líi Ɔɣε Wankíhé amu asúnú brégyíbré, fé aliá  
mli anáin amu betsiá bwé. 52Bulu ɔnósú ɔɔɔpú ɔmɔmsú  
mli anáin bumedɪnká? Bɔmɔ Bulu ɔnósú atɔɔpú amúb beblí  
yái beε, Yilé Ɔbwεpú ámu ɔbéba amu é. Mliélé Yilé Ɔbwεpú  
ámu há, bɔmɔ mu. 53Mlilóhɔ Mose mbla ámu tsú Bulu-  
abɔpu ámu wá ní, táme mlímégyi músú.”

### Stefano Abwi Da Mó

54Bréá Yudafɔ ahandε amu bonu Stefano asun blíhé anɪ á,  
ɔbló lehε kítá amú, beda ansító kpun. 55Táme Ɔɣε Wankíhé  
lóbulá Stefanotɔ, olotsu ansí fúá, ɔde ɔsúsú kí. Olowun Bulu  
numnyam, Yesu líi Bulu gyɔpɪsu. 56Múb ɔlebláa amú ɔbéε,  
“Mliki, nawun áni ɔsúsú lafínkí, Nyankpusa-Mu-Bi ámu líi  
Bulu gyɔpɪsu.”

<sup>57</sup>Bréá bonu íni á, bɔpu ibi tin asu. Inu amú fée bɔsura okitikíti tú bun musu, <sup>58</sup>bebutía mu dali wúlu amuto beyéda mu abwi mʼ. Adansɔfɔ ámu bɔwɔí amú awunso atadie tswi ɔyasubi ɔkuá butetí mu Saulo wá. <sup>59</sup>Bude mu abwi da alu, olokpólí aní Wíe ɔbéé, “Mí Wíe Yesu, hɔ mí ɔhé.” <sup>60</sup>Inu á, ɔleda akpawunu, kplón kuklókúú ɔbéé, “Mí Wíe, si lakpan ánfí kie amú.” Olenya blí alí pé, olomu ɔnó.

**8** <sup>1</sup>Saulo é lótsulá dínká Stefano mɔsu.

### Saulo ɔpasua Ámusu Dínká

Tsú eke ámusu á, bedínká ɔpasua ámúú ibi Yerusalem amusu, wá amú mɔ bi. Mú su ɔpasua ámu fée bedasáin wá Yudea pú Samaria ɔmátʼ, sí \*sumbí ayɔpú ámu nkule pé wá inu. <sup>2</sup>Táme Bulu asúmpú aku bosu Stefano, bun mu.

<sup>3</sup>Saulo mú léfi ɔpasua ámu bwie así. Oletsiá kí ahá wóyítʼ, bítía ahógyipu atsi múa ayin fée yówa obu.

### Filipo Bulu Asún ɔkanda Samaria Wúluto

<sup>4</sup>Ahógyipu amu beda Bulu \*asun wankláán ámu ɔkan ɔtínegyíótíné ání bedasáin yó. <sup>5</sup>Mú su Filipo lóyɔ \*Samaria wúlu yilé kutɔ yébláa amú Kristo, (ɔhá ámúú Bulu ladá mu ofúli amu) iwí asun wankláán ámu. <sup>6</sup>Afiapu amu fée bonu mu asun blíhé, bowun osúna ání ɔɔbwé é. Mú su bɔhɔ mu asún ámu. <sup>7</sup>\*ɔhe laláhe lósurá okitikíti dálí ahá tsɔtsɔtsɔ. Ahá ání amú ífún lawú pú tsukule asínpu tsɔtsɔtsɔ é benya ulotsá. <sup>8</sup>Mú su ansí lehie gyi Samariafɔ ámu.

<sup>9</sup>Alí bré amuto á, ɔfápú kɔnɔkɔnti ɔkuá butetí mu Simon bu wúlu amuto. Bréá Filipo mʼkúba inu á, ɔɔbwé túmila súná mu pi amu, itɔwá amú ifú. ɔɔpú ibi sí kántʼ blí ɔbéé, otúmípu kɔnɔkɔnti mugyi. <sup>10</sup>Nyebí ahande fée butobú mu, blí bɛɛ, “Oyin ánfí dé Bulu túmi kɔnɔkɔnti ámu.” <sup>11</sup>Íniá ɔdepu mu asuma bwé ofúla suná amú, ulawá ɔpá su á, amú fée bɔhɔ mu gyi. <sup>12</sup>Táme bréá Filipo léba beda \*Bulu iwíegyí pú Yesu Kristo iwí asun wankláán ámu ɔkan a, atsi múa ayin bɔhɔ mu asún ámusu gyi, ɔɔbɔ amú \*asú. <sup>13</sup>Simon onutó é lóhgyi, ɔleha Filipo lóɔ mu asú. Mu asúɔ ɔma a,

ɔɔɔɔ ɔwɔ mantáa Filipino. Bréá olowun alá Filipino dé ofúla múa osúna bwe á, ɔnɔ lobwie mu.

14 Sumbí ayɔɔɔpú ámúú bubu Yerusalem amu bonu ání Samariafɔ baho Bulu asún ámu. Mú su bɔwa Petro mua Yohane amú wá. 15 Bréá boyówie ɔnu á, bɔbɔ mpái há Samariafɔ ahógyipu amu bæe, bunyáa ɔɔɔe Wankíhé. 16 Tsúfé asú keke babɔ amú anɔ Wíe Yesu dátɔ, táme amúú ɔkuku mókúnyá ɔɔɔe Wankíhé amu. 17 ɔnu Petro mua Yohane bɔpu ɔbi dínká amú nwunsv, Bulu léha amú ɔɔɔe Wankíhé amu.

18 Simon lówun ání ɔbi keke sumbí ayɔɔɔpú amu bapú dínká ahógyipu amu nwunsv, Bulu lahá amú ɔɔɔe Wankíhé. Mú su ɔlele kɔba há Petro mua Yohane, 19 ɔlebláa amú ɔbée, “Mliha mí túmi ánífɔ ku, méni ní mí é nɔpú ɔbi dínká ɔku nwunsv á, Bulu ɔbéha mu ɔɔɔe Wankíhé.”

20 Táme Petro lébláa mu ɔbée, “Fúá fú kɔba ámu nɔɔ féé mlihu. Tsúfé fuku fæe, fétalí pú kɔba ho Bulu itokiehé ánífɔ. 21 Fuma ogyíkpa ntée ɔlúkpa anɔ gyumagihe anífɔ, tsúfé fú kluntɔ metɔn Bulu ansítɔ. 22 Damli kluntɔ tsu fú lakpan ánífɔ, afukuli anɔ Wíe Bulu. Fíalɔ obési agywun laláhe anífɔ fabwé ánífɔ kíe fú. 23 Tsúfé nawun ání fuhíe fúbu ɔnsɔɔe, lakpan lagyi fusu.”

24 Simon lébláa Petro mua Yohane ɔbée, “Nobwíí ɔpa, mlukokoli ml Wíe Bulu ha mu, méni ɔméeha asún ánífɔ fablí ánífɔ kuku méeba musu.”

25 Bréá Petro mua Yohane begyi adánsɔe, dá Yesu ɔwɔ asún ámu ɔkan tá á, beyinkí yɔ Yerusalem. Bréá buna bɔyɔ á, beda asun wankláán ámu ɔkan Samaria nkuda tsɔtsɔtsɔ asi.

### **Etiopia Owíe Sikasu ɔkípu Kluntɔdamlí**

26 Alɔ bré ámutɔ á, Bulu-ɔbɔɔpú lébláa Filipino ɔbée, “Kusu pu ɔsaasí \*dimbísú ɔkpa ámúú ɔda tsu Yerusalem ɔyɔ Gasa amu.” 27 Múú Filipino lókusú pú ɔkpa. Bréá ɔyɔ á, ɔɔɔɔ Etiopia ɔmá ɔhande ɔkúá baflo mu. ɔhande amu gyí Etiopia owíe tsíhé Kandake sikasu ɔkípu. Oyin ánífɔ layɔ Yerusalem yósum Bulu, 28 yínkí ɔyɔ wóyí, otsie mu kekétɔ, mpɔnkɔ bude mu butí. ɔde Bulu ɔnɔsú ɔɔɔpú \*Yesaia ɔwulú ámu kláa.

29Múú Ɔɲe Wankíhé lébláa Filipino ɔbée, “Kpukpe manta keké ánfí.” 30Filipo lésrí tú keké ámu wun ání Bulu ɔnósú ɔtɔ́pú \*Yesaia ɔwulú ámu oyin ámu dé kláa. Mú su ɔlefíté mu ɔbée, “Ɖhande, fude asún ámuú fudekláa amu así nu?”

31Ɖhande amu léle mú ɔnó ɔbée, “Nkálí ɔbɔwe nónu mú así ní ɔku méle mú así súná mí?” Mú su ɔlebláa Filipino ɔbée, “Du tsia mí wá ayɔ.” 32Bulu asún ání ɔdekláa ɔwulú ámutɔ gyí:

“Ɖɔɔbwe díín fé kufa ání bapú beya ɔmɔkpá.

Ɖmobwií mu nnonyo.

Ɖɔɔbwe díín fé alá kufa ɔɔbwe

ní buɔe mu ɔwɔ imi dínkí.

33Bɔkpɔí mu, bumegyí mu asún ɔnɔkwálisu.

Ɖhaa méetalí súná mu abí-aná,

tsúfé beka mu nkpa tin ɔsulúv anftsú.”

34Múú ɔmá ɔhande amu léfíté Filipino ɔbée, “Ma ɔwɔ asún Bulu ɔnósú ɔtɔ́pú anfi déblí, mu onutó ntée ɔha bambá?”

35Inu Filipino lélí Yesaia asun wanlínhé anftsú bláa mu Yesu ɔwɔ asun wankláán ámu. 36-37Bɔpu ɔɔyɔ́ á, ɔɔtu ntsu ku. Múú ɔmá ɔhande amu léfíté Filipino ɔbée, “Ntsu dá a, ntɔ létin mí asúɔ ɔkpa?”<sup>b</sup>

38Mú su ɔmá ɔhande amu léha mu keké ámu ɔɔtípú lélí. Mva Filipino bekplí wíé ntsu ámutɔ, Filipino lóɔ mu asú. 39Bréá bedalí ntsu ámutɔ á, aní Wíe Ɖɲé lotsu Filipino náti. Ɖmá ɔhande amu métrá wun mu, táme ɔɔpu ansigyí náti ɔyɔ́ wóyí. 40Filipo é léyedali Asoto wúlutɔ. Ɖlenatí kí unv awúlusu dá asun wankláán ámu ɔkan alu, oloyówie Kaesarea wúlutɔ.

### Saulo Kluntɔdamlí

(Gyumagyihe 22:6-16; 26:12-18)

**9** 1-2Alí bré ánfítɔ féé á, Saulo mókúsí Yesu akasípú amu bláa ɔbée, mómɔ amú. Mú su ɔɔɔyɔ Bulu igyí ɔhapú dehen wá yókulí mu ɔbée, ɔwánlun ɔwulú pule mu suna Damasko

<sup>b</sup> 8:37 Múú yéé 37 bu nwulú dada amu akutɔ: *Filipo lebláa mu ɔbée “Ní fahɔ Kristo gyi tsú fú uklvn féétɔ́ a, nétalí bɔ́ fú asú.” Ɖlebláa Filipino ɔbée, “Ee, nahogyi mbee Yesu Kristo gyi Bulu mu Bi.”*



*Filipo lélu Yesaia asvn wanlínhé anfsu bláa mu  
Yesu iwí asvn wankláán ámu. (Gyumagyihe 8:35)*

Yudafɔ \*ofiakpa ahande, méni ní mu ibi da oyin ntée ɔtsi ɔku, ɔna aní Wíe ɔkpa ámusu a, mékitá mu, kpá mu ba Yerusalem.

<sup>3</sup>Saulo lópu ɔkpa ɔyɔ Damasko. Oleta wie tá á, nsantu lekpa ogyá wa mu. <sup>4</sup>Oledida ɔsolúto kpla. Inu olonu ɔme ku. ɔme amu léfuté mu ɔbée, “Saulo, Saulo, ntogyi sú fúdin mísú alí?”

<sup>5</sup>Saulo léfuté ɔbée, “Fú ma ni, mí Wíe?” Múú ɔme amu lébláa mu ɔbée, “Mí Yesu ni. Mísú fudin ní. <sup>6</sup>Kusu, afuyu wúluto unu. ɔku obósuná fú tɔá lehián ání fɔbwe.”

<sup>7</sup>Saulo aba ání mua amónyɔ buna besi líí díín. Bonu ɔme amu, táme bumowun ɔhaa. <sup>8</sup>Saulo lókusu líí. Olobwíí ansíbi, táme ɔmedé atɔ wúun. Mú su bekítá mu ibi, kpá mu ya Damasko wúluto. <sup>9</sup>Oletsiá nkensá owítɔ omowun atɔ. Omegyí atɔ, omonu tɔto é alí bré ámutɔ.

<sup>10</sup>Alí bré ámutɔ á, Yesu ɔkasípú ɔku bu Damasko, butetí mu Anania. Olowun atɔ. Mútɔ á, aní Wíe Yesu lókpólí mu ɔbée, “Anania!”

Olotsulá ɔ́bée, “Mí Wíé, mí ní.”

<sup>11</sup>Mú aní Wíé lébláa mu ɔ́bée, “Kusu, yɔ́ brɔ́nu á múbú butetí mú ‘Ɖkpa Tswííhé’ amusu. Wie Yuda wóyítɔ́, afufite oyin á múbú otsú Tarso, butetí mu Saulo amusu. Alaba, ɔ́bu unu ɔ́de mpái bɔ́. <sup>12</sup>Alawun á ní oyin ɔ́kúá butetí mu Anania laba bɔ́pu ibi dínká musu, mu ansíbi labwíí.”

<sup>13</sup>Mú Anania lébláa aní Wíé ɔ́bée, “Mí Wíé, nanú oyin á nfi iwí asún. Alíá ɔ́depu lalahe gyi fú ahá á ní bubu Yerusalem. <sup>14</sup>Igyí ahapú dehen amu é bahá mu túmi bée, ɔ́bá Damasko bekítá ahá á ní butɔ́bɔ́ mpái fú dátɔ́ fée.”

<sup>15</sup>Aní Wíé lébláa mu ɔ́bée, “Yɔ́, mílalé mu mbée, ɔ́bwée mí osúmpú, ɔ́ha ɔ́má bámbátɔ́fɔ́, amú awíe pú Israelfɔ́ fée abubi mí. <sup>16</sup>Mí onutó nósuná mu alíá ɔ́bɔ́kuku wun ipian mí su.”

<sup>17</sup>Mú su Anania lóyɔ́ Yuda wóyítɔ́, yópu ibi dínká Saulosu, bláa mu ɔ́bée “Opíó Saulo, aní Wíé Yesu amúbú ɔ́lele iwí ɔ́wan súná fú bré á múbú febá nfi á mu lává mí fú wá. Ɖbée, mbeha fú afulawun atɔ́, Ɖɔ́e Wankíhé ɔ́bula fútɔ́.” <sup>18</sup>Tɔ́kúá igyi fé klemetí afwí lémain lé mu ansíbisu kpádá ununu. Mú su ɔ́lela ɔ́de atɔ́ wúun. Inu ɔ́ɔ́kusú, bɔ́bɔ́ mu asú. <sup>19</sup>Beha mu atɔ́ olegyi, ɔ́wunlín lelawíe mu.

### Saulo Bulu Asún Ɖkanda Damasko

Saulo létsiá akasípú amu wá nke kpalobí. <sup>20</sup>Inunu ɔ́lenatí yó amú ofiakpa, yéfi Yesu iwí asún ɔ́kan da asi ɔ́bée, “Yesu gyí Bulu mu bi á mu ní.”

<sup>21</sup>Ahá á ní bonu mu asun blíhé anfi fée ɔ́nɔ́ lobwie amú. Mú su befité bée, “Megyí mudé Yesu asúmpú mɔ́ Yerusalem ní? Megyí amú ɔ́kutákpá ɔ́leba nfi, ɔ́kpa amú ya igyí ahapú dehen amú?”

<sup>22</sup>Táme Saulo lélanyá túmi blí asún á mu ɔ́wunlínusú ɔ́bée, lélé Yesu gyí Kristo, (ɔ́há á múbú Bulu ladá mu ofúli amu). Alíá ɔ́lehie lé asún á mutɔ́ leha Yudafo á ní bubu Damasko unu bɔ́bwe basaa. Bumowun múá bótsu.

<sup>23</sup>Nke tsɔ́tsɔ́tsɔ́ ɔ́ma a, Yudafo á mu befia kítá agywun bée bó mɔ́ Saulo. <sup>24</sup>Mú su betsiá gyo wúlu amu ɔ́nɔ́ ɔ́pa onyé, méni bénya mu mɔ́ mu. Táme aku bowi tsá Saulosu bée, alí

Yudafɔ ámu babwé agywun ní. <sup>25</sup>Mú su eke ɔku onyé á, Saulo abúopu amutɔ aku botsu mu wá lakpátɔ, pú mu tɔun ikwitɔ kplí mu yi iban ɔma, ɔlesrí nátlí.

### Saulo Yerusalem Yo

<sup>26</sup>Bréá Saulo lówie Yerusalem a, ɔlɔtsun ɔkpa kugyíkusu ání obówie Yesu akasípú amutɔ. Táme bumohogyi ání alabwé ɔkasípú. Mó su benya mu ifú. <sup>27</sup>lɔu Barnaba lékpa mu ya, yéle mu súná \*sumbí ayɔpú amu. ɔlebláa amú alíá aní Wíe léle iwí ɔwan súná Saulo Damasko ɔkpatɔ, mu Yesunyo batóí; pú alíá Saulo lówa klɔn dá Bulu asún ámu ɔkan ɔwonlínú Yesu dátɔ Damasko wúlutɔ. <sup>28</sup>Mú su Saulo lówie amótɔ, beki Yerusalem wúlutɔ. ɔlɔwa klɔn blí Bulu asún ámu Yesu dátɔ. <sup>29</sup>Muá Yudafɔ ámúbú buteblí Griiki ɔblí amu betsiá tóí, gyi aba nwéen. Táme alí bré ámutɔ fée á, bude agywun bwe ání bómu mu. <sup>30</sup>Bréá mú afú lɔwulí ahógyipu amu a, bekpá mu yáa Kaesarea, há mu ɔlenatí yó Tarso.

<sup>31</sup>Mú su iwí lolwíí ɔpasua ání bu Yudea, Galilea pú Samaria ɔmátɔ. ɔɲe Wankíhé lékpa amú bekleí, dan hógyitɔ, betsiá tsiátóá ilegyi aní Wíe Yesu ansí.

### Aha Aku lɔ Tsa

<sup>32</sup>Petro lénatí ki Samaria nkudasi. Eke ɔku ɔleyéki Bulu ahá ání bubu Lida wúlutɔ. <sup>33</sup>lɔu á, oleyéfiá oyin ɔkuá butetí mu Enea, olesin tsukule nfikwe ní. <sup>34</sup>Petro lébláa mu ɔbée, “Enea, Yesu Kristo latsá fú ulɔ. Kusɔ kunta fú ɔklan.” lɔu Enea lókusú. <sup>35</sup>Ahá ání butsie Lida wúlutɔ pú Saron nsáuntu fée bowun oyin ámu. Mó su bohogyi, bobuo aní Wíe.

<sup>36</sup>ɔtsi ɔku bu Yopa wúlutɔ, ogyi ɔkasípú. Butetí mu Tabita. Mu dá ámu así Griiki ɔblítɔ gyí, “Dorka.” Mó así gyí, “Abre.” Yilé ɔbwepú ogyi. ɔbu awitɔle há ahiánfɔ. <sup>37</sup>Bréá Petro bu Lida a, ulɔ lɔda Tabitasu. Olowu, bebie mu ntsu, sí mu tswí abansúru kutɔ. <sup>38</sup>Yopa múa Lida awúlu umafó aba wá. Mó su bréá akasípú amúbú bubu Yopa amu bonu lowu ánfí á, ɔbwa abi anyɔ sísí Petro bée, bobwíí ipa há mu,



ɔwáa ɔsa tu amú. <sup>39</sup>ɛnu Petro lówa ɔsa bwé, múa amúnɔ benatí. Bréá olobowie unu á, bekpa mu ya abansúru amuto. Wúlu amuto asurapu féé bubu fúli amu asi. Bekpa pútá Petro budesú, buɗe atadiéá Dorka lóbwe bréá otsie nkpa pusúná mu. <sup>40</sup>Petro légya asurapu amu féé lé obu ámuto. Múú ɔleda akpawunu bó mpát, asa ɔledamlí kí fúli amu blí ɔbéé, “Tabita, kusu.” ɛnu Tabita lóbwií ansíbi. Bréá olowun Petro a, ɔɔkusú tsíá. <sup>41</sup>ɛnu Petro lékitá mu bi, ɔɔkusú líí. Petro létí asurapu amu pú ahógyipu atráhe amu. Múú ɔɔpu Tabita súná amú ání alatsínkí. <sup>42</sup>Asún ánífí lekkléí wá Yopa wúluto. Mú su ahá tsɔtsɔɔtsɔ bóho aní Wíe gyi. <sup>43</sup>Petro létsiá Simon ání ɔɔyɔ ɔwulú-kpákpá iwí agyúmá wá Yopa unu wá ɔpá.

### Konelio Abí Wa Petro Wá

**10** <sup>1</sup>Oyin ɔku létsiá Kaesarea unu, butetí mu Konelio. Ogyi Romafɔ isá akɔpú ɔpasua kuá butetí mú Italia ɔhande. <sup>2</sup>ɔbu nsi Bulusúm iwí. Mwa mu wóyítɔfó féé butosúm Bulu. Konelio tekíé Yudafɔ ahiánfɔ atɔ. ɔɔbó mpái há Bulu brégyíbré. <sup>3</sup>Eke ɔku Konelio lówun atɔ ntúpwe ɔɔsatɔ. Mu atowunhe amuto á, olowun Bulu-ɔɔpu ansí káín, Bulu-ɔɔpu amu lókpólí mu ɔbéé, “Konelio!”

<sup>4</sup>Ifú lekítá mu. Mú su olesi ɔɗe Bulu-ɔɔpu amu kí. Múú ɔɔfíté Bulu-ɔɔpu amu ɔbéé, “Mí Wíé, nkálí igyi?”

Bulu-ɔɔpu amu lébláa mu ɔbéé, “Bulu laho fú mpái. Fú ahá atɔ kie é lagyi mu ansí. <sup>5</sup>Wa abí abuyɔ Yopa yetí Simon Petro ba. <sup>6</sup>ɔɔyɔswíí ɔwulú-kpákpá iwí agyúmá ɔyɔpú Simon wóyítɔ, mantáa ɔpu ɔnɔ.” <sup>7</sup>Bréá Bulu-ɔɔpu amu lénatí á, Konelio létí mu asúmpú abanyɔ ání bubu mu wóyítɔ pú mu ɔbɔsɔfɛ ání ogyi isá ɔkɔpú, otenyá Bulu ifú. <sup>8</sup>ɔɔlebláa amú asún ání ulaba féé, ɔɔwa amú sísí Yopa.

<sup>9</sup>Mú ɔyi kehe bókusú ɔyɔ Yopa. Beta unu wie tá á, ɔbɔbwe fé ɔpa dóduanyɔɔ. Petro é dédu ɔyɔ obu awunso mpái ɔɔkpá. <sup>10</sup>Akún thíé ɗe mu. Mú su olekle ání obénya tɔku wá ɔnɔ. Bréá buɗe atɔ ámu núná há mu a, Petro lówun atɔ. <sup>11</sup>Atowunhe amuto á, olowun ání ɔsúsú lafínkí,

tɔkɔvá igyi fé ɔhráda téíhéhé, buɗe mu nsiebí ana, ɔdekplí íbá ɔsulósu. <sup>12</sup>Ɔyítɔ mbwi ɔtsan-ɔtsan, mbwíá bubu ayín, táme buteká abɔɔɔ pú ɔyítɔ mbubwi féé bubu ɔhráda ámuɔ. <sup>13</sup>Múú olonu ɔme ku léɗalu ɔbéé, “Petro, kusu mɔ mbwi ánfí afuwí.”

<sup>14</sup>Táme Petro léle mú ɔnɔ ɔbéé, “Ó-o! Mí Wíé, bɔkwí mí ɔpá á, mmɔkúgyi tɔá Yudafɔ amándíé lekisí ntée mú \*ɔwí metn kí.”

<sup>15</sup>Ɔme amu léla bláa mu ɔbéé, “Máti tɔá Bulu latin mú ɔwí atokisíhéhé.” <sup>16</sup>Atowunhe amu pú ɔme amu léba tse sa. Mu ansítɔ unu á, botsu ɔhráda ámu ya ɔsúsú ɔsáwule pé.

<sup>17</sup>Bréá Petro dé nwuntɔ bu tsú atowunhe anfi ɔwí á, Konelio abí ámu é bafíté wun Simon wóyítɔ, ba bulí ɔkpa ɔnɔ. <sup>18</sup>Konelio abí ámu bokpolí fíté beé, “Ɖfɔɔ ɔku tsie nfi, butetí mu Simon Petro?”

<sup>19</sup>Petro trá ɔɗe nwuntɔ bu tsú atowunhe amu ɔwí, Ɖhe Wankíhéhé lébláa mu ɔbéé, “Simon, ahá abasá aku baba buɗe fú dunká. <sup>20</sup>Kusu bwe, afukpli yefia amú amlinatu. Mágyi nwéén, tsúfé mílawá amú fú wá.” <sup>21</sup>Unu Petro lékplí yótu amú, bláa amú ɔbéé, “Mígyí ɔhá ámuú mlíɗédunká ámu ni. Ntogyi sù mliná?”

<sup>22</sup>Ahá ámu bele mú ɔnɔ beé, “Anumédé tsitsa. Isá akɔpú ɔhande Konelio ání otenyá Bulu ifú, Yudafɔ féé butetí mu ɔdayilé lówa aní fú wá. Bulu-ɔbɔpu ɔku labébláa mu ɔbéé, ɔbá betí fú afuba mu wóyítɔ, méni obónu asún ání fúbu blí.” <sup>23</sup>Múú Petro lékpa amú wá wóyítɔ, ɔleha amú ɔdikpa.

Ɔyi kehe a, Petro mua amúnyɔ bɔkúsú pú ɔkpa bɔyɔ Kaesarea. Bréá bɔyɔ á, ahógyipu akvá bubu Yopa unu é bobuo amú yó. <sup>24</sup>Mú ɔyi kehe a, boyówie Kaesarea wúlutu. Botsutsúa abowie unu á, Konelio latí mu wóyítɔ ahá pú mu anyawíe kláklá befia, ɔɗe amú ɔkpa kí. <sup>25</sup>Bréá Petro lówie wóyí ámu ɔnɔ á, Konelio lókúsú yéfia mu, dá akpawunu mu ayabitɔ súm mu. <sup>26</sup>Táme Petro léha mu ɔlɔkúsú. Ɖlebláa Konelio ɔbéé, “Kusu, máda akpawunu há mí. Nyankpusa mí é ngyi.” <sup>27</sup>Petro mua munyɔ buna buɗetɔí alu olowie wóyítɔ. Unu olowun ání ahá tsɔtsɔtsɔ bafia. <sup>28</sup>Múú ɔlebláa

amú ɔ́bée, “Mli onutó mliyin ání Yudafo mbla meha ɔ́kpa ání Yudayin mua ɔ́má bámbátɔ́yin bubwée anyawíe ntée ɔ́bɔ́yɔ́ mu wá kpán. Táme Bulu lahá mí nabí ání mmáku mbée ɔ́ku \*ɪwɪ metɪn ntée ɔ́mɔ́fɔn amándíé ɔ́kpasu. <sup>29</sup>Mú sù bréá fɔ́wa abí féé bubéti mí á, mmɔ́kpɔ́kpɔ́v nɔ́wuntɔ́ ní. Amansu igyi? Bla mɪ.”

<sup>30</sup>Mú Konelio lébláa mu ɔ́bée, “Nde eke náásí, ntúpwe dɔ́sɔ́tɔ́ mbu wóyítɔ́ nde mpái bɔ́. ɔ́tsáwɔ́le pé á, nowun oyin ɔ́ku líí mí ansítɔ́. Oyin ámu lówa atadié futútú. <sup>31</sup>Oyin ámu lébláa mɪ ɔ́bée, ‘Konelio, Bulu lanú fú mpái. Fú ahá atɔ́ kie é lagyi mu ansí. <sup>32</sup>Mú su wa abí abuyɔ́ Yopa wúlutɔ́ yeti Simon Petro ba. ɔ́wulú-kpákpá ɪwɪ agyómá ɔ́yɔ́pú Simon wóyí ɔ́lɔ́swí. Otsie mantáa ɔ́pu ɔ́nɔ́.’ <sup>33</sup>Mú su unnu nɔ́wa abí sísí fú. Ibu aléá faba. Séi á, anɪ féé anɪlafia Bulu dátɔ́. Anigyó anɪ Wíe asún ání alapóhá fú ɔ́bée, fubláa anɪ.”

### Petro Asun Blíhé

<sup>34</sup>Mú Petro lótsu ɔ́nɔ́ blí ɔ́bée, “Nawun ání lélé Bulu tamaki ɔ́haa ansítɔ́. <sup>35</sup>Mboún ɔ́há ání otenyá mu ifú, ɔ́tɔ́bwé yilé asún otekle ɔ́mágyíɔ́mátɔ́. <sup>36</sup>Mliyin asun wankláán ání Bulu lópuhá Israelfɔ́. Asún ámu gyí, Bulu lapú iwílwii ba tsun Yesu Kristo, ahá féé Owíe amusu. <sup>37</sup>Mliyin asún kpɔ́nkpɔ́ntɪ ání ɪleba Yudea ɔ́mátɔ́ féé. Ilotsu asɪ tsú Galilea ɔ́mátɔ́, bréá Asú ɔ́bɔ́pú Yohane léda \*asúbɔ́ ɔ́kan ɔ́ma. <sup>38</sup>Mliyin anɪ Wíe Yesu Nasaretyin amu. Mliyin ání Bulu lópu mu ɔ́ɲe Wankíhé pú túmi wá mutɔ́, oleki ɔ́tínegyíɔ́tíné bwé yilé, tsá ahá ání bubu ɔ́bunsám túmi asɪ ɪɔ́, tsúfɛ́ Bulu buo mu. <sup>39</sup>Anigyí ahá ání anulówun mu bwehé ání ɔ́lɔ́bwe Yudea pú Yerusalem ɔ́mátɔ́ féé ní. Beda mu mántá \*oyikpalíhesu mó mu. <sup>40</sup>Táme mú eke sáásí a, Bulu lókusúa mu, lé mu ɔ́wan, ahá bowun mu. <sup>41</sup>Megyí ɔ́yítɔ́ ahá féé lówun mu, táme anɪ ahá ámúbú Bulu léle yáí ɔ́bée, abwée mu adansɪfɔ́ ámu mú anulówun mu. Mu kúsú tsú afúlito ɔ́ma a, anɪa munyɔ́ légyi, anulówɪ ní. <sup>42</sup>ɔ́lehɪe anɪ ɔ́bée, adáa mu asun wankláán ámu ɔ́kan suna ahá, agyi mu ɪwɪ adánsɪe ání mgyí ɔ́há ání Bulu laléá obégyi aktankpapu pú awupú féé asún ní. <sup>43</sup>Bulu ɔ́nɔ́sú

atɔ́pú amu fée beblí beε lélé, ɔhagyíɔha ání ɔlɔɔ Kristo gyi a, Bulu obési mu lakpan fée kíé mu Kristo dátɔ́.”

### Ɔmá Bámbásɔ́fɔ Ɖɛ Wankíhé Nya

<sup>44</sup>Bréá Petro dé asún ánfɔ blí á, Ɖɛ Wankíhé lébá ahá ámú bude mu asún ámu nu ámu féesú. <sup>45</sup>Ɖnɔ lobwie Yudaɔ ahógyipu amú bobuo Petro ba unu ámu ání Bulu lapú mu Ɖɛ Wankíhé amu kíé ahá ání bumegyí Yudaɔ. <sup>46</sup>Tsúfé bowun ání ahá ámu bude ɔblí bámbá blí, buhíé bude Bulu kanfú. Mú su Petro lébláa amú ɔbéε, <sup>47</sup>“Bulu lahá ahá ánfɔ é Ɖɛ Wankíhé fé anɔ. Ɖku ɔbétalí tin amú ɔkpa ɔbéε bumáɔ amú asú?” <sup>48</sup>Mú su ɔleblí ɔbéε, bubɔ amú asú Yesu Kristo dátɔ́. Mú ɔma a, bokokóli Petro beε, otsía amú wá kpalobí.

### Petro lwi Asún Ɖnóle Yerusalem

**11** <sup>1</sup>Yesu sumbí ayɔpú ámu pú ahógyipu amú bubu Yudea ɔmátɔ́ ámu bonu ání ɔmá bámbátɔ́fɔ é baho Bulu asún ámu. <sup>2</sup>Mú su bréá Petro lɔ́yɔ Yerusalem wúluto á, muv ahógyipu akvá butekleá ahá butún \*keté asa abowie ɔpasua ámutɔ bebutí asún. Befité mu beε, <sup>3</sup>“Ntogyi su fayɔ ahá ání bumetun keté wóyí, fúa amúnyc mlilawá ibi gyi atɔ́?” <sup>4</sup>Mú su Petro léle asún ání ulebatɔ súná amú ukule-kule ɔbéε, <sup>5</sup>“Mbu Yopa wúluto nde mpái ɔ nowun atɔ́. Múɔ á, nowun ání tɔkúvá igyi fé ɔhráda téíhé, bude mú nsiebí ana lékplí tsú ɔsúsú bá mí wá. <sup>6</sup>Nowun pututo-mbwɔ pú wúluto mbwɔ, mbwíá bubu ayín, táme buteká abɔɔ pú ɔyítɔ mbubwɔ fée ɔhráda ámutɔ. <sup>7</sup>Unu nonu ɔme ku ledalɔ bláa mi ɔbéε, ‘Petro, kusɔ mɔ mbwɔ ánfɔ afuwɔ.’

<sup>8</sup>“Múú neblí mbée, ‘Mí Wíε, ekekeεke. Bɔkwí mí ɔpá á, mmɔkɔgyi tɔá Yudaɔ amándíé lekisí ntée mú \*lwi metun ki.’

<sup>9</sup>“Múú ɔme amu lótsu ɔsúsú lábláa mi ɔbéε, ‘Mátu tɔá Bulu latun mú lwi atokisíhé.’ <sup>10</sup>Tsesa sɔ́ɔn nowun atowunhe anfi. Mú ɔma a, ulelayínkí yɔ ɔsúsú.

<sup>11</sup>“Alɔ bré ámutɔ kén á, ayin abasá akvá ɔɔwa mí wá tsú Kaesarea baba bulú wóyí ámú ntsie múɔ ámu ɔnɔ. <sup>12</sup>Ɖɛ

Wankíhé lébláa mi ɔ́bée, mbúo amú yɔ, mmágyi nwéen. Apíó abasié ánfɪ botsú Yopa anfi é bobuo mi yó Kaesarea, anɪ fée anúlóyɔ Konelio wóyítɔ. <sup>13</sup>Konelio lébláa anɪ ɔ́bée, mowun Bulu-ɔ́ɔpɔ ɔku mu wóyítɔ, ɔlébláa mu ɔ́bée, ‘Wa abí abuyɔ Yopa yetɪ oyin ɔkúá bɔtɛtí mu Simon Petro ba. <sup>14</sup>Ɖbébláa fu asún ání fúá fú wóyítɔ ahá fée mlótsun músú nyá nkpa.’

<sup>15</sup>“Nenya tsú ɔ́nɔ ndetɔ́ alɪ, Ɖɛ Wankíhé léba amúsú fé alíá ɔ́lɛba anɪsu eke gyankpapɔ amɪ. <sup>16</sup>ɪnu nekaín anɪ Wíe asun blíhésɪ. Ɖbée, ‘Yohane lópu ntsu bó ahá asú. Táme mɪlɪ mú á, Bulu ɔ́ɔpɔ Ɖɛ Wankíhé bó mɪlɪ asú.’ <sup>17</sup>Mú su ní Bulu lapú mu atokiehé ámu kíé amú, fé alíá ɔ́ɔpɔkíé anɪ ahá ámúbú anúlóhɔ anɪ Wíe Yesu Kristo gyi amɪ a, mígyí ma ání nétin Bulu ɔ́kpa?”

<sup>18</sup>Bréá sumbí ayɔpú ámu bonu asún ánfɪ á, besi Petro tɔ́ wa, bekanfú Bulu bæ, “Múmú Bulu lahá ahá ání bumegyí Yudafɔ ɔ́kpa ɔ́bée, amú é budámli kluntɔ, abunya nkpa.”

### Kristo Ɖpasua Ání ɪbu Antiokia

<sup>19</sup>Stefano lowu ɔ́ma a, beɔ́nká ahógyipɪ amɪsu. Mú su beɔ́sáín yó Foinike múbá Kipro ɔ́sulúsu pú Antiokia wúluto. Yudafɔ nkɔɔle bebláa Bulu asun wankláán ámu. <sup>20</sup>Táme amútɔ́ akɪ mú botsu Kipro pú Kirene ɔ́mátɔ́ ba Antiokia bebláa Griikifɔ ámu anɪ Wíe ɪwɪ asun wankláán ámu. <sup>21</sup>Anɪ Wíe Bulu lélí amú ɔ́ma. Mú su amútɔ́ ahá tsɔ́tsɔ́tsɔ́ bohogyi, dámlí kluntɔ ba anɪ Wíe Yesu wá.

<sup>22</sup>Yerusalem ɔ́pasua ámu bonu asún ánfɪ. Mú su bɔ́wa Barnaba sísí Antiokia. <sup>23-24</sup>Barnaba gyí ɔ́ha wankláán, Ɖɛ Wankíhé pú hógyi é ɪtsɔ́ mutɔ́. Bréá olowie Antiokia, olowun alíá Bulu lagyi amú buale a, ansí legyi mu. Múbú ɔ́ɔtɔ́ kplá amú ɔ́bée, bupúbú amú klɔn fée dunka anɪ Wíe Yesusu, abuyi mu mblasɪ. ɪnu su ahá tsɔ́tsɔ́tsɔ́ bɔ́tsun mu asún ámɪsu hɔ anɪ Wíe gyi. <sup>25</sup>Mú ɔ́ma a, Barnaba lóyɔ Tarso wúluto yóɔ́nká Saulo. <sup>26</sup>Bréá olowun mu a, ɔ́lekpa mu ba Antiokia. Betsiá ɪnu ofi ɔ́kɔɔle, tsíá fíá ɔ́pasua ámu, súná amú atɔ́. Antiokia begyankpá tí akasípú amɪ bæ “Akristofɔ” ní.

<sup>27</sup>Bulu ɔ́nɔ́sú atɔ́ipú aku botsu Yerusalem ba Antiokia alí bré ámutɔ kén. <sup>28</sup>Amútɔ ɔkule dá gyí Agabo. Ɔɔkusú líí, blí Ɔɔe Wankíhé túmitɔ tswi ɔ́béé, “Akún kɔ́nkpɔ́nti ku béba Roma ɔ́mátɔ́ fée.” Uleba mótɔ́ bréá Roma Owíe Klaudio tsie obíású. <sup>29</sup>Akasípú amu bɔ́bwe agywun beé, amútɔ́ okugyíɔku obódunká t́sá obénya, abupu yekie apíó ahógyipu ání bubu Yudea ɔ́mátɔ́. <sup>30</sup>Begyí dinká ḿsú, bɔ́puhá Barnaba mva Saulo bɔ́puya ɔ́pasua ámu ahande.

### Petro Obudi

**12** <sup>1</sup>Alí bré ámutɔ́ á, Owíe \*Herode lédinká ɔ́pasua ámutɔ́ akusu, wá amú amumuyɔ. <sup>2</sup>Ɔleha betun Yohane mu pio Yakobo ɔ́dayítɔ́. <sup>3</sup>Herode lówun ání ibu Yudafɔ́ ámu ɔ́dwe. Mú su omesi, ɔ́leyékítá Petro é. Alí bré ámutɔ́ buɔ́e Israelfɔ́ \*Bodobodo Mátúhé \*Nke gyí. <sup>4</sup>Mú su bréá ɔ́lekítá Petro a, ɔ́ɔpu mu tswi obu, ɔ́lele isá akɔ́pú dúasie ɔ́béé, butsía gyo mu iwí abaná-abaná. Ɔɔbwe agywun ɔ́béé, begyí Nke ámu tá á, mégyí Petro asún dunsu. <sup>5</sup>Bɔ́wa Petro obu, támé ɔ́pasua ámu bɔ́bɔ́ mpái kínkíínkín há mu.

### Petro Obule

<sup>6</sup>Onyé asa ɔ́yí ɔ́béke Owíe Herode ɔ́béle Petro ba dunsu begyí mu asún á, bɔ́wa Petro ikan anyɔ́ kéké, ɔ́da ɔ́ɔɔɔɔɔɔɔ isá akɔ́pú abanyó nsiné. Isá akɔ́pú aku é bulí buɔ́e obu ámu ɔ́nɔ́ gyo. <sup>7</sup>Ɔ́tsáwule pé á, Bulu-ɔ́bɔ́pu ɔ́ku lébelí amú wá obuto unu, unu fée lówankí. Bulu-ɔ́bɔ́pu amu lópu ibi da Petro abintɔ́, oletsinkí. Ɔ́lebláa Petro ɔ́béé, “Wa ɔ́sa kusu.” Inu ikan amu lówóí lé mu ibi. <sup>8</sup>Mú Bulu-ɔ́bɔ́pu amu lébláa mu ɔ́béé, “Kusu pu ɔ́fé klí osiétɔ́, afutsu fú ntukuta wa.” Petro lóɔ́we. Mú ɔ́letrá bláa Petro ɔ́béé, “Tsu fú ligá wa afuba ayo.” <sup>9</sup>Petro lóbuo Bulu-ɔ́bɔ́pu amu dáli obu ámutɔ́. Imɔ́wankí Petro ní akíankpatɔ́ ntée atowunhetɔ́ Bulu-ɔ́bɔ́pu amu dé mu asún bláa. <sup>10</sup>Mva Bulu-ɔ́bɔ́pu amu bɔ́tsun obu-ɔ́nɔ́ gyankpapu pú nyɔ́ɔ́si agyópusu. Beba bɔ́tu dátɔ́ uklɔ́n ání f́ɔ́pudáli wie wúlutɔ́. Uklɔ́n amu onutó lefinkí há amú bɔ́tsun. Bɔ́pɔ́tsun brɔ́nu kusu bɔ́yɔ́ á, Bulu-ɔ́bɔ́pu amu lófwi sí Petro.

<sup>11</sup>Bréá Petro ansító lettú mu a, ɔleblí ɔbéé, “Séi mú nawun ání lélé Bulu lawá mu ɔbɔɔ, alabele mí Owíe Herode ibi pú t́á Yudafo bude ɔkpa kító.”

<sup>12</sup>Íniá Petro lówun mú ali su á, ɔlenatí ý Yohane ání butetráa ti mu Marko mu yin \*Maria wóyí. Ali bré ámutɔ á, ahá tsɔtsɔtsɔ bafia unv bude mpái bɔ. <sup>13</sup>Petro léda amú uklonsu, osúmbi tshé ɔkúá butetí mu Rode lébeki ɔhá ání ogyi. <sup>14</sup>Bréá Rode lébi ání Petro ɔme ni á, ansí lehie gyi mu. Mú su ɔletan obu ámu finkí. Mboún oleyinkí srí yébláa amú ɔbéé, “Petro laba ɔlí obu-ɔnɔ.” <sup>15</sup>Ahá ámu bebláa mu beé, “Fú nwun layintá.” Táme ɔbɔɔ músú, ɔdeblí ɔbéé, “Lélé a.” Mú su bebláa mu beé, “Mómú fíali \*Bulu-ɔbɔɔvá ɔteki Petrosu ní.”

<sup>16</sup>Ali bré ámutɔ f́éé á, Petro trá ɔde uklon amusu da. Bréá bɔɔ yéfinkí mú, bowun Petro a, ɔnɔ lobwie amú. <sup>17</sup>Petro lóbwé ibi súná amú ɔbéé bukásu, ɔlebláa amú alíá aní Wíe lalé mu obu. ɔlebláa amú ɔbéé, “Mlɔbla Yakobo mua apíó ahógyipu atráhe amu asún ánfí.” Mú ɔlenatí amú wá ý ɔtine bambá á.

<sup>18</sup>Bréá ɔyí leke a, isá akɔpú ámu f́éé begyigyáa, fíté aba beé, “Nkí Petro me?” <sup>19</sup>Owíe Herode léha bodunká Petro ɔtíngyíótíné, táme bumowun mu. Mú su ɔleti obu adípúsú akípú amu, fíté amú asún, ɔleha bɔmɔ amú.

Mú ɔma a, ɔlenatí Yudea ɔmátɔ yétsiá Kaesarea wúluto nkensá ku.

### Owíe Herode Lowu

<sup>20</sup>Bré kutɔ á, ɔblɔ lehie kítá Owíe Herode Tiro ḿa Sidonfo su. Mú su awúlu anyɔ ánfí bele abí beé buyókokóli mu, iwilwii itsia amú nsiné. Tsúf́é Owíe Herode ɔmátɔ butenyá atogyihe tsú. Ahá ámu begyankpá yéle asóntɔ súná Owíe Herode wóyísú ɔkípú ɔkúá butetí mu Blasto, olotsulá gya amú nkpá bɔɔ Owíe Herode wá yókokóli mu.

<sup>21</sup>Owíe Herode léhie amú eke. Eke ámu lófun a, ɔlehihie ɔwɔ dáli betsiá mu obiású, bláa amú asún. <sup>22</sup>Ahá ámu bɔkplún blí beé, “Megyí nyankpusa détoí, mboún ɔkpi détoí

Gyu

o!”<sup>23</sup> Լոսոս Բուլու-ճօքս Լեճա Իերոճե, այամբի Խօւո մս, օլօւս. Թսիճե յօքս նսնյամ հա Բուլս.

<sup>24</sup>Բուլս ասն Լօյո մսս, կլի յո թսիսիսիս.

<sup>25</sup>Բարնա մսա Տաւօ Խօյո ամս արյոմա տա Իերսալեմ, Բեքա Իօհանե անի Բուտերաա տի մս Մարկօ Բուօ Իւո յինկի յո Անտիօկիա.

### Barnaba Mua Saulo Sumbi Wa

**13**<sup>1</sup>Բուլս յոնսս ատիքս քս ատս ասնաքս ակս Բեսիա Անտիօկիա յքասա ամսո. Ամոցի: Բարնա, Տիմեօն անի Բուտեի մս ՕԲիԲի, Լուկիօ անի օտսի Կիրենե յմատս, Մանան անի Բեյաի մսա Գալիլեա յմասս օցիքս \*Իերոճեյո թսուլե քս Տաւօ. <sup>2</sup>Բրեա \*Բեկի յոն, Բուճե ան Վիե սւմ ա, Ըյե Վանկիե Լեբլաա ամս յԲե, “Միլե Բարնա մսա Տաւօ հա մս, Բսյո արյոմա ամսո նետի ամս մԲե Բսճոյո ամս.”

<sup>3</sup>Մս սս Բրեա Բեկի յոն ամս Բո մքաի տա ա, Խօքս ԻԲու ճինկա ամս նւսնս, սի ամս յքա.

### Barnaba Mua Saulo Kipro Ծսլոսս Իո

<sup>4</sup>Ըյե Վանկիե Լոճա Բարնա մսա Տաւօ սմբի. Խօյո Տելեւկիա յւլսո յոտսս նտսս-յիԲի փա յո յսլոս կւա ԻԲու նտսս նսնե, Բուտեի մս Կիքոսս. <sup>5</sup>Բրեա Բուիե յւլս կւա ԻԲու սս, Բուտեի մս Տալիսս ա, Խօյո Իսուճո \*օփիքա յեճա Բուլս ասն ամս յԿան. Իօհանե ամսո Բուտերաա տի մս Մարկօ ամս ե ԼոԲուօ ամս յետս ամս արյոմա յո.

<sup>6</sup>Բեճալ Տալիմի յւլսո, Բեճաի Բուիե յսլոս կւա Բուտեի մս Քափօսս. Լս Բեփա յփաքս կքոնքոնտի յԿւա Բուտեի մս Բար-Իեսս. օցի Իսուճոյն, յոճա Բսնս Բուլս յոնսս յոնքս մսցի. <sup>7</sup>Մս նյաւիե ցի սս յմասս օցիքս Տերցիօ Քաւօ. Ըմասս օցիքս անի Լետն անի. Ըլօճա Բեյեի Բարնա մսա Տաւօ Բա մս յոյիտս. Թսիճե օճեկեա մոնս Բուլս ասն. <sup>8</sup>Տաճե յփաքս Բար-Իեսս անի մս ճա ասի ցի, Էլիմա Գրիկի յԲլիտս անի մեհա ամս յքա ԲսԲա յմասս օցիքս ամս Բուլս ասն ամս. Ըլօճո մԲոճի անի յմասս օցիքս ամս մանս Իեսս Իւո ասն ամս, փօւն յմոճոճո մսս ցի. <sup>9</sup>Լս Ըյե Վանկիե ԼոԲուլա Տաւօ ամսո Բուճե մս տի Քաւօ ամսո, օլեսի յլի յճե յփաքս ամս



ansító kú. <sup>10</sup>Múú ɔlebláa ɔfápú amu ɔbéé, “Ɖbunsám mu bi, futekísí uto wankláán kugyíku. Fapú ahámle pú lalahegyí bwé fú agyómá. Mú su fuméesi Bulu ɔnɔkwali amu afunuto wa? <sup>11</sup>Ki, Bulu ɔbébití fú isu. Fú ansíbi bóbwie. Fuméetrá wun ɔyi keheto owí alu yófun bré ku.”

lnunu Elima ansító loklun mu. Mú su ɔlɔwa tatápu bi, ɔde ɔku dunká ɔkita mu oyító. <sup>12</sup>Bréá ɔmású ogyípú amu lówun tśá ilaba a, ɔlɔɔ aní Wíe gyi. Aní Wíe iwí asún ámúú bude mu suná ámu leha ɔnɔ lobwie mu.

Gyu

### Barnaba Mva Paulo Antiokia Ání Ibo Pisidia Ɖmátó Yo

<sup>13</sup>Paulo mva mu aba ámu botsu ntsusu-yibi tsú Pafo wúluto yó Perge ání ibo Pamfilia ɔsulúsu. Táme Yohane Marko mú léyinkí amú ɔma tsú unu yó Yerusalem. <sup>14</sup>Bɔkusú tsú Perge yó Antiokia ání ibo Pisidia ɔsulúsu. \*Ɖkpúnú ɔdaké á, ɔɔy unu Yudafo ofiakpa yétsiá asi. <sup>15</sup>Bekla ató tsú Mose Mbla pú Bulu ɔnɔsú atóipú nwlótót ta á, ofiakpa amu ahande ɔɔwa abí beyébláa Paulo aná bee, “Apíó, ní mlidé asvankvá mléblí púwá ahá ánfí ɔwunlín á, ɔkpa da.” <sup>16</sup>Múú Paulo lókusú líí, ɔlɔɔwe amú ibi ɔbéé bukásu. Múú ɔlebláa amú ɔbéé, “Apíó Israelfɔ pú ɔmá bámbásúfɔá mlitenyá Bulu ifú, mliyaa asu amlunu. <sup>17</sup>Israel Bulu léle aní anáin bwé mu ahá. Ɖleha bekleí bréá bugyi afɔ́ Egypte ɔsulúsu. Ɖlɔpu mu túmi kɔnɔkɔnɔkɔnti kpá amú dali ɔmá ámutɔ. <sup>18</sup>Olenya klun kpá amú nfí advana (40) kéké dimbí ámusu. <sup>19</sup>Oleyintá ɔmá asienɔ́ kéké Kanaan ɔsulúsu, oleye amú ɔsulúsu amu púbwé siadiɛ há aní anáin. <sup>20</sup>Nfí lafana aduenu (450), ɔlɔpubwé ínu fée há amú.

“Mú ɔma a, ɔleha asún agyípú bekpa amú alu ɔɔtu Bulu ɔnɔsú ɔɔɔipú Samuel. <sup>21</sup>Bréá bebláa Bulu bee ɔyáí awíe ha amú á, Bulu léyaí Kis mu bi Saulo owíe há amú. Saulo otsú Benyamin abusuantɔ. Olegyi iwíe nfí advana (40). <sup>22</sup>Bréá Bulu lékplí mu a, ɔleha beyaí \*Dawid obíású há amú. Asún ánfí Bulu léblí tsú mu iwí ní. Ɖbéé, ‘Yisai mu bi Dawid gyí ɔhá ání mí klun dun musu, tsúfé ɔbɔ́bwe tógyítśá nébláa mu mbée ɔbwée.’

23“Dawid anfi abí-anátó Bulu labele Yesu tsú há Israelfo ɔbée, ɔbwée amú ɔlepú fé alá ɔlehie yáí. 24Asa Yesu lébá a, Asú ɔɔɔpú Yohane légyankpá dá ɔkan súná Israelfo féé ɔbée, budámli kluntɔ, abuha mu ɔɔ amú asú. 25Bréá Yohane ɔbá ɔɔmɔ mu agyómá ɔnɔ á, ɔlefuté ahá ámu ɔbée, ‘Ma mlidésusúu mlíaa ngyi? Megyí mígyí ɔhá ámú mlidé ɔkpa kíu amu. Mu mú ɔbéba mí ɔma. Mmɔfun ání nɔwɔí mu ntukuta.’

26“Mí apió, \*Abraham abí-aná pú ɔmá bámbásúfɔá mlitenyá Bulu ifú, mliyaa asu amlinu. Anigyí ahá ání Bulu lópu nkpahɔɔ asún ámu sísí. 27Yerusalem atsiápú pú amú ahande bumebi ání Yesu gyí ɔlepú. Bumonu Bulu ɔnɔsú atɔípú amu asún ání ɔwanlín tswi asi. Butekla mú ɔkpúnú ɔdaké kugyíku. Táme begyi Yesu asún, há mu ipón, mɔ mu; ileha Bulu ɔnɔsú atɔípú amu asún ánti leba mútɔ. 28Bumenya Yesu iwí asún kukvá bélí mósú mɔ mu, táme bebláa Pilato bee ɔhá abumɔ mu. 29Mú su bréá ɔɔbwe tɔá ɔwanlín tsú mu iwí féé tá á, bele mu tsú \*oyikpalíhe amusu yópulá mu. 30Táme Bulu lókusúá Yesu tsú afúlitɔ. 31Mú ɔma a, oletsíá le iwí súná ahá ámú mva amónyɔ benatí tsú Galilea yó Yerusalem amu bré tsɔtsɔɔtsɔɔ. Ahá ánti gyí ahá ání bude mu iwí adánsie gyí suná Israelfo ní.

32-33“Ani mú anidé mli asun wankláán ámu bláa. Múgyí, Bulu labwé tɔ ámú ɔlehie aní anáin amu há amú abí-aná. Amúgyí aní á. Tsúfé alakúsúá Yesu tsú afúlitɔ há aní, fé alá ɔwanlín wá \*Israelfo ulu nyɔɔsɔtɔ bee,

‘Mí Bí gyí fú.

Nde nabwé fú Sí.’

34Bulu létrá tóí tsú Yesu kusú tsú afúlitɔ pú mu ɔyulúv amúv umɔɔplɔ wá ɔbótɔ ekekekeke ámu iwí ɔbée,

‘Nɔpu mí oyúla wankíhé amúv nehie mbée, ubwé aliágyíalíá

nɔpohá Dawid amu há mli.’

35Owíe Dawid é létrá lawánlín wá Israelfo ulu bámbátɔ ɔbée, ‘Fuméha fú osúmpú wankíhé mɔɔplɔ wá fúli ɔbótɔ.’

<sup>36</sup>Owíe Dawid lósum Bulu mu nkpatɔ, bwé Bulu apé tá á, olowu, bopulá mu mu anáintɔ, ɔɔɔɔ. <sup>37</sup>Táme Yesu anfi Bulu lókusúá tsu afúlitɔ ánti mú mɔplɔ. <sup>38-39</sup>Mú su apíó, mluu asún ánti anidé mli bláa anfi asu. Yesu anfi nkulesu mlótsun nya lakpansikié. Mose mbla métalí há amligi asu Bulu ansítɔ. Táme ɔhagyíɔha ání alahɔ Yesu anfi gyi obégyi asu Bulu ansítɔ. <sup>40</sup>Mú su mliki wankláán, méni asún ámúú Bulu ɔnósú atɔpú beblí tswi amu méeba mliu. <sup>41</sup>Asún ámu gyí,

‘Asún ámu iwá mli

ahá ání mliɔwá Bulu asún nyányáa ifú, amliwu.

Tsúfé ní nde ɔku ɔblí gyuma ání ndegyí mliɔ

kóráá á,

mlumóohogyi.’ ”

<sup>42</sup>Bréá Paulo mua Barnaba buɔɔɔɔɔɔ Yudafo ofiakpa unu á, ahá ámu ɔkuklí amú beɔ bubá ɔkpúnú ɔɔaké ámúú ɔbá ámu, abutra ɔɔɔɔ tsu asún ámu iwí suna amú. <sup>43</sup>Bréá ahá ámu beɔɔɔ Yudafo ofiakpa unu á, Yudafo tsɔtsɔtsɔ pú ɔmá bámbátɔ abí ání bawíé Yudafo osúmtɔ beklá buo Paulo mua Barnaba. Mú su sumbí ayɔpú ánti ɔɔɔɔ kplá amú beɔ, bupúú ansí dinka Bulu awiɔlesu.

<sup>44</sup>ɔkpúnú ɔɔaké amúú bebláa amú beɔ bubá amu lófun a, ilesi kpalobí teki ahá beta wúlu amuɔ. Amú féé beba Bulu asún onukpá Yudafo ofiakpa unu. <sup>45</sup>Bréá Yudafo bowun ɔɔɔm amu a, Paulo aná iwí lówa amú olu. Íni su begyi Paulo asun blíhé amu nwéɛn, síá mu. <sup>46</sup>Táme Paulo mua Barnaba ɔɔwa klun bláa ahá ámu beɔ, “Teki mli lehián ání abégyankpá bláa Bulu asún ánti. Táme íná mlulékiná mú nu, mliɔé mli iwí kú mliaa, mliuméhián nkpa ání utamatá ámu su á, anlayínki ayɔ ɔmá bámbásúfo wá. <sup>47</sup>Tsúfé alí Bulu lówa aní ní. ɔbée,

‘Napú fú bwé ɔkandíe há ɔmá bámbásúfo.

ɔyítɔ ahá féé ɔbótsun fusu nyá nkpa ání utamatá.’ ”

<sup>48</sup>Bréá ɔmá bámbásúfo ámu bonu asún ánti á, ansí legyi amú, békanfú aní Wíe asún ámu. Inu ahá ánti Bulu lalé ɔbée, bunyáa nkpa ánti utamatá ɔɔɔ asún ámusu gyi.

<sup>49</sup>Ani Wíe asón ámu ilekleí wíe ɔmá ámutɔ ɔtínegyíɔtíne. <sup>50</sup>Táme Yudafɔ ámu pú atsiá bubu Yudafɔ osúmtɔ, obú bu amósú pú wúlu ahande bɔkúsú líí Paulo mua Barnabas, gya amó lé ɔmá ámutɔ. <sup>51</sup>Sumbí ayɔpú ámu bekpakpáa amú ayabito-isi wúlí amú nwunsu, benatí yó Ikonion wúlutɔ. <sup>52</sup>Táme Dɔɛ Wankíhé pú ansigyí lɔbulá Antiokia akasípú amutɔ.

### Paulo Mua Barnaba Bulu Asón Blí Ikonion Wúlutɔ

**14** <sup>1</sup>Ikonion wúlutɔ é á, alí kén Paulo mua Barnaba bɔyɔ Yudafɔ \*offiakpa ni. Beblí Bulu asón inu wankláán. Mú su Yudafɔ pú Griikifɔ tsɔtsɔwtsɔ bɔho Yesu gyi. <sup>2</sup>Táme Yudafɔ amú bumoogyi amu bɔtɔí wá ɔmátɔfɔ ámu asutɔ, há amú bɔkúsú líí ahógyipu amusu. <sup>3</sup>Ifú mekitá Paulo mua Barnaba. Betsiá inu wá ɔpá blí aní Wíe Yesu asón ámu wankláán. Yesu é lélí amú ɔma, su bɔbwe ofúla pú osúna púsúná aní mu awitɔle asón amú budeblí ámu igyi ɔnɔkwali. <sup>4</sup>Mú su wúlu amutɔ ulɔbɔí anyɔ. Aku bobuo Yudafɔ ámu, aku é bobuo sumbí ayɔpú ámu.

<sup>5</sup>Mú ɔma a, Yudafɔ, ɔmátɔfɔ pú amú ahande bɔbwe agywun bee, bɔwa sumbí ayɔpú ámu iwɔwɔsintɔ, dá amú abwi mɔ. <sup>6</sup>Sumbí ayɔpú ámu bonu asón anfi. Mú su besrí yó Likaonia awúlu yilé Listra mɔa Derbe pú awúluá ibu mantáa inusu. <sup>7</sup>Beda asun wankláán ámu ɔkan inu é.

### Paulo Mua Barnaba Gyumagyihe Listra Mɔa Derbe

<sup>8</sup>Oyin ɔku létsiá Listra wúlutɔ, bɔkwí mu ibu. ɔmɔkúkúsú líí mu ayabisu ki. <sup>9</sup>Ubu anfi tsie ɔde Paulo asun blíhé nu. Paulo lési líí ki mu alu, olowun aní alahogyiá Bulu ɔbétalí tsá mu. <sup>10</sup>Mú su ɔkɔplón kuklúkúú blí ɔbéé, “Kusu lu fú ayabi anyɔsu.” Inu oyin ámu lɔkúsú ɔtsáwule pé, wá natí bi. <sup>11</sup>Bréá ɔɔm amu bowun tsá Paulo labwé á, bɔkplón blí Likaonia ɔblítɔ bee, “Ukpɔ ámu badámlí anyánkɔpúsa kplí ba aní wá.” <sup>12</sup>Mú su bɔpu amú ɔkpɔ kɔnkpɔnti dá tí Barnaba bee, “Seus.” Bɔpu mu ɔtsíámu dá tí Paulo bee, “Hermes,” tsúfé Paulo líí amú ɔnɔ, ɔdetɔí ní. <sup>13</sup>ɔkpɔ Seus

otswékpa bu wúlu ɔ́n. Seus igyí ɔ́hapú lóyópu nnantwie pú oyí ntswítswí ba wúlu ɔ́n ɔ́n. Tsúfé mua ɔ́dom amu budekléá bótswé sumbí ayɔ́pú ámu.

14Bréá Barnaba mua Paulo bonu t́á bebá ɔ́ɔ́bwe á, bekítá amú atadié bálí. Ilosuná ání bumotsulá dínká itó ámúbú bebá ɔ́ɔ́bwe ámusu. Besrí wíé ɔ́dom amuto blí bée, 15“Ntogyi mlidé íni bwe? Aní é anyánkprósa angyí fé mli. Bulu asun wankláán abá bebláa mli, amlisi atɔ́kpan ánti ɔ́magyáa bobuo aní Wíe Bulu ɔ́kpanpapu. Múlɔ́bwe ɔ́sú ḿa asi, ɔ́pu pú ḿt́ ató féé. 16Bímí ámu a, olesi ɔ́kpa há ɔ́mágyíɔ́má ání bubwée t́á budeklé. 17Táme mú ó á, Bulu ḿkúsí ató wankláán tsɔ́tsɔ́tsɔ́ bwe, púsúná ání mubu ɔ́n. Mutehá nyankpu totswie, mli ndɔ́tɔ́ ató t́wá alé. Mutehá mli atogyiye, ɔ́tehá ansí tegyi mli.” 18Paulo aná asun blíhé anfi féé ɔ́ma a, ulɔ́wa ɔ́nlun asa betalí ká ɔ́dom amu tin bée, bumátun mbwi wólí amú ayabiasu tswe amú.

19Mú ɔ́ma a, Yudafo aku botsu Antiokia ání ɔ́bu Pisidia ɔ́mát́ pú Ikonion wúluto ba beblí asún pútse ɔ́dom amu agywun, ɔ́kúsú líí Paulosu. Beda Paulo abwi, bítía mu dál wúlu amuto. Buki bée alawú, su besi mu tswi. 20Táme bréá akasípú amu beba bobomlí Paulo a, ɔ́kúsú yínkí yó wúlu amuto. Mú ɔ́yi kehe a, mua Barnaba benatí yó Derbe wúluto.

### Antiokia Ání ɔ́bu Siria ɔ́mát́ Yinkí Bá

21Paulo mua Barnaba beda asun wankláán ámu ɔ́kan Derbe. Ahá tsɔ́tsɔ́tsɔ́ bedamlí kluntɔ́ mli Yesu akasípú. Múbú belayínkí yó Listra, tsun ɔ́y Ikonion alu bebedali Antiokia ání ɔ́bu Pisidia ɔ́mát́. 22Lnu Paulo mua Barnaba ɔ́wa akasípú amu atetɔ́-ɔ́nlun bée, bukíta hógyi amuto. Bebláa amú bée, “Ilehián ání abótswen ipian tsɔ́tsɔ́tsɔ́tɔ́ asa abówie Bulu iwíegyí ámuto.” 23Botó ɔ́pasua kugyíku á, buteklí \*ɔ́n b́ mpái, yái ahande há amú, pú amú wá aní Wíe amúbú amú ansí dun musu ámu ɔ́bu.

24Beki Pisidia ɔ́mát́ ɔ́pasua ámusu tá á, beba Pamfilia ɔ́mát́. 25Beda Bulu asun wankláán ámu ɔ́kan Perge wúluto. ɔ́kúsú tsú ɔ́n yó Atalia wúluto. 26Paulo mua Barnaba

Gyu

belatsiá ntsusu-yibito tsú unu bowie Antiokia. Inu gyí otínéá ahógyipu amu begyankpá klí onó b́ mpái, ání Bulu owáa awitole ha amú, méni bóyo agyómá ánfí bamó mú onó ánfí ní.

<sup>27</sup>Bréá bowie Antiokia a, beti ɔpasua ámu féé fia. Bebláa amú alíá Bulu lapú amú gyi gyuma, pú alíá Bulu lahá ahá ání bumegyí Yudafo é baho mu gyi. <sup>28</sup>Betsiá akasípú amu wá nke tsotsɔtsɔ.

### Sumbí Ayɔpú Pú ɔpasua Ámu Ifía Yerusalem

**15** <sup>1</sup>Bréá Paulo mva Barnaba bubu Antiokia a, ayin aku botsu Yudea ɔmátɔ ba unu. Bosuná ahógyipu ámúb bumegyí Yudafo ámu atɔ beɛ, ní bumɔkútín \*keté Mose mbla onó á, Bulu mɔɔho amú nkpa. <sup>2</sup>Paulo mva Barnaba bɔkɔsú líí asún ánfisu. Mú su amóa atɔ asunápú amu begyi mú nwéɛn kínkíínkín. Inu su beblí beɛ, bówa Paulo mva Barnaba pú Antiokia ahógyipu amu aku Yerusalem, abuyowun Yesu sumbí ayɔpú pú unu ɔpasua ahande amu tsú asún ánfí iwí.

<sup>3</sup>ɔpasua ámu besi ahá ámu ɔkpa benatí. Bréá bɔyɔ á, buna Foenike pú Samaria ɔmátɔ. Bebláa unfo ámu beɛ, ahá ání bumegyí Yudafo é badámlí kluntɔ ba Bulu wá. Asún ánfí lehie wá ahógyipu amu féé ansigyí. <sup>4</sup>Bréá bowie Yerusalem a, ɔpasua ámu, amú ahande pú sumbí ayɔpú ámu boho amú atúu. Paulo aná bebláa amú tɔá Bulu labwé tsun amúsú féé. <sup>5</sup>Táme ahógyipu amu akvá botsú \*Farisifoɔ bɔkɔsú líí blí beɛ, “Ilehián ání ɔmá bámbásúfo ámu bétun keté, gyi Mose mbla ésú.”

<sup>6</sup>Sumbí ayɔpú ámu pú ɔpasua ahande amu befia yo asún ánfito. <sup>7</sup>Bebutí asún ánfí wá ɔpá. Mú ɔma a, Petro lɔkɔsú líí, bláa amú ɔbéɛ, “Mí apíó, mliyin ání tsú bré kutɔ á, Bulu léle mí tsú mlito ɔbéɛ, mbláa ahá ání bumegyí Yudafo mu asun wankláán ámu, méni amú é bónu, ho músú gyí. <sup>8</sup>Bulu yín nyankpɔsa kluntɔ. ɔɔpu ɔɔe Wankíhé amu há amú, fé alíá ɔɔpuhá aní púsúná ání alaho amú. <sup>9</sup>Olosuná ání bumegyí ɔtsan há aní, tsúfé ɔleha amú kluntɔ letun bréá amú é bohogyi. <sup>10</sup>Ntogyi su mlidé Bulu sɔɔ kí? Ntogyi sú mlidépu

Mose mbla ánfɪ anɪ an anáin anumétalí gyi mósú ánfɪ han akasípú anfi? <sup>11</sup>Ekekeke! Anulahogyi ání Bulu ɔbɔtsun anɪ Wíe Yesu awɪtɔlesv hɔ anɪ nkpa fé amú.”

<sup>12</sup>Bréá Petro lɔtɔɪ tá á, afiápv amv féé bɔbwe díín. Mú Paulo mva Barnaba bebláa amú alíá Bulu lɔtsun amósú bwé ofúla pú osúna tsɔtsɔɔtsɔ ahá ámúbú bumegyí Yudafɔ ámvɔ.

<sup>13</sup>Bréá Paulo mva Barnaba bɔtɔɪ tá á, Yakobo lóyɔ mósú ɔbéé, “Apíó, mlyaa asv amlnu. <sup>14</sup>Simon Petro labláa anɪ ɔbéé, Bulu légyankpá lé súná ání otekle ahá ámúbú bumegyí Yudafɔ ámv asún. Mú sv ɔlele amútɔ akv bwé mv ahá. <sup>15</sup>Asún ánfɪ pú Bulu ɔnósú atɔɪpú amv asun blíhé labwé kule. Tsúfé bɔwanlín wá Bulu asún ámvɔ bée,

<sup>16</sup>‘Bulu ɔbéé. Ínɪ ɔma a, nélatsú \*Dawid iwíegyí amúbú ɪladɪda ámv kúsú.

Nélayi mú abuntíi féé,  
há mú béli wankláán,

<sup>17</sup>méni aha tráhe amv pú amúá bumegyí Yudafɔ, mí dá dɪn amósú féé bódunká míá ngvi amú Wíe, wun mɪ.

<sup>18</sup>Alí mí, mli Wíe Buluá nele ínɪ súná tsú bímbí ndeblí ní.’

<sup>19</sup>“Ínɪ sv tɔá mí Yakobo ndeblí gyí, mɪmáha apv asvansv kíklɪ ahá ánfɪ bumegyí Yudafɔ, badámlí klvntɔ ba Bulu wá ánfɪ. <sup>20</sup>Mboún mliha awanlɪn ɔwulú bláa amú aniaa, bumágyi atogyiheá bapóhá ɪkpi, tsúfé mú \*ɪwɪ metɪn. Bumáwa atsv mva ayin asún. Bumágyi ɔbwɪá ɔɔpusáa mv mósú pú obugya. <sup>21</sup>Tsúfé bímbí ɔpá á, butedá Mose mbla ámv ɔkan wúlugyíwúlutɔ, butekla mú Yudafɔ ofíakpa kugyíku \*ɔkpónú ɔdaké é.”

### Ɔwulú Pusísí Ahógyipvá Bumegyí Yudafɔ

<sup>22</sup>Mú sv sumbí agɔpú ámv, ɔpasua ahande amv pú ɔpasua ámv bɔbwe agywun bée, bele ayin akv tsú amútɔ abubuo Paulo mva Barnaba yɔ Antiokia. Bele Yuda ání butetí mv Barsaba mva Silas. Amú féé bugyi akpapú há ahógyipv amv. <sup>23</sup>Ɔwulú ání ɔɔpvhá amú ɔɔpuyátɔ asún gyí:

“Ahógyipvá mímégyí Yudafo, mlibu Antiokia, Siria pú Kilikia omátó. Mli apíó sumbí ayopú pú opasua ahande dé owulú ánfí wanlín sísí mli.

“Anidé mli itsiá ha.

24“Anulónu ání aní apíó aku botsu anitɔ ba mli wá unu, bɔpu asvanku kíklí mli, púyíntá mli agywun. Animókúwá amú. 25Íni su anulafia, tsúlá ání abéle aha aku abukpa aní apíó adwepú Barnaba mua Paulo ba mli wá. 26Ahá ánfí lási amú nkpa há aní Wíe Yesu Kristo agyómá ámu su ní. 27Mú su anidé Yuda mua Silas wa aniaa, bupúɔ onó bebláa mli asún ámú anlawánlín wá owulú ámutɔ ámu kén. 28Oje Wankíhé lalé súná aní, aní é anulaho mú ání uma aleá abópɔ atɔ dwindwín kuku sórá mli, dun mbla ánfí mú iwí dehián anfi. 29Mbla ámu gyí, ‘Mlumágyi atogyiheá bapúhá ikpi. Mlumágyi obwíá bɔpusáa mu mós pú obugya. Mlumáwa atsi mba ayin asún.’

“Ní mlidé mbla ánfísu gyi a, ibówa alé há mli. Anulafun nfi.”

30Bɔwanlín owulú ánfí há amú tá á, besi amba sumbí ayopú ámu okpa bɔpuya Antiokia. Boyówie unu tí ahógyipu amu féé fía, pú owulú ámu wá amú ibitɔ. 31Bekla owulú ámu a, ansí lehie gyi amú, tsúfé mútɔ asún leha klun lédi amú así. 32Yuda mua Silas, bogyi Bulu onósú atópú amu bɔtɔí kplá amú wankláán púwá amú owunlín, wá amú atetɔ-onlun. 33-34Betsiá amú wá nke kpalobí, opasua ámu lési amú okpa iwilwiitɔ, beyinkí yó ahá ámú bɔwa amú sumbí ámu wá.<sup>c</sup>

35Paulo mua Barnaba é betsiá Antiokia unu yófun bré ku. Amba unu ahógyipu amu aku betsiá súná ató, tsíá dá aní Wíe asun wankláán ámu okan.

### Paulo Mua Barnaba Abasumáin

36Bré ku oma a, Paulo lébláa Barnaba obéé, “Ha ayinki yo awúluá anuladá aní Wíe asun wankláán ámu okan féésú,

<sup>c</sup> 15:34 Mótɔ yéé 34 bu nwulú dada amu akutɔ: *Táme Silas mú lóbwe agywun ání obésin Antiokia unu.*



ayeki alá butsie.” <sup>37</sup>Barnaba lékléá békpa Yohane ání butetí mu Marko buo iwi. <sup>38</sup>Táme Paulo léblí ɔbé, uma alá Marko obóbuo amú, tsúfé ɔmetrá buo amú abuyɔ Bulu agyómá ámu. Oleyinkí amú ɔma tsú Pamfilia wúluto ɔpá. <sup>39</sup>Paulo mu Barnaba beprú asún ánfí kínkíínkín, ileha bemaín abasu. Barnaba lékpa Marko buo iwi, botsu ntsusuyibi yó Kipro ɔmátó. <sup>40</sup>Paulo é lékpa Silas buo iwi, Antiokia ahógyipu amu bɔpu amú wá Bulu ibito, bɔpu ɔkpa. <sup>41</sup>Paulo lóyɔtsun Siria múa Kilikia ɔmátó; ɔlɔwa ɔpasua ámuú ibubu unu ámu ɔwɔnlín.

Gyu

### Timoteo Léyétstá Paulo Mva Silasto

**16** <sup>1</sup>Paulo mu Silas benatí yó Derbe pú Listra. Ohógyipu ɔkúá butetí mu Timoteo bu Listra wúluto unu. Mu yin gyí Yudayin ání ɔlɔɔ Yesu gyi, táme mu si gyí Griikiyin. <sup>2</sup>Apíó ání bubu Listra pú Ikonion beti Timoteo idayilé. <sup>3</sup>Paulo lékléá ɔbékpa Timoteo nátí. Mú su ɔleha betun Timoteo keté, tsúfé Yudafɔ ámuú bubu unu ámu féé buyin ání Griikiyin Timoteo mu si gyí. <sup>4</sup>Bréá bɔyó á, bowié wúlugyíwúlusu butosúná unu ahógyipu mbla oduá Yesu sumbí ayɔpú ámu pú ɔpasua ahande amúú bubu Yerusalem amu bawá bee bɔgyíi músú. <sup>5</sup>Íni su ɔpasua ámu benya ɔwɔnlín hógyito, kléi ekekegyíeke.

### Paulo Makedonia ɔmátó Yɔ

<sup>6</sup>Paulo mu mu aba ámu bɔtsun Frigia pú Galatia ɔmátó. Tsúfé ɔɔe Wankíhé méha amú ɔkpa ɔbé, budáa Bulu asún ámu ɔkan Asia ɔmátó. <sup>7</sup>Bréá bowie Misia ɔsulúv ɔka á, bɔbwe agywun bee béyinkí tsun yɔ Bitinia ɔmátó, táme Yesu ɔɔe méha amú ɔkpa. <sup>8</sup>Mú su bɔtsun Misia ɔsulúsv kplí yó Troa wúluto. <sup>9</sup>Mú onyé á, Paulo lówun ató. Olowun ání Makedoniayin ɔku líi mu ansító, ɔde mu kokóli ɔbé, “Fa ɔpu amu ba Makedonia, afubegyí aní buale.” <sup>10</sup>Paulo lénya wun ató ámu ali, ulɔwankí mu ání Bulu dé aní wa ɔbé, ayó yeda asun wankláán ámu ɔkan unu. Mú su anilópu ɔkpa yó Makedonia.

### Lidia Klɔntɔdamlí Filipi Wúluto

11 Anulówie ntsusu-yibitɔ tsú Troa, fá ɔpu yó Samotrake ɔsulúsu. Mú ɔyi kehe a, anulélatsiá yó Neapoli wúluto. 12 Anulópu ayabitɔ tsú Neapoli yó Filipi wúluto. Filipi gyí Makedonia wúlu yilé ní. Romafɔ búw wúlu anfitɔ. Anulétsiá unu nke kpalobí. 13 Ɔkpúnú ɔdaké á, anulédali wúluto yó ɔpu ɔnɔ ɔtunekvá aníkí aniaa, abówun ɔtínéá Yudafɔ butefia bo mpái. Anulétsiá unu bláa atsi akvá bebefia unu Bulu asón. 14 Atsiá bonu asón ámutɔ ɔkule gyí Lidia. Tiatirayin ogyi, ɔtéfé tatiá mú ntsu lepe, unu bíá. Bulu osúmpú ogyi. Aní Wíe léha mu olonu Paulo asun blíhé amutɔ. 15 Mú su bréá anulóbo mu mu wóyítɔ ahá asú á, olobwií ipa há aní, blí ɔbéé, “Ní mlulahogyi ání nahɔ Yesu gyi a, mlubetsiá mí wóyítɔ.” Ɔtsi ánfɔ bu anisu alu anulóbuo mu yó mu wóyítɔ.

### Paulo Mva Silas Obudɔ Filipi

16 Eke ɔku ayó Yudafɔ mpái ɔbokpá unu á, anulótu otsibi ɔkvá ogyi ɔkpábi unu. Atóla ɔhé bu musu, ɔtelá ató, blí asón ání lbéba. Ɔtɔbwé kóba tsɔtsɔtsɔ há mu awíe tsú mútɔ. 17 Otsibi anfi lékplá buo ania Paulonyɔ. Ɔna ɔdekplón blí ɔbéé, “Ahá ánfɔ gyí Ɔsúsúsú Bulu ámu asúmpú ni. Amódé mli nkpahɔ ɔkpa suná ní.” 18 Ɔlɔbwe mú nke tsɔtsɔtsɔ. Inu lehan Paulo. Mú su ɔledamlí bláa otsibi amu ɔbéé, “Atóla ɔhé, nde mbla wa há fú Yesu Kristo dátɔ, dali mutɔ!” Inunu ɔhé ámu lédali mutɔ.

19 Ɔkpábi amu awíe bowun ání amú kóba ɔkpa latin. Mú su bektá Paulo mva Silas, bítía amú ya wúlu ahande ansítɔ. 20 Bɔpu amú ya Romafɔ asón agyípu béé, “Yudafɔ ahá ánfɔ bugyi, bude asón klée wa aní wúlu anfitɔ. 21 Bude amándié laláhe ání aní mbla meha mú iwɔ ɔkpa suná. Romafɔ aní mú angyí. Anuméetalí hɔ amú amándié ámu gyi músú.” 22 Inu ɔdɔm amu botu bun Paulo mva Silasu.

Asón agyípu amu beha béé buwóí amú atadié, abunwen amú mpli. 23 Beputí Paulo mva Silas ató wankláán tá á, beha bɔpu amú tswi obu. Bebláa obu adípúsú ɔkípu béé, ogyóo

amú wankláán. <sup>24</sup>Asún á múú bebláa obu adípúsú ɔkípu amu su ɔɔpu amú yétswi obutótó, wá amú ayabi kplakitsi.

### Obu Adípúsú ɔkípu Yesu Hógyi

<sup>25</sup>Mú gyí-nsiné á, Paulo mua Silas bude mpái bɔ, bude ulu wa kánfú Bulu. Obu adípú atráhe amu é buda budenu. <sup>26</sup>ɔtsáwule pé á, ɔsulúw lékpunkí ɔwunlínúsú, ulékpunkí obu ámu ntswiasí. Mú aklun fée lefinkí. Obu adípú ámu ikan pú amú kplakitsi amu fée lɔwɔí. <sup>27</sup>Obu adípúsú ɔkípu amu létsinkí, wun ání aklun amu fée lafinkí. Inu ɔlele ɔdayí ɾya anyɔ ɔbéé amuwɔ iwí, tsúfé ɔkí ɔbéé obu adípú ámu fée badáli srí. <sup>28</sup>Táme Paulo lɔkplun kúklúkúú bláa mu ɔbéé, “Mábwe iwí tɔtɔ. Aní fée aníbu inu.”

<sup>29</sup>Obu adípúsú ɔkípu amu léha botsu ɔkandíe ba mu, ɔɔwa ɔsa wíé obu ámutɔ. Ifú de mu, su ɔdekpunkí kpakpakpakpa. ɔleyéda akpawunu Paulo mua Silas ayabito. <sup>30</sup>Inu ɔlekpa amú dál yéfité amú ɔbéé, “Mí awíé, ntɔ mbwée asa Bulu ɔhɔ mi nkpa?”

<sup>31</sup>Mú Paulo mua Silas bebláa mu beé, “Hɔ Yesu gyi, ménu Bulu ɔbɔhɔ fúa fú wóyító ahá fée nkpa.” <sup>32</sup>Múú bebláa mua mu wóyító ahá fée aní Wíé Yesu asun wankláán ámu. <sup>33</sup>Onyé-onyé ámu a, oyin ámu léyiá amú iwí nɔ á múú benya bré á múú bepítí amú ató ámu. ɔleha amú ɔbɔɔ mua mu wóyító ahá ámu asú inu. <sup>34</sup>Obu adípúsú ɔkípu anfi lɔpu amú ya mu wóyító, ɔleyéha benuná ató há amú begyi. Inúá mua mu wóyító ahá fée bahɔ Bulu gyi su á, ansí lehie gyi amú.

<sup>35</sup>Mú gyi kehe a, asún agyípu amu ɔɔwa ahá akítápú aku beé buyébláa obu adípúsú ɔkípu amu beé, osíi ahá ámu abunati.

<sup>36</sup>Mú su oyin ámu lébláa Paulo ɔbéé, “Asún agyípu amu bapú ɔme sísí mí beé, nsíi fúa Silas amlunati. Mú su mlinati iwilwiitɔ.”

<sup>37</sup>Táme Paulo lébláa ahá akítápú amu aku ɔbéé, “Bumegyí aní asún, táme banwén aní ató ɔbuntɔ. Romafɔ anigyí, táme bawá aní obu. Ntogyi su budekléá bési aní ɾjáintɔ? Ekekeke! Asún agyípu amu onutó bubá bele aní.”

*Obu adipúsú ɔkípɔ lópv Paulo mva Silas yétswi obutótó,  
wá amó ayabi kplakitsi. (Gyumagyihɛ 16:24)*

<sup>38</sup>Ahá akitápú amu beyinkí yó yébláa asún agyípu amu. Bréa bonu ání Romafɔ Paulo mua Silas bogyi á, ifú lehié kítá amú. <sup>39</sup>Mú su boyóbwií ɔpa há Paulo aná, bekpá amú dali yókokóli amú beɛ budáɔl wúlu amutɔ. <sup>40</sup>ɔnu Paulo mua Silas benatí yó Lidia wóyítɔ. Befia apíó ahógyipu amu unu, tɔí kplá amú, wá amú ɔwunlín asa benatí.

### Paulo Tesalonika Yo

**17** <sup>1</sup>Bréa Paulo mua Silas benatí tsú unu boyo á, buna Amfipoli pú Apolonia awúlusu beba Tesalonika. Yudafɔ \*ofiákpa ku bu unu. <sup>2</sup>Fé alá Paulo tɔbwé brégyíbré á, ɔɔyo ofiákpa unu ɔkpúnú ɔdaké, mua amúnɔyo boyo Bulu asun wanlínhé amutɔ. ɔlobwe mú alɔ tse sa són. <sup>3</sup>ɔlele Bulu asún ámutɔ súná amú, dínká ibwi músú ɔbéɛ, “Ilehián ání Kristo, (ɔhá ámutɔ Bulu ladá mu ofúli amu), obówun iwɔsun wú, lákúsú tsú afúlitɔ.” ɔɔyo mu asún ámusu ɔbéɛ, “Yesu anfi nde mu iwɔ asún blí anfi gyí Kristo amu ni.” <sup>4</sup>Paulo asún anfi lwankí Yudafɔ ámutɔ aku. Mú su bobuo mua Silas. Alɔ kén Griikifɔ Bulu asúmpú pú atsiá obú bu amúsú tsɔtsɔtsɔ é bobuo amú ní.

<sup>5</sup>ɔni léha Paulo mua Silas iwɔ lówa Yudafɔ ámu olu. Mú su bekpá aha laláhe aku buo iwɔ tsú brɔnusu, boɔpu ahá tsɔtsɔtsɔ yéhan agywun wúlu amutɔ. Betsií yó oyin ɔkúá butetí mu Yason wóyítɔ, buɔ Paulo mua Silas dunká abubutia amú ba ɔɔɔm amu ansítɔ. <sup>6</sup>Táme bumowun Paulo mua Silas. Mú su bebutia Yason mua ahógyipu amu aku ya wúlu ahande ansítɔ, buɔ okitikiti beɛ, “Ahá anfi ná buɔ agywun háan ɔyítɔ féé ní. Bawié nfi, <sup>7</sup>Yason laho amú yáí mu wóyítɔ. Amú féé buɔkúsú líí Roma Owíe Dehen mblasu. Tsúfé buɔ ahá bláa beɛ, owíe bambá ɔku bu unu, mu dá gyí Yesu.” <sup>8</sup>Bréa wúlu ahande pú ɔɔɔm amu bonu asún anfi á, lehiɛ han amú. <sup>9</sup>Táme bebutí Yason mua mu aba ámu iwɔ, beka ɔko, ká ntam beɛ bumétrá han agywun, besi amú benatí.

### Paulo Mva Silas Beroia Yo

<sup>10</sup>Besi owí leta, ahógyipu amu beha Paulo mua Silas benatí yó Beroia wúlutɔ. Benya wíe unu alɔ, boyo Yudafɔ ofiákpa.

Gyu

<sup>11</sup>Yudafá bubu wúlu anftɔ botsulá hɔ asún ámu dun amúá bubu Tesalonika. Bɔpu ansigyí hɔ Bulu asún ámu, tsíá yó Bulu asun wanlínhé amutɔ ekekegyíeke kí bæ, ɔɔkwali Paulo dé amú bláa. <sup>12</sup>Yudafá tsɔtsɔtsɔ pú Griikifɔ atsi múa ayin ání obú bu amúsú é bɔhɔ asún ámusu gyi. <sup>13</sup>Yudafá ámúú bubu Tesalonika amu bonu ání Paulo layɔ ɔde Bulu asún ámu ɔkan da Beroia. Ínu su begya ɔkpa yó unu bude unufɔ ámu agywun yintá. <sup>14</sup>Ɔsasɔ, ahógyipu amu bele Paulo lé wúlu amutɔ ya ɔpu ɔnɔ, táme Silas mua Timoteo mú besi bubu unu. <sup>15</sup>Ahá ámúú beyési Paulo ɔkpa ámu bekpa mu alu yówie Atene wúlutɔ. Bréá buzeyinkí á, Paulo lópu ɔme sísí Silas mua Timoteo ɔbéé, buwáa ɔsa bɔtu mu.

### Paulo Atene Yɔ

<sup>16</sup>Bréá Paulo lési otsie ogyo Silas mua Timoteo Atene wúlutɔ á, unu tsiá lehɛ han mu. Tsúfé olowun ání ikpi sɔ́n bu wúlu amutɔ. <sup>17</sup>Mú su ní ɔyɔ Yudafá ofiakpa unu á, mua Yudafá pú Griikifɔ ámúú bude Bulu súm ámu butetsíá lé asúntɔ há aba. Alu kén mua dunsu atsiápú é betsiá tɔ́í tsú mú iwɛ ní. <sup>18</sup>Mua atiansipu akvá botsu Epikuro pú Stoak ɔpasuatɔ<sup>d</sup> ba unu é betsiá bíí asún ání. Amú́tɔ aku befíté bæ, “Ntɔ ɔkan ɔnɔ́tɔ ɔkapú ání dɛ́da?”

Aha aku bele mú ɔnɔ bæ, “ldeɔwe fé ikpi aku iwɛ ɔdetɔ́í tsú.” Tsúfé Paulo dé Yesu mua afúlikusú iwɛ asún ɔkan da. <sup>19</sup>Múú bekitá Paulo, kpá mu ya Areopago, igyi amú wúlu ahande ofiakpa. Ahande amu bebláa Paulo bæ, “Anudéklé aniaa, futɔ́í tsu fú atosunáhé pɔpwe amu iwɛ suna aní. <sup>20</sup>Anumókúnú asún ání kí. Mú su anudéklé aniaa, fulée mútɔ suna aní.” <sup>21</sup>Tsúfé Atenefɔ pú afɔ́ɔ́á bubu unu féé butamabwé tɔ́tɔ dun asún ání ulaba nu pú mú blí.

<sup>22</sup>Ínu Paulo lókusú líí afiapu amu ansítɔ ɔbéé, “Atenefɔ, nawun ání mltehíé tswɛ ikpi. <sup>23</sup>Tsúfé ínúá ndeki wúlu

<sup>d</sup> 18:18 *Epikuro* ɔpasuatɔ́ɔ bɔgyi aha akvá buteblí bæ, ilehián ání ansí bégyi aní. Fowú á, ulatá. *Stoak* ɔpasuatɔ́ɔ é bæ, mehián ání ansí bégyi aní dubɔdubi, awirehɔ é mákitá aní dubi.

anfuto féé á, nawun ntobí oduá mlitotswe. Nawun afodie-  
 asubwi kuá bōwanlín dínká mósú bee, ‘BULUÁ ANIMÉYÍN MU.’  
 Mú su Bulu ámúú mlidésun, mliméyín mu dá ámu iwí okan  
 ndeda súná mli á. <sup>24</sup>Bulu lóbwe oyí pú mótó ató féé. Mogyí  
 ósú múa asi Owíe. Otamatsiá otswékpa ání anyánkpósa ibi  
 léyi mótó. <sup>25</sup>Otamadúnká toto tsú ohaa wá, méni ibwe fé  
 toku tehían mu. Tsúfé mutéhá ahá féé nkpa, oje pú tógyítóá  
 itehían amú. <sup>26</sup>Muléha su ahá féé belun tsu obakúle pétó,  
 ojeha bekleí wá oyító féé. Muléha oma kugyíku otínéá butsie  
 pú bréá bétsiá yófun. <sup>27</sup>Olobwe mú ali, méni nyankpusa  
 obódunká mu wun mu. Táme teki oma ifó anito okuku wá.  
<sup>28</sup>Tsúfé oku léblí obéé, ‘Bulu su anutsie nkpa. Mu sù anutekán  
 iwí, anigyí alíá anigyí.’ Fé alíá mli ulu awapó aku beblí bee,  
 ‘Bulu ahá aní é anigyí.’

Gyu

<sup>29</sup>“Íniá Bulu ahá anigyí su á, animáki aniaa, Bulu gyí fé  
 tunkuá nyankpusa lapú sika pepe, sika futútú ntée ibwi pwé  
 mú alíá odeklé. <sup>30</sup>Bímbí ámu a, ahá bumebi alíá Bulu gyí.  
 Bulu lóbun ansíbi mósú, táme séi mú á, alabláa anyánkpósa  
 féé obéé, budámli kluntó. <sup>31</sup>Bulu lalé eke yái ání obótsun ohá  
 ámúú alalé yái ámusu gyi oyító ohagyíoha asún okokwalisu.  
 Odeklé obéé ahá bubú ání okokwali igyi. Mú sù okokúsú  
 ohá ámu tsú afúlitó ní.”

<sup>32</sup>Íniá Paulo lótoí tsú afúlikúsú iwí su á, aku bōmōsí  
 mu. Táme amótó aku beblí bee, “Anudeklé aniaa, futráa  
 ba afubebláa aní asún ánti ku é.” <sup>33</sup>Imu Paulo lókúsú dál  
 ofiakpa unu. <sup>34</sup>Táme ahá kpalobí ku bōho Paulo asún ámusu  
 gyi, bobuo mu. Amótó okule dá gyí Dionisio, oletsíá wúlu  
 ahande amoto. Mva otso okuá butetí mu Damari pú aha  
 aku é.

### Paulo Korinto Yo

**18** <sup>1</sup>Imu oma a, Paulo lókúsú tsú Atene yó Korinto wúluto.  
<sup>2</sup>Oloyóto Yudayin okuá butetí mu Akwila, bokwú mu  
 Italia omanti kuá butetí mú Pontoto. Akwila mua mu ka  
 Priskila beba Korinto unu mokówá opa. Tsúfé ali bré ámutó  
 á, Roma Owíe Klaudio lagya Yudafó féé lé Roma wúluto.

Paulo lóyɔ amú wá. <sup>3</sup>Tati-obubí abwepú amú é bugyi. Mú su Paulo létsiá amú wá, mua munyɔ betsiá bwé tati-obubí ámu fé. <sup>4</sup>Ɔkpónú ɔdaké kugyíku á, Paulo tɔyɔ Yudafɔ \*ofiákpá yéle Bulu asún ámutɔ wankláán súná Yudafɔ pú Griikifɔ ámu, méni bóhɔ Yesu gyi.

<sup>5</sup>Bréá Silas mua Timoteo botsu Makedonia bɔtu Paulo a, olesi agyómá ámu yɔ, pú Bulu asún ámu ɔkanda kóún bwé mu gyumagyihe. Oletsíá gyi adánsɛ súná Yudafɔ ámu ɔbéé, Yesu gyí Kristo, (ɔhá ámutú Bulu ladá mu ofúli amu) ni. <sup>6</sup>Táme bumɔhɔ mu asún ámu. Bɔkusú líí musu, síá mu. Mú su Paulo lófwi ɔbɔ lé amú asúntɔ, bláa amú ɔbéé, “Tsú nde púya a, nalé ɔbɔ mli asúntɔ. Ní lowu mlidéklé a, ɔbɔ mli. Néyébláa ahá ání bumegyí Yudafɔ mboún Bulu asún.” <sup>7</sup>Ɔni su Paulo lédalɔ Yudafɔ ofiákpá unu yétsiá oyin ɔkuá butetí mu Tito Yustus wóyítɔ. Megyí Yudayin oyin ámu gyí, táme ogyi Bulu osúmpú. Mu wóyí ɔbɔ mantáa Yudafɔ ofiákpá unu. <sup>8</sup>Táme Krispu ání ogyi Yudafɔ ofiákpá unu ɔhande mua mu wóyítɔfɔ féé mú bóhɔ anɔ Wíe Yesu gyi. Korintofɔ ámu tsɔtsɔtsɔ é bohogyi, bóhɔ amú asú.

<sup>9</sup>Ɔke ɔku onyé á, Paulo lówun atɔ. Múts á, anɔ Wíe lébláa mu ɔbéé, “Mánya ifú. Yɔ músú afɔda asún ámu ɔkan wule. Mákpa ɔnɔ bun. <sup>10</sup>Tsúfé mía funyɔ ná. Ɔhaa méetalí bwé fú tɔtɔ. Mí ahá bɔtsɔ wúlu anɔfɔ.” <sup>11</sup>Mú su Paulo létsiá Korinto unu súná ahá ámu Bulu asún ofi ɔkule múa ifun.

<sup>12</sup>Bréá Galio létsiá Roma owíe otsiákpá, ɔde Griikifɔ ɔsaasí ɔmanti kúá butetí mú Akaiasu kú a, Yudafɔ ámu bɔbwe ɔnɔ-ɔkule, kítá Paulo, pú mu ya mu ansítɔ. <sup>13</sup>Bee, “Oyin ání dé ahá asukpan suná ɔbéé busúm Bulu tsɔn ɔkpa ání ɔkúkusú líí anɔ mbilasusu.”

<sup>14</sup>Paulo lénya bwíí ɔnɔ ɔbéé amutɔ aɔ Galio lébláa Yudafɔ ámu ɔbéé, “Ní tsitsa ntée lakpan ku oyin ání labwé á, tekɔ ɔbɔ aléá néyaa asu nú mli asún. <sup>15</sup>Táme ɔniá adá pú mli onutó mbla ɔbɔ asún ɔbɔ nwéen mlidégyí su á, mliyɔ amliyeblí mú. Mméegyí asún ání odu.” <sup>16</sup>Múú ɔleha begya amú lé asún ogyíkpá unu á. <sup>17</sup>Ahá ámu féé bowunáa kítá Sostene ání ogyi Yudafɔ ofiákpá unu ɔhande, dá mu unu. Táme Galio mótsu kuku lé mútɔ.



### Paulo Yinkí Yó Antiokia

18 Paulo létsiá ahógyipu amu wá Korinto yófun bré kv. Múú òlekla amú, mua Priskila pú Akwila benatí yó Kenkrea wúluto. Paulo lékpa mu nwun Kenkrea unu, púsúná ání alamó ntam kvá òleka òt. Múú botsu ntsusu-yibi pú bɔyó Siria òmátó á. 19 Bréá bowie Efeso wúluto á, Paulo lénatí sí Priskila mua Akwila, yó Yudafɔ ofiakpa, mua Yudafɔ ámu buɔe asúntó le há aba. 20 Bokokóli mu bæe, ɔtráa tsia amú wá kpalobí, omotsulá. 21 Táme bréá ɔɔɔɔɔlɔ yó á, òlebláa amú ɔbée, “Ní Bulu lótsulá á, néyinkí ba mli wá.” Inu olowie ntsusu-yibito tsú Efeso unu náti.

22 Bréá òlekplí Kaesarea a, ɔlɔɔv yó Yerusalem yéha ɔpasua ámu tsia. Múú oleyinkí kplí yó Antiokia a. 23 Oletsia Antiokia unu kpalobí. Mú ɔma a, ɔlenatí unu beki Galatia pú Frigia ɔsulósu, ɔɔe akasípú amu Bulu asún bláa, púwá amú ɔwunlín.

### Apolo Bulu Asún Ɔkanda Efeso Múa Korinto

24 Alɔ bré ámutɔ á, Yudayin ɔkvá butetí mu Apolo laba ɔbu Efeso wúluto. Bɔkwú mu Aleksandria, wúlu ání ibu Egipte ɔmátó. Oyin tɔí, oyin Bulu asun wanlínhé amu é wankláán. 25 Bosuná mu anɔ Wíe ɔkpa ámu. Mú su Yesu iwi ɔnɔkwali amu blí tɔhíé wá mu ansigyí. Táme Asú Ɔbɔpú Yohane \*asúɔ amu pé oyin. 26 Apolo ménya ifú. Ɔlɔwa klun súná ató Yudafɔ ofiakpa unu wankláán. Bréá Priskila mua Akwila bonu mu asun blíhé a, bekpa mu yáa wóyító yósuná mu Bulu ɔkpa ámu wankláán ðun alhá oyin yaí. 27 Bréá Apolo lɔbwe agywun ɔbée, ɔbɔyɔ Akaiia ɔsulósu á, ahógyipu amu bɔwa mu atɔtɔ-ɔnlun. Bɔwanlín ɔwulú sísí unu ahógyipu bæe, buhɔɔ mu wankláán. Bréá oloyówie unu á, ɔlehiɔ búa ahá ání una Bulu awitɔlesu bahɔ Yesu gyi. 28 Apolo mua Yudafɔ ámu begyi Bulu asun wanlínhé amu iwi nwéen, ɔlɔtɔí lé asúntó túmisu púgyi amúsú. Ɔlɔpu Bulu asun wanlínhé amu súná amú ání Yesu gyí Kristo, (ohá ámúú Bulu ladá mu ofúli amu).

## Paulo Bulu Asún Okanda Efeso

**19** <sup>1</sup>Bréá Apolo bu Korinto a, Paulo lódu yátsun ɔ́súsú awúlusu bedali tíi Efeso. Ɖlɔtu akasípú aku unu. <sup>2</sup>Múú ɔ́lɛfuté amú ɔ́béé, “Mlulénya Ɖɛ Wankíhé bréá mlulóhogyi?”

Bele mú ɔ́nɔ́ bɛɛ, “Anumókúnú kí ání Ɖɛ Wankíhé ku bu unu.”

<sup>3</sup>Paulo létrá futé amú ɔ́béé, “Asú mɔ́mu bɔ́bɔ mli?”

Bele mú ɔ́nɔ́ bɛɛ, “Yohane asú ámu bɔ́bɔ anu.”

<sup>4</sup>Paulo lébláa amú ɔ́béé, “Yohane lóɔ́ ahá ání badámlí kluntɔ́ asú. Ɖlebláa amú ɔ́béé buhɔ́ɔ́ ɔ́há ámúú obuo mu ɔ́bá ámusu gyi. Mugyí Yesu.”

<sup>5</sup>Bréá ahá ámu bonu asún ánfu á, bɛha bɔ́bɔ amú asú anu Wíe Yesu dátɔ́. <sup>6</sup>Mú ɔ́ma a, Paulo lópu ɪbɪ dínká amú nwnusu, Ɖɛ Wankíhé leba amúsú. Beblí ɔ́blí bábábá, blí Bulu ɔ́nɔ́ asún é. <sup>7</sup>Amú féé bóbwe ayin dúanyɔ́.

<sup>8</sup>Paulo lélatsiá yó Yudafɔ́ ofíakpa unu. Ɖlɔwa klun tóí lé asúntɔ́ súná amú tsra asa kéké. Omenya ifú, ménu bɔ́hɔ́ asún ámúú ɔ́deblí tsú Bulu iwíegyí ɪwɪ ámusu gyi. <sup>9</sup>Táme amú aku bɔ́wa kluntɔ́ odwin, bumɔ́hɔ́ mu asúnsú gyi. Bɔ́tɔ́ wɔ́ anu Wíe Ɖkpa ámúú Paulo dé amú súná ámu ahátɔ́ unu. Mú su Paulo lékpa akasípú amu náti, oletsíá súná amú ató oyin ɔ́kúá butetí mu Tirano ató ɔ́kasíkpa. <sup>10</sup>Paulo lósuná amú ató nfinyɔ́ kéké. Mú su Yudafɔ́ pú Griikifɔ́ ání bubu Asia ɔ́mátɔ́ féé bonu anu Wíe asún ámu.

## Skewa Abí Asún

<sup>11</sup>Bulu lótsun Paulosu bwé ofúla akpɔ́nkpɔ́ntɪ ku. <sup>12</sup>Ahá bɔ́kulá mu adúkubi pú mu ɪwɪsu ató yédunká alɔ́pusu, benya ɪlɔ́tsá, ɔ́ɛ laláhe é ledali ahátɔ́. <sup>13</sup>Yudafɔ́ aku é bubu nsiné unu bunu budeki gya \*ɔ́ɛ laláhe lé ahátɔ́. Bɔ́wa klun bɛɛ, bópu anu Wíe Yesu dá gya ɔ́ɛ laláhe lé ahátɔ́. Mú su bɔ́kplón wa ɔ́ɛ laláhe bɛɛ, “Dalí Yesu amúú Paulo dé mu ɪwɪ asún ɔ́kan da ámu dátɔ́.” <sup>14</sup>Igyí ahapú ɔ́handɛ ɔ́kúá butetí mu Skewa abi yinhé abasíénɔ́ létsiá bwé ínɪ.

<sup>15</sup>Ἐκε ɔ́ku ɔ́ɛ laláhe léfuté amú ɔ́béé, “Nyin Yesu, nabí Paulo, mli é mé, amendɪ mligyí?” <sup>16</sup>Ɖhá ámúú ɔ́ɛ laláhe bu

mutu ámu lótu wíé amútó, dá amú, títu amú atadie féé. Inu amú féé bɔpu amú yaya pú amú iwɪ nɔ sɪ dal wóyí ámutu. <sup>17</sup>Yudafɔ pú Griikifɔ́a bubu Efeso inu féé bonu asún ánti. Ifú lekítá amú. Mú su bɔpu obú há anɪ Wíe Yesu. <sup>18</sup>Ahá ámú bohogyi amutu tsɔtsɔtsɔ bele amú lakpan blí. <sup>19</sup>Amútó aku bugyi okó alepú. Botsu okó ámu nwulú ba bɔwa mú féé ogyá ahá ansító inu. Bobu amú nwulú ámu ibíá á, ulɔbwe sika futútú mpím-aduenu (50,000)<sup>e</sup>. <sup>20</sup>Ina anɪ Wíe Yesu túmisu mu asún ámu lenya ɔkpa kléi wankláán.

Gyu

### Demetrio Mva Mu Aba Ikwé Le Wá Efeso

<sup>21</sup>Asún ánti féé ɔma a, Bulu ɔɲé ámu léha Paulo lɔbwe agywun ání ɔbɔyɔ Makedonia pú Akaia ɔsulúsu, fówun ɔyɔ Yerusalem. Mú Paulo léblí ɔbéé, “Ní nowíé inu á, ilehián ání néyéki Roma wúluto é.” <sup>22</sup>Mú su ɔɔwa mu abvápu abanyó, bugyi Timoteo mua Erasto sísi Makedonia. Mu onutó olesi tsíá Asia ɔmátó kpalóbí.

<sup>23</sup>Alɪ bré ámutu á, anɪ Wíe ɔkpa ámú bude ahá suná ámu su asún kɔnkɔntɪ ku lɛda Efeso inu. <sup>24</sup>Oyin ɔkúá ɔɔbwe sika futútú ató, butetí mu Demetrio bu inu. Oyin ánti ɔpú sika futútú bwe ɔkpi yílé Artemi<sup>f</sup> ɔtswékpa akusubi ání ilehan mu ɔtswékpa yílé ámu fé. Mva mu aba agyúma ánti ayɔpú butenyá kɔba tsɔtsɔtsɔ tsú mótó. <sup>25</sup>ɔleti mu aba ámu pú ahá ání butɔbwe agyúma ámu odu fia. Mú ɔlebláa amú ɔbéé, “Mí apíó, mlyin ání agyúma ánti sù anɪ féé anlawá alé ní. <sup>26</sup>Yéé mlɔtsie mlidenu, mlidewúun tsá Paulo débwe? Alata ahá bláa ta Efeso wúluto pú Asia ɔmátó féé fía ɔbéé, ikpi ání ahá bapú ibi pwé bomegyí ɔɔɔ. Alata ahá ɔnó mlé tá, bude mu asúnsú hógyi. <sup>27</sup>Megyí anɪ agyúma wule ibéyintá. ɔhaa méétrá bu ɔkpi tsíhé Artemi ɔtswékpa yílé ámu. ɔkpi ámu dá é bófwɪ lé ɔyító. Táme tekɪ mogyí ɔkpiá ahá féé butɔtswe Asia ɔmátó pú ɔyító féé ní.”

<sup>e</sup> 19:19 Sika futútú mpím-aduenu (50,000) bɔbwe ɔbakóle ní lɔfakulɛ-advasa (130) ikɔká. <sup>f</sup> 19:24 Artemi gyí ɔkpi kɔnkɔntɪ ɔku dá.

<sup>28</sup>Bréá ɔɔɔm amu bonu asún ánfí á, benya ɔbló, súra okitikíti bɛɛ, “Ɔkpi kɔɔnkɔnti aní Efesofɔ ɔkpi Artemi gyí!” <sup>29</sup>Kpokiti léda wúlu amɔtɔ féé. Ahá ámu bekitá Paulo abúopu Gaio mua Aristarko ání botsú Makedonia srí pú amú ya wúlu ofiakpa. <sup>30</sup>Paulo onutó lékléá ɔbɔyɔ ofiakpa unu, ɔyɔtɔí kpla ɔɔɔm amu, táme akasípú amu bumeha mu ɔkpa. <sup>31</sup>Ɔmá ámɔtɔ ahande akɔɔnkɔnti akvá bugyi Paulo anyawíe é ɔɔwa obí lóyóbwií ipa há mu bɛɛ, ɔmáyo ofiakpa unu. <sup>32</sup>Kpokiti léda ofiakpa unu. Áni bɛɛ alí, aní é bɛɛ alí. Amútɔ ahá tsɔtsɔtsɔ bumebi tɔá svá befia unu. <sup>33</sup>Yudafɔ ámu aku ɔyɔ ofiakpa unu. Bowutá Aleksandro sísí ɔbuntɔ, bude mu asún ání ɔyéblí bláa. Ínu sv Aleksandro lótsu íbí fúá, ɔbée amule mu ɔnɔ. <sup>34</sup>Táme bréá bowun ání Yudayin ogyi á, belasúra okitikíti, blí asun kua kule dɔnhwírí anyɔ kéké bɛɛ “Ɔkpi kɔɔnkɔnti aní Efesofɔ ɔkpi Artemi gyí!”

<sup>35</sup>Ínu féé ɔma a, wúlu atɔ ɔwanlínú léha ɔɔɔm amu bekpá ɔnɔ bun. Múy ɔlebláa amú ɔbée, “Efesofɔ ayin, ma méyín ání Efeso nfi gyí aní ɔkpi kɔɔnkɔnti Artemi pú mu íbwi ámúb ɔlekpa tsú ɔsúsú ámu nwun? <sup>36</sup>Ɔhaa má unvá ɔbétalí gyí asún ánfí iwí nwéen? Mlunya klun, ménu mlumóoko mli. <sup>37</sup>Ahá ánfí mlilakpá ba nfi ánfítɔ ɔkuku mɔkúwí tɔtɔ tsú ɔtswékpa unu. Bumɔkúblí asvansu kúsú líí aní ɔkpi tsíhé Artemisv. <sup>38</sup>Táme ní Demetrio mua mu aba agyómá ayɔpú amu bɛɛ bubu ɔku iwí asún á, asún agyípú bubu unu, asún ogyíkpa é bu unu. Béталí pú asún ámu ya unu kpéblí mú. <sup>39</sup>Ní mlubu asun bambá ku tsía ínutɔ mú á, béталí yéblí mú ɔtíné ámúb aní féé anutefia gyi asún ámu. <sup>40</sup>Tsúfé ní anuméki wankláán á, abénya asún ání anlahaan wúlu amu agywun nde. Ní befité aní é á, anuménya asvansu púlé mú ɔnɔ.” <sup>41</sup>Olenya blí asún ánfí tá alí, ɔleha amú féé bedasáín.

### Paulo Yinkí Yó Makedonia Múa Griikifɔtɔ

**20** <sup>1</sup>Kpokiti amu ɔma a, Paulo léba beti akasípú amu féé fía, tóí kplá amú, wá amú atetɔ-ɔnlun. Ɔleklá amú asa ɔɔpɔ ɔkpa ɔyɔ Makedonia ɔsulúsu. <sup>2</sup>Oleki nsuné unu ɔpasua ámusv tóí kplá amú asa olobowie Griikifɔ ɔsulúsu.

<sup>3</sup>Oletsiá unu tsra asa. Bréá ɔlobwe agywun ɔbéé, méfa ɔpu yó Siria ɔsulúsu á, olowun ání Yudafo bude mu téé abukita mu. Mú su ɔlobwe agywun ɔbéé mélayótsun Makedonia ɔsulúsu. <sup>4</sup>Ahá ání bekpa mu ya unu gyí Beroiayin Sopater, ogyi Piro mu bi; Tesalonikafɔ Aristarko mva Sekundo pú Derbeyin Gai; amúa Timoteo pú Asiafo Tihiko mva Trofimo. <sup>5</sup>Alí ahá ání begyankpá yógyo aní Troa wúluto. <sup>6</sup>Israelfɔ begyi amú \*Bodobodo Mátúhé \*Nke ɔma a, anulétsiá ntsusu-yibitɔ tsú Filipi wúluto. Anulénatí nkená owítɔ. Eke núúsí a, anulóbtu nkpa agyápu amu Troa wúluto. Aní féé anulétsiá unu nkensiénɔ.

### Eutiko Tsinkí Tsú Lowuto

<sup>7</sup>Kwasieda, igyi ndawótswí ámutɔ eke gyankpapu ntúpwesu á, anuléfia abégyi atɔ abatɔ fé alí aní Wíe lósuná aní. Ínía Paulo dékléá ɔbénatí ɔyi kehe su á, ɔlɔtɔi kplá amú alu yéha ɔyínsiné. <sup>8</sup>Nkandíe tsɔtsɔtɔ bu ɔsúsú obu ámú anuléfia mútɔ ámutɔ. <sup>9</sup>Oyimbi ɔkúvá butetí mu Eutiko lódu bian nfánsrí ɔnɔ, ɔde asún ámu nu. Ínía Paulo lɔtɔi wá ɔpá su á, didí lowie mu, fúru mu. Dlekpa tsú ɔsúsú abansúru saasi nfánsrítɔ unu beda ɔsulúto. Bréá boyótsu mu a, alawú féé. <sup>10</sup>Mú Paulo lékplí yó unu, yémlí bun musu, látá mu pútá, blí ɔbéé, “Opúni mátsií mli, ɔhé bu mutɔ.” <sup>11</sup>Paulo léyinkí dɔ yó ɔsúsú unu, mva mu aba ámu nyɔ bebiabía bodobodo gyi. ɔlɔyɔ mu tɔi amusu alu yófun ɔyi kehe, ɔlenatí. <sup>12</sup>Mú ahá ámu békpa kebi ámu ya wóyí á. Ansí lehie gyi amú ání ɔbu nkpa.

### Paulo Troa Tsu Yó Mileto Wúluto

<sup>13</sup>Anulégyankpá yówie ntsusu-yibi ámutɔ ayó Aso wúluto yótsu Paulo unu. Tsúfé Paulo léha aní ibi ɔbéé, ɔbótsun ayabitɔ ɔkpa ká tíí unu. <sup>14</sup>Bréá ania munyɔ anuléyéfia aba Aso wúluto unu á, olowie ntsusu-yibi ámutɔ, anuléfa yó Mitilene wúluto. <sup>15</sup>Anulénatí unu ɔyi kehe, anulókusú unu yówie Kio. Eke nyɔɔsi a, anulókusú unu yówie Samo wúluto. Mú eke sáásí é á, anulétrá kusú unu yówie Mileto wúluto. <sup>16</sup>Paulo mékléá obéyintá bré

Asia ɔmátó. Mú su ɔmekplí Efeso wúluto, tsúfé ɔdekɔsí ání ní ɔbétalí á, obóyówie Yerusalem asa abugyi Pentekoste nke ámu.

### Paulo Efeso ɔpasua Ahande Klá

17Bréá anlóyowie Mileto wúluto á, Paulo lówa abí sísí Efeso ɔpasua ahande ɔbéé, bubá ɔɔtu mu. 18Bréá ahande amu bebefia mu a, ɔlebláa amú ɔbéé, “Mliyin alíá mía mliyno anlóputsiá tsú eke gyankpapo ání neba Asia ɔmátó. 19Mliyin alíá neba iwiasí yó agyómá há mí Wíe, pú alíá Yudafo ɔkɔsú líí mísú, nowun ipian, su kúrää. 20Mliyin ání mmɔpu asún ání ibékpa mli njáín mli bréá neda Bulu asún ámu ɔkan dunsu pú mli wóyító. 21Alíá ɔɔtói kplá Yudafo pú Griikifo féé mbéé, busii lakpan bwe abudamli ba Bulu wá, abubɔho aní Wíe Yesu gyi.

22“Séi ání á, ɔnyó Yerusalem, fé alíá ɔnye Wankíhé labláa mi. Mmeyín tóá ibéba misu unu. 23Táme móá ɔnye Wankíhé tebláa mí wúlugyiwúlusu, nyin gyí, asun wunhe pú obuda da gyo mí. 24Táme mmotsu mú asunbogya. Mboún alíá nómɔ agyómá ámúb aní Wíe Yesu léha mí ámu ɔnó. Agyómá ámu gyí, nébláa ahá Bulu awitɔle asun wankláán ámu.

25“Séi ání á, nyin ání mli ahá ání nebede Bulu iwíegyí iwí asún ɔkan mlito áníto ɔkuku méetrá wun mi ekekeke. 26Mú su nde mli bláa mbéé, ní mlito ɔku ménya nkpa ání utamatá á, megyí mí su omenya. 27Tsúfé nabláa mli tógyítóá Bulu déklé ɔbéé mlibí.

28“Mú su mliki mli iwí pú ahá ámúb ɔnye Wankíhé lópuwá mli ibito ámussu wankláán. Mlikpa Bulu ɔpasua ámúb ɔleyaí tsun mu onutó mu bi lowusu ámu wankláán. 29Nyin ání nenátí á, akvá bugyi fé nkpataku, bubu iyin béba bowie mlito, dá ɔpasua ámu sáín. 30Mlito aku óó ɔkɔsú, dámlí ɔɔkwali amu póbítia mlito aku buo iwí. 31Mú su mlida iwísu. Mlikain ání netsiá mli wá nfinisa sóón, pú ansí ntsú yíri iwí súná mli ató ɔpa onyé.

32“Mú su séi á, ndepu mli wá Bulu mu mu awitɔle asún ámutó. Mu awitɔle asún ámu iwá mli ɔwunlín, tha amlidan, talu lu kínkín, amlinya ató ámúb ɔlehie yáí há mu ahá ámúb


bamlí mu kle amu. <sup>33</sup>Bréá mbu mli wá á, mmeppe ansí zhaa sika pepe, mu sika futútú ntée mu atósú. <sup>34</sup>Mli onutó mlyin ání mí ibi anfi nɔpuyó agyómá nyá tóá ide mía mí aba ámu hián féé. <sup>35</sup>Natsun ɔkpagyíɔkpasu súná mli alíá mlópu ibi yó agyómá, púgyi ahá ání twi ma amú ɔnlun buale. Mlikain aní Wíe Yesu onutó asun blíhésu. ɔbée, ‘Bulu toyúlá zhá ání otekíé ató dun zhá ání butekíé mu.’ ”

<sup>36</sup>Bréá Paulo léblí asún ání tǎ á, mua amónyo féé beda akpawunu bó mpái. <sup>37</sup>Amú féé bosu bréá belatá aba pútá, klá aba. <sup>38</sup>Tóá ulɔwa amú ahumuti gyí mú ámúú ɔleblí ɔbée, mumétrá wun amú ekekekeke ámu. Besi mu ɔkpa yówie ɔpu ɔnó, olowie ntsusu-yibitɔ.

### Paulo Yerusalem Yo

**21** <sup>1</sup>Bréá anulégyí nkla tá á, anulówie ntsusu-yibitɔ, nátí laa yó Ko wúluto. Eke nyɔɔsi a, anulóyo Rodo. Tsú unu á, anuléba Patara osubúnɔ. <sup>2</sup>Anulénya ntsusu-yibi kuá yó Foinike osubúnɔ, anulówie mútɔ. <sup>3</sup>Bréá ayó á, anulówun ɔsulúv kuá butetí mú Kipro sísí. Anulési mú tswi bunasu ífón, tswi yó Siria ɔmátɔ. Anuléyekplí Tiro osubúnɔ, tsúfé unú béle ntsusu-yibi ámutɔ ató ní. <sup>4</sup>Anulótu akasípú aku unu, anulétsiá amú wá nkensiénó. ɔɲe Wankíhé léle súná amú ɔbée, Paulo máyo Yerusalem wúluto. <sup>5</sup>Ani nke lɔfon, anulótúá aní ɔkpasu. Bréá anidénatí á, akasípú amu, amú aká pú amú abí féé beyési aní ɔkpa alu yówie ɔpu ɔnó. Inu á, aní féé anuléda akpawunu bó mpái. <sup>6</sup>Anulégyí nkla, anulówie ntsusu-yibi ámutɔ pú ayó, amú é beyinkí yó wóyí.

<sup>7</sup>Aniléduká ɔpusu tsú Tiro alu bowie Ptolemai osubúnɔ. Bréá anulówie unu á, anuléyeha ahógyipu ání bubu unu itsiá, anulétsiá amú wá ekewúle. <sup>8</sup>ɔyi kehe a, anulókusu tsú unu ba Kaesarea osubúnɔ. Anulóyɔswuí Bulu asún ɔkan ɔdapú Filipino wóyí. Oyin ání gyí ahá abasiénó ámúú bele Yerusalem bee, butsáa ahande agyómá yó ámutɔ ɔkule. <sup>9</sup>Filipo bu abi tsihé abaná, bumɔkúyó ayin wá ki. Bulu ɔnósú atóipú mu abi tsihé ání bɔgyi. <sup>10</sup>Anulégyí nke kpalobí unu. Eke ɔku Bulu ɔnósú ɔtɔipú Agabo lótsu Yudea ɔmátɔ ba unu.



*Tiro otsubúnc ni. (Gyumagyihe 21:3)*

11 Olenya bowie laa alí olotsu Paulo osiéts ófé klí mu onutó ibi pú mu ayabi. Múú c̣leblí c̣béé, “Ŋhe Wankíhé c̣béé, ‘Alí Yudafoá bubu Yerusalem béklí c̣há ámús c̣bu ófé ánti, pú mu wá ahá ání bumegyí Yudafo ibuto ní.’ ”



12Bréá anulónu asún ánfí á, ania ahá ámúú bubu unu ámu fée anulókokóli Paulo aniaa omáyo Yerusalem. 13Inu Paulo léfuté aní obée, “Ntogyi sú mlidésú, mlilahá iwí lawú mí alí? Mí mú á, megyí klí ámúbé békiklí mī Yerusalem amu pé nalá iwí yáí há. Mboún nalá iwí yáí ání nówu aní Wíe Yesu su é.”

14Paulo onó lodon aní. Mú su anlési mu tóí wa. Múb anuléblí aniaa, “Ibá mótó alá aní Wíe déklé.”

15Inu oma a, anulókulá aní ató du yó Yerusalem. 16Ania Kaesareafó akasípú aku lóyo unu. Bekpa aní ya oyin okwá butetí mu Mnason wóyító bee, aswú mu wá. Akasípú agyankpapu amuto okule ogyi, otsú Kipro omátó.

### Paulo Yerusalem Wie

17Bréá anulówie Yerusalem unu á, ahógyipu amu boho aní atúu. 18Oyi kehe ania Paulonyo anuléyeki Yakobo. Opasua ahande amu fée beba unu. 19Paulo lówa amú onó, olebláa amú tógyítóá Bulu latsun musu bwé ahá ání bumegyí Yudafoto. 20Bréá bonu Paulo asún ánfí á, amú fée bekanfú Bulu. Múb bebláa mu bee, “Opíó nu, Yudafó mpím-mpím ání badámlí klvntó fée bude Mose mbla ámuto kínkíínkín. 21Táme aku babláa amú bee, fasúná Yudafó ání bubu omá bámbású fée fee, bumágyi Mose mbla ámusu. Oma é á, fee bumátin amú abí keté, bumágyi aní amándíé ésú. 22Ibwébwéébwé á, ahá bónu ání faba nfi. Nkálí abóbwe tsú mú iwí? 23Abébláa fu tóá fubwée. Ayin abaná akwá bubu anito baká ntam há Bulu. Ilehían ání bógyuráa iwí. 24Kpa amú ya, amlyogyuráa iwí. Ka amú ato yintáhé fée ikó, méni békpa amú nwun. Inu obéha ahá fée bébi ání futegyí Mose mbla ámusu. Inu su fú iwí asún ámúú bonu ámu uma mótó. 25Anilawánlín owulú sísí ahógyipwá bumegyí Yudafó dodo. Anilówanlín aniaa, anulablí ání bumágyi atogyiheá bapúhá ikpi. Bumágyi obugya pú obwíá bapúsa m. Bumáwa atsi múa ayin asún é.”

26Mú su bréá oyi leke a, Paulo lékpa ayin abaná ámu ya, musa amúnnyo boyygyuráa iwí. Ojyó Bulu otswékpa unu yéblí ekeá amú iwígyuráa amu iwómo onó, obéba boho afodíe há amútó okugyíoku.

### Paulo Kutá Bulu Ɔtswékpa

27Bréá nkeniénsú ámu íbá bɔfun a, Yudafo akvá botsú Asia ɔmátɔ bowun Paulo Bulu ɔtswékpa unv. Ɖɔɔm amú bubu wunsinésú unv ámu féé benya ɔbló Paulosu, bekítá mu. 28Bɔsurá okitikíti beɛ, “Israelfo ayin, mlɔdali ba oo! Oyin ámúú ɔna ɔde ahá atɔ suná, yíntá amú agywun ámu ni. Mudéksú líí ɔmá ánfí, Mose Mbla pú Bulu ɔtswékpa amvsu ní. Alakpá Griikifo kóráá ba Bulu ɔtswékpa wunsinésú nfi. Mú sv alapú ifin da ɔwankíkpa amv.” 29Bεblí mú alí, tsúfé bowun Efesoyin ɔkvá butetí mu Trofimo mva Paulo wúlu amvɔ dodo. Íni sv bukí beɛ Paulo lópu oyin ámu yáa Bulu ɔtswékpa unv.

30Wúlu amvɔ féé leda kpokiti. Ahá bedali tsu amú wóyítɔ srí ba bekítá Paulo, bebitía mu dáli ɔtswékpa wunsinésú unv, fin iban ámu. 31Bréá bude mu da, budekléá bómo mu a, ɔkv léyεbláa Romafɔ ísá akɔpú ɔhande ɔbéɛ, “Kpokiti ladá Yerusalem wúluto.” 32Inunv ɔhande amv lékpa ísá akɔpú ámu akv pú amú ahande akv besrí yó unv. Ɖɔɔm amv benya wun amú alí besi Paulo dá. 33Ɖhande amv lénatí yótv Paulo, ɔleha mu ísá akɔpú ámu bekítá mu, wá mu íkan anyɔ. Múv ɔléfité ahá ámu ɔbéɛ, “Ma gyí oyin ánfí? Ntv alabwé?” 34Ɖɔɔm amv bude okitikíti, budetɔtɔ. Akv beɛ alí, akv é beɛ alí. Okitikíti amv ɔnɔ lɔwa ɔnlun. Mú sv ɔhande amv mébu ɔnɔkwaltá íbu asún amvɔ. Íni sv ɔleha ɔbéɛ, bukpa Paulo ya ísá akɔpú ámu otsiákpá. 35Bréá bowie obu-ɔnɔ ɔɔvkpá á, ɔɔm amv bude íyin wa. Mú sv ísá akɔpú ámu botsu Paulo wá nkɔnkɔ. 36Ahá ámu féé bubuo Paulo, bude okitikíti beɛ, “Mliha awuna mo mu! Mliha awuna mo mu!”

### Paulo lwi Ɖnóle

37Bréá bowie obu ámu ɔnɔ, bóɔv wíé amú otsiákpá unv á, Paulo lébláa ɔhande amv ɔbéɛ, “Nobwíí ípa, mbláa fu asvanku.”

Ɖhande amv léfité mu ɔbéɛ, “Fotonú Griiki ɔblí? 38Mú sv megyí fúgyí Egypteyin amúú ɔleha kpokiti leda bré kuto,

ɔlekpa ahá amɔpú mpím-na (4,000) buo iwɪ ya \*dimbísú ámu ni?”

<sup>39</sup>ɪnu Paulo léle mú ɔnɔ ɔbéé, “Yudayin ngyi mí mú. Tarso ání ibu Kilikia ɔmátɔ bɔkwí mí. Megyi wúlubitɔ notsú. Nobwíí ipa, ha mí ambla ahá ánfɪ asún.”

<sup>40</sup>ɪsá akɔpú ɔhande amu léha mu ɔkpa. Mú su Paulo léyelí obu-ɔnɔ ɔɔvɔká nu, bwé ahá ámu ibi békasu. ɪnu lóto diin. Mú Paulo lébláa amú asún \*Hebri ɔblítɔ ɔbéé,

**22** <sup>1</sup>“Mí así, apíó aba, mlyaa asu mí anle mí ɔnɔ amlnu.” <sup>2</sup>Bréá bonu ání Hebri ɔblítɔ Paulo détoí á, nu loto diin. Mú Paulo lóyo mu asúnsú ɔbéé,

<sup>3</sup>“Yudayin ngyi. Tarso wúluto bɔkwí mí Kilikia ɔsulúsu, táme Yerusalem nfi beyaí mí. Gamaliel lósuná mí anɪ anáin mbla ámu wankláán. Nɔwa nsi Bulusúm iwɪ fé alíá mli é mlidé mu súm nde. <sup>4</sup>Ahá ání buna anɪ Wíe ɔkpa ánfɪsu á, nedunká amúsú. Nɔmɔ aku kúráá. Nekítá amótɔ atsi múa ayin aku, kíklɪ amú yótswɪ obu. <sup>5</sup>Bulu \*igyí ɔhapú dehen pú Yudafɔ asún agyípú amu féé bétalí gyi asún ánfɪ iwɪ adánsɪ. Amú wá nɔhɔ ɔwulú tsú pú neya apíó ání bubu Damasko wúluto, mí anyekítá alɪ ahá ámu wa amú ɪkan, pu amú ba Yerusalem, abubiti amú ɪsu.

### Paulo Klɔntɔdamlí lwɪ Asún Blí

(Gyumagyihe 9:1-19; 26:12-18)

<sup>6</sup>“Èkéá nɔpu ɔkpa nɔyɔ, neta Damasko wúluto wie tá, ɪbɔbwe fé ɔpa dóduanyɔto á, ɔsáwule pé, wankɪ kuá mú ɔnɔ ihíé bu ɔnlɪn, itsú ɔsúsú ɔwankí wúlí mísú. <sup>7</sup>Múá nówun a, nda ɔsulúto. ɪnu nonu ɔme kv. ɔme amu léfité mí ɔbéé, ‘Saulo, Saulo, ntogyi sù fɔdɪn mísú alɪ?’ <sup>8</sup>ɪnu nefité mbéé, ‘Fú ma ni, Owíé?’ Mú ɔme amu lébláa mi ɔbéé, ‘Mí Yesu, Nasaretyin ámuú fɔdɪn mísú amu ni.’ <sup>9</sup>Mí aba ámuú mía amúnyɔ aniná ámu bowun wankɪ amu, táme bumonu asún ání ɔme amu dé mí bláa. <sup>10</sup>Nefité mbéé, ‘Owíé, nto mbwéé?’ Anɪ Wíe lébláa mi ɔbéé, ‘Kusu, afuyɔ Damasko wúluto. Bébláa fu tógyítá Bulu lahá fú ɔbéé fubwéé.’ <sup>11</sup>Wankɪ amu ɔnɔ bu ɔnlɪn. Mú su mmetrá wun tɔto. ɪni su mí aba ámu lékítá mí ibi, kpá mí ya Damasko wúluto.

12“Oyin ɔkúá butetí mu Anania, otenyá Bulu ifú bu wúlu amuto. Otegyi Mose mbla ámusu wankláán. Mú su Yudafo ání bubu wúlu amuto féé butetí mu idayilé. 13Oyin ání léba belí mí ansító, bláa mi ɔbéé, ‘Opíó Saulo, bwii ansíbi afuku ató.’ Inunu mí ansíbi lobwií, nowun mu. 14Ɔlebláa mi ɔbéé, ‘Ani anáin Bulu ámu léle fú yái ɔbéé, fubébi mu apé, afubi mu Bi Yilé Ɔbwepó ámu, afonu mu ɔme. 15Tsúfé féba begyi mu iwí adánsie, bláa ahá féé asún ání fonu pú múá fowun. 16Nto futráa fuygo? Kusu kokoli ani Wíe, afuha abubo fú asú, ɔfwí fú lakpan féé le.’

### Paulo Bulu Asún Ɔkanda Ɔmátófo

17“Bréá neyinkí yó Yerusalem wúluto nde mpái bo Bulu ɔtswékpa inu á, nowun ató. 18Mútó á, nowun ani Wíe Yesu, ɔlebláa mí ɔbéé, ‘Wa ɔsa bwe, afudali Yerusalem nfi. Tsúfé bumɔɔho fú adánsie ání fégyi tsu mí iwí.’ 19Inu nebláa mu mbéé, ‘Mí Wíe, amó onutó buyin ání netsiá yó Yudafo ofiákpa yéktá ahá ání boho fu gyi, dá amú, wá amú obu. 20Buyin ání bréá boho fú ɔdansiyin Stefano a, mbu inu. Nelú amó ɔma mbéé bumɔɔ mu, nɔho ámu atadie kúráá kítá.’ 21Táme ani Wíe lébláa mi ɔbéé, ‘Nati, nówa fú foyo tsútsúútsú, ahá ání bumegyí Yudafo wá.’ ”

22Ahá tsɔtsɔɔtsɔ amu beya asu nú Paulo asun blíhé alu ɔotu bréá ɔleblí ɔbéé, Bulu lówa mu ahá ání bumegyí Yudafo wá. Inu ɔɔsɔrá okitikíti kúklúkúú, blí bee, “Mlile mu inu! lma aleá obétsiá ɔsulúu anfisú!” 23Inu ɔɔsɔrá okitikíti, nyá ɔbló wóí amó atadie tswi tsalífwí, kpá isi tswi wá afútó. 24Múú isá akɔpú ɔhande amu lébláa mu ahá ɔbéé, “Mlikpa Paulo, amlipɔ mu ya mli otsiákpá. Mlipiti mu ató ɔbli ɔnɔkwali, abi tóá svá ahá ámu bude okitikíti sɔrá mu nwunsu alí.” 25Bréá beklí Paulo tá, bee abuda mu a, ɔlefté isá ɔkɔpú ɔhande ɔkúá ɔlú mu wá ɔbéé, “Mbla leha ɔkpa ání mlipti Romainy oduá bumɔkúgyi mu asún, há mu ipón ató?”

26Bréá isá akɔpú ɔhande amu lónu asún ání á, ɔleyébláa mu ɔhande amu ɔbéé, “Fakle afuse wulu manta iwí. Saa Romainy oyin ámu gyí oo!”

27 Múú ÷hande amu léba Paulo wá, befité mu ÷béé, “Bla mi, lélé Romayin fugyi?”

Paulo lébláa mu ÷béé, “Romayin ngyi.”

28 Múú ÷hande amu lébláa mu ÷béé, “Mí mú á, ɩko kɩɩkɩɩntɩ neka asa nemlí Romayin.”

Táme Paulo lébláa mu ÷béé, “Mí mú á, Romayin onutónutó ngyi.”

29 ɩnɩnɩnɩ ahá á múú beɛ abufite Paulo asún ámu féé badásáín. Ifú lekítá ÷hande amu onutó ó, bréá ÷lebi ání Romayin Paulo gyí asa alahá bawá mu ɩkan.

Gyu

### Paulo Yudafɔ Asún Agyípú Ansító Lú

30 ɔyi kehe a, ÷hande amu lékléá ÷bébi t́á Paulo lóbwɛ, sù Yudafɔ buɛ asún kláa dɩnká musu. Mú su ÷leha bɔwɔ́ Paulo lé ɩkan amutɔ, ÷leha betɩ Bulu igyí ahapú dehen pú Yudafɔ asún agyípú amu befia. Múú ÷leha bekpa Paulo belí amó ansító.

**23** <sup>1</sup> Paulo lótsu ansí kɩ Yudafɔ asún agyípú amu díín. Múú ÷lebláa amó ÷béé, “Mí apíó Israelfɔ, nyin mí klɩntɔ ání mmɔkútsiá nkpa laláhe Bulu ansító bɔtu nde.” <sup>2</sup> Múú igyí ÷hapú dehen Anania lébláa ahá á múú bulí mantáa mu amu ÷béé, budáa mu ɩnósú. <sup>3</sup> ɩno Paulo lébláa mu ÷béé, “Fú Bulu ÷béda. Fabwé ɩwɩ fé buntíiá bakpá mú afá futútú, fabetsiá asɩ fɛɛ fɔpɩ Mose Mbla gyi mí asún. Fude ahá bláa fɛɛ budá mí ansító. Fú mú megyí mbla ámu fatón a?”

<sup>4</sup> Aha akvá bulí mantáa Paulo befité mu beɛ, “Bulu igyí ÷hapú dehen fudesia alɩ á?”

<sup>5</sup> Paulo lébláa amó ÷béé, “Mí apíó, mmeyín mbéé, mugyí Bulu igyí ÷hapú dehen. Tsúfé bɔwanlín wá Bulu asún ámutɔ beɛ, ‘Máblí ÷há ání ɔde fú ɩmású gyí ɩwɩ asun laláhe.’ ”

<sup>6</sup> Bréá Paulo lówun ání Yudafɔ asún agyípú amutɔ aku bugyi \*Sadukifɔ, aku é bugyi \*Farisifɔ á, ɔɩsɩrá okitikíti asún ogyíkpá ɩnu ÷béé, “Mí apíó, mí ánfɩ nɩlú á, Farisiyin ngyi. Mí anáin é á, Farisifɔ bugyi. Mí é nohogyi ání awupú bélakúsú. Mú ndeblí su bakpá mí ba asún ogyíkpá nfɩ ní.”

<sup>7</sup>Olenya blí alí pé, ahá tsotsɔtsɔ amutɔ leye anyɔ. Farisifo ámu pú Sadukifo ámu bɔwa aba nwéengyí bí. <sup>8</sup>Tsúfɛ Sadukifo buteblí bɛɛ, kusú tsú afúlɔtɔ kuku má unu. Bulu-abɔpu pú ɔɲe laláhe kuku é ma unu. Táme Farisifo mú bohogyi ání íni fɛé bu unu. <sup>9</sup>Íni léha nwéén amu ɔnɔ lehie wá ɔnlɔn. Mbla asunápúbá bɔgyi Farisifo bɔkusú líí blí bɛɛ, “Anumókúwun tsitsa kuku oyin ánfɔ iwɔ. Fíalɔ ɔɲé ku ntéé Bulu-ɔbɔpu ɔku lébláa mu.”

<sup>10</sup>Nwéén amu ɔnɔ lehie wa ɔnlɔn, ideklé imli ukó. Iwu usá akɔpú ɔhande amu lénya ifú ání bɔbwe títi Paulo. Mú su ɔlebláa usá akɔpú ámu ɔbéɛ, “Mliwa ɔsa kpa Paulo ya mli otsiákpá unu.”

<sup>11</sup>Mú onyé á, aní Wíe lébelú Paulo wá, bláa mu ɔbéɛ, “Wa klɔn! Alí ánfɔ fagyi mí iwɔ adánsɛ Yerusalem nfi á, alí kén fuyégyi mú Roma wúlutɔ é ní.”

### Paulo Mɔ Iwɔ Agywun Kítá

<sup>12</sup>Mú ɔyi kehe a, Yudafo ámu aku befia, kítá Paulo iwɔ agywun. Beka ntam bɛɛ ní bumókúmɔ Paulo buméegyí atɔ, bumóonu ntsu. <sup>13</sup>Ahá ámúbɔ beka ntam amu budɔn advana (40). <sup>14</sup>Bɔyɔ Bulu igyí ahapú dehen pú Yudafo ahande wá, yébláa amú bɛɛ, “Anilahíé ká ntam aníaa, ní anumókúmɔ Paulo anuméeda tɔtɔ ɔnɔ. <sup>15</sup>Mú su tɔ́a anidéklé aníaa fúa Yudafo asún agyípu amu mlibwéɛ ha aní gyí, mliki ansí wa abí sɔsɔ usá akɔpú ɔhande amu mliaa, ɔpú Paulo ba, amlɔlanu mu asúntɔ. Anɔladá iwɔsu aníaa, obótsutsúa obowie nfi anɔlamɔ mu.”

<sup>16</sup>Paulo mu bitepu ɔku lónu asún ánfɔ fɛé. Mú su ɔlesrí yó usá akɔpú otsiákpá unu yówi tsá Paulosu. <sup>17</sup>Iwu Paulo létɔ usá akɔpú ɔhande ɔku, bláa mu ɔbéɛ, “Kpa ɔyasubi ánfɔ ya mli ɔhande wá. Ɔde asvanku, ɔbébláa mu.” <sup>18</sup>Usá akɔpú ɔhande amu lékpa ɔyasubi ámu ya amú ɔhande wá, yébláa mu ɔbéɛ, “Obu ɔdɔpú Paulo ɔbéɛ, nkpa ɔyasubi ánfɔ ba fu. Ɔde asvanku, ɔbébláa fu.”

<sup>19</sup>Ɔhande amu lékúta ɔyasubi ámu ibi, kpá mu yáa utsétó yéfíté mu ɔbéɛ, “Amansu fubu ání fébláa mi?”

<sup>20</sup>Ɔyasubi ámu lébláa mu ɔ́bée, “Yudafɔ ahande babwé agywun bee bépina wa abí fú wá bee, fukpá Paulo ba obowun amú ɔ́ke, abolanu mu asún ámutɔ wankláán. <sup>21</sup>Táme máhɔ mǔsú gyi, tsúfé amú ayin ání budun advana (40) bee béɔaín ɔ́kpatɔ gyo Paulo, mǔ mu. Amú fée baká ntam bee, ɔ́tɔ méeda amú ɔ́nɔ́, kpéfɔn bréá bamó mu. Fú nkule bugyo séi ání fótulá kpá mu ba.”

<sup>22</sup>Mú ɔ́hande amu léda ɔ́yasubi ámu ɔ́lá ɔ́bée, “Máyébláa ɔ́haa fee fawí asún ánfɔ tsá mǔsú.” Olesi mu ɔ́kpa.

### Paulo Le Ya Kaesarea

<sup>23</sup>ɔ́nu ɔ́hande amu létɔ isá akɔ́pú ahande abanyɔ́, ɔ́lebláa amú ɔ́bée, “Mlile isá akɔ́pú lafanyɔ́ (200), mpɔ́nkɔ́su adunkápu aduesienɔ́ (70) pú pía atswípu lafanyɔ́ (200) abukusu onyeni dokwebátɔ́ yɔ́ Kaesarea. <sup>24</sup>Mliha Paulo mpɔ́nkɔ́, odunká amúsú yɔ́. Mlikpa mu, amliha mu oyowie ɔ́mású ogyípú Felike wá pisii.” <sup>25</sup>Ɔ́hande amu lówanlín ɔ́wulú mántá musu ɔ́bée,

<sup>26</sup>“Mí Klaudio Lisia dé ɔ́wulú ánfɔ wanlín sísí fú, ɔ́mású ogyípú onumnyampu Felike. Nde fú itsiá ha. <sup>27</sup>Nde fú ibi ha ání Yudafɔ lékitá oyin ánfɔ, budekléá bómu mu, táme mía isá akɔ́pú tsɔ́tsɔ́tsɔ́ anilóyɔ́hɔ́ mu lé amú ibi. Tsúfé nonu ání Romayin ogyi. <sup>28</sup>Ndeklé mbée, nébi t́á ɔ́ɔ́bwe. Mú su nɔ́pu mu ya amú Yudafɔ asún agyípú ansítɔ́. <sup>29</sup>ɔ́nu nowun ání amú mbla iwɔ́ nwéen budegýí. Mú su ɔ́mɔ́kúbwé lakpan kukvá bómu mu, ntée bówa mu obu. <sup>30</sup>Táme ɔ́ku laba bowi tsá mǔsú ɔ́bée, Yudafɔ ámu aku babwé agywun bee bómu mu. Inú ɔ́bwe agywun mbée, nópu mu sísí fú. Nabláa mu anyabá ámu é mbée bupúu amú asún ba fu. Nafun nfi. Nehá fú itsiá gyágyáágyá.”

<sup>31</sup>Isá akɔ́pú ámu ɔ́bwe dínká amú ɔ́hande asun blíhésu. Onyé-onyé ámu bekpa Paulo kɔ́nkɔ́nkɔ́n alu yówie Antipatri wúlutɔ́. <sup>32</sup>Bréá yí leke a, beha mpɔ́nkɔ́su adunkápu amu bekpa mu yáa Kaesarea, ayabitɔ́ anatípú amu beyinkí yɔ́ amú otsukpá. <sup>33</sup>Bréá mpɔ́nkɔ́su adunkápu amu boyówie unu a, ɔ́pu Paulo pú ɔ́wulú ámu wá ɔ́mású ogyípú amu ibtu.

<sup>34</sup>Ɖmású ogyípú amu lékla ɔwulú ámu, ɔlefíté Paulo ɔbéé, “Nkúnu yin fugyi?” Bréá ɔlebu ání Kilikia ɔmátó Paulo otsú á, <sup>35</sup>ɔlebláa Paulo ɔbéé, “Ní fú anyabá ámu bebá á, nónu fú ɔnó asún.” Inu ɔlebláa amú ɔbéé, buyú Paulo yɔwa Owíe \*Herode wóyító, abugyo mu iwí.

### Paulo Ɖnótun

**24** <sup>1</sup>Nkenú ɔma a, igyí ɔhapú dehen Anania muva Yudafó ahande aku pú Mose mbla ɔbipú ɔkuvá butetí mu Tertulo beba Kaesarea. Bebá bekla asún ání bubu tsu Paulo iwí súná ɔmású ogyípú Felike. <sup>2</sup>Beti Paulo belí. Mú Tetulo lékla mu asún ɔbéé,

“Onumnyampu Felike, fahá iwilwii laba ɔmá ánfító. Fú nyánsa lalá ató tsɔtsɔtsɔ bwé aní ɔmá ánfító. <sup>3</sup>Fú bwehé legyi aní ansí ɔtínegyíótíné. Fúdé ató bwe. <sup>4</sup>Mmedéklé mbéé néyintá fú bré tsɔtsɔ. Mú su nokókóli fu, nya klun ha aní, afunu aní asún tinbí ánfí. <sup>5</sup>Anilawun ání ató oyintápú oyin ánfí gyí. Ɖtéhá kpokiti tedá Yudafó ɔyító ɔtínegyíótínéá ɔtɔyó. Ɖtráa ogyí Nasaret ɔpasua ámu Bulu igyí ɔhapú. <sup>6-7</sup>Alakle ɔpu ifin da Bulu ɔtswékpa inu, asa ɔkláa ogyá anulékutá mu.<sup>8</sup> <sup>8</sup>Ní fú onutó fefíté mu a, fówun ání asún ánfí anudéblí tsú mu iwí ánfí féé bu mútótó ntée uma mútótó.” <sup>9</sup>Inu ámu féé botsulá músú beé, asún ámú alablí ámu bu mútótó.

### Paulo Ɖnóle Felike Ansító

<sup>10</sup>Ɖmású ogyípú Felike lóbwé Paulo ibi ɔbéé, ɔlé mu ɔnó. Inu Paulo léblí ɔbéé,

“Nyin ání fude asún gyí ɔmá ánfító ulawá ɔpá. Ínu su ibu mu ɔdwe ání néle mí ɔnó fú ansító. <sup>11</sup>Nobwíí ipa, fétalí fíté nú ání ibu mútótó ɔyɔ Yerusalem yósum Bulu, umɔkúɔnu nke dúanyɔ. <sup>12</sup>Mí anyabá ánfí bumowun mía ɔhaa agyi

<sup>8</sup>24:6b-8a Ínu bu nwulú dada amu akutɔ: *Anulɔbwe agywun ání abɔpu aní onutó mbla gyi mu asún. Táme isá akɔpú ɔhande Lisia lɔpu mu túmi bɔhɔ mu lé aní ibitɔ. Mú ɔma a, ɔlebláa aní ɔbéé, apó mu asún ba fu.*



nwéen Bulu ɔtswékpa unv. Bumowun mí anha kpokiti ida Yudafɔ ofiákpa kuku ntée ɔtinetine wúlu amvɔ. <sup>13</sup>Buma asvansvá bɔpɔgyi adánsie ání amú asún ánífu bu mótó. <sup>14</sup>Táme natsúlá ání ntosúm aní anáin Bulu tsun aní Wíe ɔkpa ámú bude mú ti ɔpasua laláhe amvsv. Nɔhɔ Mose Mbla ámu pú múbá Bulu ɔńsú atɔpú amv bɔwanlín tswi é féésú gyi. <sup>15</sup>Nde ɔkpa kú fé alá amú é bude ɔkpa kú ání Bulu ɔbókvsúa aha yilé pú aha laláhe féé tsú afúlitó eke kú. <sup>16</sup>Íni sv ntɔbɔ mbódí ání mí klun méetsiá há mí pón Bulu mva anyánkpusa féé ansító brégyíbré.

<sup>17</sup>“Íniá nedali Yerusalem ulawá ɔpá á, nayínkí ba unv, napú atokiehé nebá mí ahá abvsvha ahíánfɔ, mí anha Bulu igyí. <sup>18</sup>Mú ɔbwekpá mbv Bulu ɔtswékpa unv. Bréá nɔgyvráa iwí tá amándíé ámu ɔń á, beba bɔtv mí unv. Megyí mía ɔɔm kuku lɔyɔ unv. Kpokiti kuku é meda unv. <sup>19</sup>Yudafɔ aku botsu Asia ɔmátó ba bubv unv. Ní nɔbwe itɔ laláhe ku á, tekí amú kúrää ɔbéba bebláa fu, mía amúnɔy abéblí mú. <sup>20</sup>Ní íbɔwa alé kúrää á, ha ahá ánífu onutó abvblí tsitsa oduá Yudafɔ asún agyípú amv bowun mí iwí, bréá bɔpv mí ya amú ansító. <sup>21</sup>Asun kua kule péá nɔkplón blí bréá nlí Yudafɔ asún agyípú amv ansító gyí, ‘Mludé mí asún gyí nde, tsúfé nohogyi ání awupú bélakúsú tsú afúlitó.’ ”

<sup>22</sup>Íniá onumnyampv Felike yin aní Wíe ɔkpa ámu wankláán sv á, olotu asún ámu híé. ɔleblí ɔbéé, “Ní isá akɔpú ɔhande Lisia ɔbá nfi á, nówun alá nómɔ asún ámu ɔń.” <sup>23</sup>ɔlebláa isá akɔpú ɔhande ámu ɔbéé, ogyóo Paulo iwí wankláán, ɔha mu otsia iwílwíitɔ. ɔhá mu aba ɔkpa abuki musv.

### Paulo Felike Mva Mu Ka Drusila Ansító Lú

<sup>24</sup>Nke kpalobí ku ɔma a, Felike mva mu ka Drusila ání ogyi Yudayintse beba. Felike léha beyékpa Paulo ba, ɔbɔbɔtɔ tsú mu hógyi ání ɔbv Kristo Yesutɔ iwí súná amú. <sup>25</sup>Táme bréá ɔdetɔ tsú yilébwe, iwísvgyí pú Bulu asún ogyíké amú ɔbá ámu iwí á, ifú lekítá Felike. Mú sv ɔlebláa Paulo ɔbéé, “Ku yinki asa. Nenyá bré wankláán ku á, nélatí fú.” <sup>26</sup>Bré

ámuto fée Felike léki okpa ání Paulo obódunká toku beha mu onó. Mú su ibu nu bu unu á, alapina wa abí bayéti Paulo, mu munyo batóí.

<sup>27</sup>Nfinyo oma a, Felike lénatí. Porkio Festo lébetsiá mu obíasú. Íniá Felike déklé obée, mu asún iwá Yudafó ámu odwe su á, olesi Paulo wá obu náti.

### Paulo Roma Owie Okpa Wá Yo

**25** <sup>1</sup>Omású ogyípú Porkio Festo lébetsiá obíasú Kaesarea. Mú eke sáásí a, olodu yó Yerusalem. <sup>2</sup>Inu Bulu \*igyí ahapú dehen pú Yudafó ahande aku bopu Paulo wí asún yótswi mu ansító. <sup>3</sup>Bobwe agywun ání bójowa obúun okpató, mó Paulo. Mú su bójokulí Festo bee, opú Paulo ba Yerusalem. <sup>4</sup>Táme Festo lébláa amú obée, “Paulo da obu Kaesarea wúluto dodo. Imóowa opa mí é néyinkí yó unu. <sup>5</sup>Mliha mli ahande amu aku abubuo mi yo unu, abuyebli tsitsa oduá alabwé.”

<sup>6</sup>Festo létrá tsiá Yerusalem nkekwe ntée nke dú asa oleyinkí yó Kaesarea. Olowie unu á, olowa bójopu Paulo ba, oletsíá asún ámu su oyi kehe. <sup>7</sup>Paulo lénya wíe unu ali, ahande amú botsu Yerusalem ba amu bekafia mu, kla asún tsotsotsó dínká musu. Táme bumetalí nyá toto púsúná ání asún ámu ibu mútó. <sup>8</sup>Mú Paulo léle mu onó obée, “Mmókótún Yudafó mbla kuku, ntée bwé toku pú ifin da Bulu otswékpá amu ntée pú lalahe kuku é gyi Roma owie dehen.”

<sup>9</sup>Festo déklé obée mu asún iwá Yudafó ámu odwe. Mú su oléfuté Paulo obée, “Fudeklé fee fójyo Yerusalem, mí anyegyí fú asún unu?”

<sup>10</sup>Paulo léle mú onó obée, “Roma Owie Dehen asún ogyíkpá nli. Nfi ilehián ání bégyi mí asún. Fú onutó fuyin ání mmókúbwé Yudafó toto. <sup>11</sup>Ní natún mbla, ilehián lowu á, mmókútin okpa mbée bumámo mí. Táme ní asún anfi Yudafó bablí dínká mísú anfi ma mútó á, ohaa má okpa ání obópú mí wá amú ibito. Mú su mú bopú mí asún ya Roma Owie Dehen onutó ogyi mú.”

<sup>12</sup>Ἰνυ Festo mua mu ahande boyo abriwa wá. Múu ɔlebebláa Paulo ɔbé, “Fú onutó fée, Roma Owíe Dehen ogyí fú asún. Mú su abópu fú ya mu wá.”

### Festo Agripa Paulo Iwi Asún Bláa

<sup>13</sup>Nke ku ɔma a, Owíe Agripa mua Berenike beba Kaesarea. Bebá beha Festo nwunkpa. <sup>14</sup>Betsiá unu wá ɔpá. Mú su Festo lébláa amú Paulo Iwi asún. ɔbé, “Felike lówa oyin ɔku obu nfi, olesi mu wá náti. <sup>15</sup>Bréá ɔyo Yerusalem a, Bulu igyi ahapú dehen pú Yudafo ahande beba beblí asún tsɔtsɔtsɔ dínká musu, bláa mi bee nháa mu ipón, abumu mu. <sup>16</sup>Táme nebláa amú mbée, ‘Ima aní Romafɔ amándiétó aní béha ɔku ipón, nkéti mua mu anyabá bafia gyi asún.’ <sup>17</sup>Mú su ekeá mía Yudafo ámu anulóbowie Kaesarea nfi á, mmesi wá obiátú. ɔyi kehe kótóó neha boyo oyin ámu ba, netsiá asún ámusu. <sup>18</sup>Nki mbée mu anyabá ámu bénya tsitsa ku tsú mu Iwi, táme bumenya. <sup>19</sup>Mboún amú Bulusúm pú Yesu ɔkú alawú tsun, táme Paulo ɔbé, ɔtráa otsie nkpa Iwi asún budebutí. <sup>20</sup>Mú su mmowun aliá ɔyo asún ámutɔ. Nefité Paulo mbée, obótsulá abuyo Yerusalem, yégyi asún ámu unu. <sup>21</sup>Táme ɔleblí ɔbé, mudekléa mu asún iyú Roma Owíe Dehen ansítú. Mú su neha boya mu obu yófun bréa nópu mu sísi Roma Owíe Dehen.”

<sup>22</sup>Mú Agripa lébláa Festo ɔbé, “Mí é ndeklé mbée nónu asún ánti tsú mu onutó ɔntótú.” Festo lébláa mu ɔbé, “ɔke néha bópu mu ba, ɔbele asún ámutɔ suna fú.”

### Paulo Agripa Ansítú Lú

<sup>23</sup>ɔyi kehe a, Agripa mua Berenike behíhie Iwi, isá akɔpú pú wúlu ahande bobuo amú ba. Festo léha bekpa Paulo ba unu. <sup>24</sup>Mú ɔleblí ɔbé, “Owíe Agripa mua ahá aní bafia nfi féé, mlilawun oyin ánti ɔlú? Yudafo aní bubu nfi pú Yerusalem féé boya mu asún ba mi. Bee, mehián aní ɔbétrá tsiá nkpa. <sup>25</sup>Bréá ɔyo asún ámutɔ á, mmowun tóá alabwé su bómu mu. Táme mu onutó ɔbé, mpúu mu asún ya Roma Owíe Dehen. Mú su nabwé agywun mbée,

Gyu

néha bópu mu ya. <sup>26</sup>Táme mmowun tsitsa kuku mu iwí ání nówanlín mántá musu bópu mu ya. Mú sù nakpá mu ba mlí ansító ní, títriu fú Owíe Agripa. Ndekléá atéte asún ámutò, òtínéá ileyéyi a, mí anya asvanku wanlín sísí mu. <sup>27</sup>Tsúfè nawun ání uma aláá bópu obu òdipú sísí, bumòwanlín t́á alabwé mántá musu.”

### Paulo Iwí Onóle Agripa Ansító

**26** <sup>1</sup>Múú Owíe Agripa lébláa Paulo òbée, “Nahá fú òkpa, kusu le fú onó.” Paulo lótsu ibi fúá, lé mu onó òbée, <sup>2</sup>“Owíe Agripa, nawun ání òkláa lawá mí ogyá nlí fú ansító, nde mí onó le tsú asún ánfí Yudafo bakla dínká mísú anfi iwí. <sup>3</sup>Múá ibu ansigyí kúrää gyí, foyin Yudafo amándíé pú t́á butegyí mú iwí nwéen féé. Iní su kókoli, nya klón afonu mí onó.

<sup>4</sup>“Yudafo féé buyin mí tsiátó. Buyin aláá nòputsíá mí òmátó tsú mí nyebito pú aláá nòputsíá Yerusalem wúluto. <sup>5</sup>Amú féé buyin mi dodoodo. Ní budeklé a, amú onutó bétalí bláa fu ání Farisiyin ngiyi wankláán. \*Farisifo é butegyí Yudafo Bulusúm mbla ámusu wankláán òvn òpasua kugyíku. <sup>6</sup>T́á svá nde nlí nfi, fude mí asún gyí gyí, nde òkpa kú ání Bulu òbòbwe dínká mu asún ámúbú òleka mú iwí ntam há aní anáin amusu. <sup>7</sup>Aní abusuan dúanyò ámu féé bòpu ansí dínká ntam anfisú ání ibéba mótó há amú. Mú sù bude Bulu sùm ekekegyíeke ní. Nanáin, ntam anfi sù Yudafo bude asún kláa dínká mísú ni. <sup>8</sup>Ntogyi sù mlí Yudafo ánfí mú mlímétálí hógyi ání Bulu òbétalí kúsúa ahá tsú afúlitò?

<sup>9</sup>“Teki mí óó nohogyiá nóbwe tógyít́á nétalí pótin Yesu Nasaretyin amu gyumagyihe òkpa. <sup>10</sup>Iní gyí t́á nóbwe Yerusalem ni. Bulu igyí ahapú dehen amu beha mí túmi bee, nkíta Bulu ahá ámu tswi obu. Ní bómò amú é á, mí é ntotsúlá mbée bumóó amú. <sup>11</sup>Netsiá yó Yudafo ofiákpa kugyíkuò, ntehá butekítá amú, bíti amú isu, híé amú buteblí Yesu iwí abususu. Amú iwí òbló su ntedínká amúsú yó òmá bámbású yékítá amú, bíti amú isu.

### Paulo Uklontodamlí lwi Asón

(Gyumagyihe 9:1-19; 22:6-16)

12“Mú ɔkpa eke ɔku Bulu igyí ahapú dehen amu beha mí nɔyɔ Damasko wúluto yɔbwe ní. 13Bréá nna ɔkpatɔ nɔyɔ á, Nanáin, ibwe fé ɔpa dóúanyɔtɔ, wanki ku lɔwankí tsú ɔsúsú wólí mísú. Uɔwankí dun owí. Uɔwankí wólí mía mí aba ámúú aniná ámusu. 14Inu aní fée anilédida. Nonu ɔme ku \*Hebri ɔblító ɔbéé, ‘Saulo, Saulo, ntogyi sù fúdin mísú alí? lwi tóí fudewa.’ 15Múú nefité mbée, ‘Owíé, fú ma ní?’ Múú aní Wíe lébláa mí ɔbéé, ‘Mí Yesu ní. Mísú fúdin ní. 16Nabele lwi ɔwan súná fú, méni fɔbwe mí osúmpú. Kusu, afuyébláa ahá tɔá fawun tsu mí lwi nde, pú múá néle súná fú. 17Nóko ho fu tsú ahá ámúú nde fú wa sísí, bugyi fú onutó ahá Yudafo pú amúá bumegyí Yudafo ibitɔ. 18Fóbwií amú ansí, bédali tsu oklúntɔ ba wankitɔ. Féle amú tsú \*Satan túmi así ba Bulu wá, méni obési amú lakpan kíé amú, fówun bénya otsiákpá ahá ámúú Bulu latsun amú hógyisu bwé amú mu ahá amutɔ.’

### Paulo Gyumagyihe lwi Asón

19“Nanáin Agripa, íni su nɔbwe dínká ató ámúú nowun itsú ɔsúsú ámusu. 20Gyankpapu a, nɔyɔ Damasko wúluto. Mú ɔma a, nɔyɔ Yerusalem pú Yudea ɔmátɔ fée. Nɔyɔ ahá ámúú bumegyí Yudafo ámu é wá. Neyébláa amú mbée, busii lakpan bwe, abudamli ba Bulu wá, abutsia tsiátɔ ání ilosuná ání badámlí klntɔ. 21Iní sù Yudafo ámu bekitá mí bréá mbu Bulu ɔtswékpa unu beé bómo mí ní. 22Táme Bulu dé mí kpa alu bɔfun nde. Mú sù nlí nfi nde, nde mli nyebí-ahande fée tɔá nawun bláa ní. Asón ání Mose mua Bulu ɔnɔsú atɔɔpú amu beblí beé ibéba mútɔ kén ndeblí. 23Beé, ‘Ilehián ání Kristo, (ɔhá ámúú Bulu ladá mu ofúli amu) obówun iwɔsun wú, méni ɔbɔbwe ɔha gyankpapu ání ɔbɔkusu tsú afúlitɔ. ɔbɔpu wanki ba Yudafo pú ahá ání bumegyí Yudafo é.’ ”

24Bréá Paulo léblí íni á, ɔmású ogyípú Festo lɔkplun wa Paulo ɔbéé, “Paulo, fú nwun layíntá! Fú ɔwulóbi dubidubi amu lahá fude gbedé lo.”

<sup>25</sup>Múú Paulo lébláa mu ɔ́bée, “Onumnyampv Festo, mmedé gbedé ɔ. Ɖɔɔkwali onutónutó nde mli bláa. <sup>26</sup>Nanáin Agripa yin asún ánfí fée iwɪ. Nétalí bláa mu faan. Nahogyi ání megyí asun ɣaínhé igyi há mu, tsúfée bumɔ́bwe mú ɣáín. <sup>27</sup>Nanáin Agripa, fɔhɔ Bulu ɔ́ɔ́sú atɔ́pú asun wanlínhé amusu gyi? Nyin ání fɔhɔ músú gyí.”

<sup>28</sup>ɪnu Owíe Agripa lébláa Paulo ɔ́bée, “Fahogyi fée fétalí dámlí mí bwé Okristoyin bré tinbí ánfíto?”

<sup>29</sup>Paulo lébláa mu ɔ́bée, “Bré tinbí o, bré tsɔtsɔtsɔ o, mí mpái ání ndeɔ́ há Bulu gyí, fúá ahá ánfí mlidé mí asun blíhé nu nde ánfí fée mléba ɔ́ɔ́bwe fé mí. Táme bumáwa mli tkan anfi mú.”

<sup>30</sup>ɪnu á, Owíe Agripa mua ɔ́mású ogyípú Festo pú Berenike mua ahá ámúbú butsie unv ámu fée ɔ́ɔ́kúsú dáli. <sup>31</sup>Beyéluú itsétó, amú wulewule budeblí bee, “Oyin ánfí mókúbwé tɔ́ɔ́á ilehián ha mu lowu ntée mu obuwa.” <sup>32</sup>Múú Owíe Agripa lébláa Festo ɔ́bée, “Teki ní oyin ánfí méblí ɔ́bée, Roma owíe dehen kóún ogyíi mu asún á, teki fétalí sí mu.”

### Paulo Puya Roma Wúluto

**27** <sup>1</sup>Bréá beblí alí tá á, bekitá agywun bee, abótsun ɔ́pusu yó Italia ɔ́mátó. Ɖɔ́pɔ Paulo mua obu adípú aku é wá Romafɔ́ isá akɔ́pú ɔ́hande ɔ́kúá butetí mu Yulio ɪbitɔ. Ɖhande anfi bu Roma Owíe Dehen Augusto isá akɔ́pú ɔ́pasuato. <sup>2</sup>Anlówie ntsusu-yibi kúá itsú Adramitio fún, iyó ɔ́pɔ ɔ́nó awúluá ɪbu Asia ɔ́mátó. Makedoniayin Aristarko, otsú Tesalonika amu é bu anitɔ. <sup>3</sup>Ɖyi kehe a, anléluú Sidon ɔ́pɔ ɔ́nó. Isá akɔ́pú ɔ́hande Yulio lówun Paulo nwe, ɔ́leha mu ɔ́ɔ́yɔ́ mu aba wá, méni béha mu atóá ibéhián mu. <sup>4</sup>Anlókúsú tsú unv, afú lefia aní ɔ́pɔ amusu. Múú anlóyɔ́tsun Kipro ɔ́sulúv awunso fún, tsúfée afú ámu medétsúvun unv mú. <sup>5</sup>Anlótsun ɔ́pusu yótsun Kilikia pú Pamfilia fónsú yówie Likia ɔ́sulúv, Mira wúluto. <sup>6</sup>Isá akɔ́pú ɔ́hande amu lówun ntsusu-yibi kúá itsú Aleksandria wúluto iyó Italia ɔ́mátó, ɔ́lele aní wá mútó.

<sup>7</sup>Anidín ɔpu amusu putɔɔ. Mú su anilégyí nke tsɔtsɔtsɔ ɔkpatɔ. Ilepian aní asa anulówie Knido. Afú ámu méha aní ɔkpa. Mú su anulópu yótsun mantáa Kreta ɔmá. Inu á, anulópukplí tsun Salmone wúlu ɔsaasí fún. Tsúfé afú medétsún inu mú. <sup>8</sup>Íniá anulótsun ɔpu ɔnɔ-ɔnɔ kúrää ó á, ilepian aní asa anulóbowie ɔtunekvá butetí inu “Osubúno Wankláán,” ibu mantáa Lasea wúluto.

<sup>9</sup>Nke tsɔtsɔtsɔ lóɔtsun, nkeá butɔpúkí ɔnɔ kúlí lakpansikíé é ulɔtsun. Nke ámutɔ é á, ɔpu amu ideda. Mú su músú tsun lɔwa ifú. Íni su Paulo lótsí kplá amú ɔbéé, <sup>10</sup>“Mí awié, nawun ání ní anuméki wankláán aní ɔkpa ání natít a, abóhulú ató tsɔtsɔtsɔ. Megyí ató pú ntsusu-yibi ámu wule, aní onutónutó é abésin mútɔ.” <sup>11</sup>Táme isá akɔpú ɔhande amu lóhɔ ntsusu-yibi ámutɔ ɔhande pú mu wie asún sí Paulo. <sup>12</sup>Íniá osubúnɔ inu uma aleá abétsiá inu nyankputswiébi su á, amútɔ ahá tsɔtsɔtsɔ beblí beé abénatí inu. Amú ansí dún ání abóyówie Foinike, igyi Kreta osubúnɔ, ibu owí ɔkplíwíékpá fún, tsíá inu nyankputswiébi amu.

### Atsufú Kpɔnkpɔntí ɔpusu Tsúbun

<sup>13</sup>Inu afú kuá itsú gyɔpɔsu lówa tsúbun brevu bi. Íni su ahá ámutɔ akv bosusúu ání amú agywun ámu békanáa. Mu su belatsú símpiá utehá ntsusu-yibi telíí tsukole wá ntsusu-yibi ámutɔ, ɔɔputsun Kreta ɔpu ɔnɔ-ɔnɔ. <sup>14</sup>Táme umɔwa ɔpá kuku afú kpɔnkpɔntí kv lókusú tsú Kreta ifúnsú. Afú ámu dá gyí “Binasu-owí-ɔdalíkpa-afú.” <sup>15</sup>Afú ámu lébefia aní. Íniá anumétalí sánkíá ntsusu-yibi ámu su á, anulési iwí há afú ámu, ulɔpu ntsusu-yibi ámu náti. <sup>16</sup>Ulɔpu mú srí yótsun mantáa ɔpu nsuné ɔsulúv kuá butetí mú Kauda asi. Ulɔwa ɔnlun asa betalí tsú ɔklunbi ámúv butɔpólé ahá ání bude ntsu wie, isian ntsusu-yibi ámu ɔma amu wá yibi ámutɔ. <sup>17</sup>Inu ntsusu-yibi ámutɔ agyómá ayɔpú bebitía ɔklunbi ámu wá ntsusu-yibi ámutɔ. ɔɔpu ɔfé klí ntsusu-yibi ámu kínkíínkín, méní uméemaín. Benya ifú beé afú ámu íbótsvan ntsusu-yibi ámu yówie Libia osubúnɔ osublúv. Mú su bele tati ání isian ntsusu-yibi ámusu, méní ntsusu-yibi ámu bénatí putɔɔ.

Gyu

Mú óó á, afú ámu lótsvan ntsusu-yibi ámu náttí ɔwunlínsú. <sup>18</sup>Mú ɔyi kehe a, afú ámu ɔnɔ lehié wá ɔnlun. Mú su bɔwa amú atɔ svráhé le wá ɔputɔ bi. <sup>19</sup>Ɔke sáásí a, bele ntsusu-yibi ámu iwɪ ntobí kugyíkúá amú ibi léda wá ɔpu amutɔ. <sup>20</sup>Anitráa anumédé owí múa ntsrakpabi wúun nke tsɔtsɔtsɔ, afú ámu ɔnɔ é utráa bu ɔnlun. Mú su anɪ ansí metrá dinká tɔtɔsu dun lowu.

<sup>21</sup>Nke tsɔtsɔtsɔ lɔtsun, ahá ámu butráa bumédé atɔ gyí. Inu Paulo lókúsú líí amú féé ansítɔ, bláa amú ɔbéé, “Mí awié, tekɪ ní mlílónu mí ɔme, anuménatí Kreta otsubúnɔ a, tekɪ anumókú befiá ipian, húli anɪ atɔ ali. <sup>22</sup>Táme séi á, mbláa mlɪ amlɪnu. Mliwa klun, tsúfé anutɔ ɔkuku móowu, ntsusu-yibi ánfɪ wule obéyintá. <sup>23</sup>Ígye onyé á, mí Buluá ntosúm lówa mu ɔbɔpu mí wá. <sup>24</sup>Ɔlebláa mi ɔbéé, ‘Paulo, mánya ifú. lbwébwéébwé á, féli Roma Owie Dehen ansítɔ. Bulu lawá awitɔle há fú. Mú su alahɔ ahá ánfɪ fúa amúnyc mlíná ánfɪ féé nkpa.’ <sup>25</sup>Mú su mí awié, mlɪnya klun, tsúfé mí ansí dun ání Bulu ɔbéha íbéba mútɔ fé alíá mu ɔbɔpu labelbláa mi. <sup>26</sup>Táme lbwébwéébwé á, afú ámu íbéda anɪ ya ɔpu nsiné ɔsulúv kusu.”

<sup>27</sup>Ɔke dúanasɪ onyé á, afú ámu bu músú ide anɪda yáa nsiné inu ɔpuá bútetí mú Adriasu. Mú ɔyínsiné á, ntsusu-yibi ámutɔ agyúmá ayɔpú bosusúu ání anlatá ɔsulúv tu tá. <sup>28</sup>Mú su ɔpu ɔfé kápú ɔpu amu oklú kɪ. Benya ayabi lafakule advanyɔ (120). Bré kpalobí ɔma betrá kapú mú kɪ a, benya ayabi adukwebá (90). <sup>29</sup>Ifú lekítá ntsusu-yibitɔ agyúmá ayɔpú ámu ání abódu abutású. Mú su beda asímpi ání butɔpókítá ntsusu-yibi líí ana kéké síán mú ɔma, sí mú wá ɔpu amutɔ. Bokokóli Bulu beé ɔyí ikée amú. <sup>30</sup>Agyúmá ayɔpú amu aku bekleá bésrí dalɪ ntsusu-yibi ámutɔ. Mú su beki ansí lé ɔklun kusubi ámu dínká ɔpu amusu híéé, fé símpi ámu budepusíán ɔklun ámu ɔnɔsú. <sup>31</sup>Táme Paulo lébláa ísá akɔpú ámu pú amú ɔhande ɔbéé, “Ní ntsusu-yibi ámutɔ agyúmá ayɔpú bumetsiá mútɔ á, mluméenya nkpa.” <sup>32</sup>Mú su ísá akɔpú amu beka ɔklun kusubi ámu ɔfé tun, há afú lɔtsvan mú náttí.



<sup>33</sup>Ɔyí íbá beke a, Paulo lóbwíí ipa há amú fée ɔbée, bugyí ató. Ɖleblí ɔbée, “Kwasieda anyo sósón ní, atogyihe medínká mli ɔwólí. Mlumókúgyi tɔtɔtɔ. <sup>34</sup>Nobwíí ipa há mli, mli gyi ató ngya, méni mli mómóowu. Mli tɔ ɔkuku nwunsu-imi kule kúrání mósɔfwí.” <sup>35</sup>Paulo lótwí tá á, ɔlele bodobodo ipín, dá Bulu ipán amú fée ansító, ɔlemaín ku wá gyí bi. <sup>36</sup>lnu anto okugyíɔku lówa klun gyi ató. <sup>37</sup>Ani ahá lafanyo aduesienósie (276) bu ntsusu-yibi ámutó. <sup>38</sup>Bréá amú fée begyi ató alíá bétalí á, bele ayó amú ɔbu ntsusu-yibi ámutó ámu fée wá ɔputó, há ntsusu-yibi ámu leta odwin.

### Ntsusu-yibi Ámu Bwiebwie

<sup>39</sup>Bréá ɔyí deké a, agyómá ayɔpú ámu bowun ání ɔpu amu bámbi lowie ɔsolúu kusu, táme bumebi otsubúno odúá igyi. lnu bɔbwe agywun bee békan ntsusu-yibi ámu ya unu. <sup>40</sup>Mú su bekakáa símpí ámu tintun wa ɔputó. Besankí ntsusu-yibi ámu mpai é. Múú botsu tati yílé amú isian ntsusu-yibi ámu ansító ámu fúá, fía afú ámu, bɔpu bɔyó ɔpu ɔnó. <sup>41</sup>Táme ntsusu-yibi ámu lɔyódu ɣesusu, sin unu, ɔpu amu leda wólí ɔklun amu ɔma máín-máín mú.

<sup>42</sup>Isá akɔpú ámu bɔbwe agywun bee bómo obu adípú ámu fée, méni ɔkuku méepití dali, srí. <sup>43</sup>Táme amú ɔhande léklé ání ɔbóhɔ Paulo nkpa. Mú su ɔmeha amú ɔkpa ání bumóɔ obu adípú ámu. Táme ɔlebláa amú ɔbée, ɔhagyíɔha ání ɔbétalí á, otúu wie ɔpu amutó, ɔputí dali. <sup>44</sup>Ɖma a, ɔleha atráhe amu é bɔdu dínká ntsusu-yibi ámu afunsu yówie ogbémgbesu. Amú fée begyi mbala ámusu, bɔyó ogbémgbesu unu.

### Malta Wúluto Asún

**28** <sup>1</sup>Ani fée aniléɔnká ogbémgbé amusu. Ɖma asa anilébi ání ɔpu nsiné ɔsolúu kuá butetí mú Malta ni. <sup>2</sup>Nyankpu détswíe, su atsalí bu unu. Táme unu atsiápú amu begyi ani buale dúdá ogyá ɔpu ɔnó unu há ani, ani fée anilétsiá mú asi. <sup>3</sup>Paulo lékpa ngayibí ɔbée amupowa ogyá ámutó. Saa ube bu mútó. Ogyá ámu okunkúu su ube ámu lótswi yi Paulo ɔbieweto. <sup>4</sup>Bréá unu atsiápú amu bowun ání

iwɔ ámu yí mu a, bebláa aba bee, “Ahá ɔmɔpú oyin ánfí gyí. lbu mótó ání aladálí ɔpu amutɔ, táme aní ɔkpi ámúú ɔtebíí ísu ámu médekle ɔbée otsía nkpa.” <sup>5</sup>lnu Paulo lówunáa ibi, iwɔ ámu lékpa wíe ogyá, táme tɔtɔ móbwe Paulo. <sup>6</sup>Amú fée besi bulí budekú. Buki bee Paulo obópunya, ntée ɔbétin wu. Táme bréá belí wá ɔpá tɔtɔ méba a, beladámí amú agywun bí bee, “ɔkpi ɔku ɔhá ánfí gyí.”

<sup>7</sup>ɔhande ɔku bu ɔsulúv ku ɔpu nsiné unv. Mu dá gyí Publio. ɔlɔhɔ aní atúu, kpá aní ya mu wóyító, anulétsiá mu wá nkensá kéké. <sup>8</sup>Ali bré ámutɔ á, owísó lakítá ɔhande amu mu si, mu iwɔtɔ latú; ɔda. Paulo léyeki mu, ɔlɔpu ibi dínká musu bó mpái há mu, iwí lɔwa mu ɔnlun. <sup>9</sup>Mú ɔma a, bɔpu alɔpá bubu ɔsulúv amusu fée ba, Paulo létsa amú ulɔ. <sup>10</sup>Anulétsiá unv tsra asa, unvɔ ámu bɔwa aní numnyam, kíe aní ató tsɔtsɔtɔ. Bréá anidénatí á, bɔpu atóá ibéhián aní ɔkpatɔ fée sí aní ɔkpa.

### Roma Wúluto Yɔ

<sup>11</sup>Anilóyɔ ɔpu ɔnɔ yótsu ntsusu-yibi kuá ulatsiá unv nyankputswíebi amu fée. Itsú Aleksandria wúluto. Besré atabí akvá bugyi ikpi yi ntsusu-yibi ámu ansító. <sup>12</sup>Anuléyelí ɔpu nsiné ɔsulúv ku osubúnɔ, butetí mú Sirakus, anulétsiá unv nkensá. <sup>13</sup>Tsú unv á, anilóbomlí tsun bowie wúlu yíle kuá butetí mú Regiosu. Mú ɔyi kehe a, afú ku lówa tsóun bí tsu ayasi fún. Nkenyó ɔma a, anilóyowie osubúnɔ kuá butetí mú Puteoli. <sup>14</sup>Anuléfia ahógyipu aku unv. Bokokóli aní bee, atsía amú wá nkensiénó. Anilókusú tsú unv á, anilóyɔ Roma wúluto. <sup>15</sup>Apíó ání bubu Roma wúluto bonu ání abá. Mú su amótó aku beba ibiá ogyíkpá, butetí unv Apia. Aku é beba ɔtnekvá butetí unv Afɔ́ ɔswúkpá Asa, ibu ɔkpatɔ befia aní. Bréá Paulo lówun amú á, mu ansí legyi, ɔleda Bulu ipán.

### Bulu Asón ɔkanda Roma Wúluto

<sup>16</sup>Bréá anilóyowie Roma wúluto á, Roma aban léha Paulo ɔkpa ání ɔbétalí yétsiá ɔtínéá odeklé, táme isá ɔkɔpú ɔku obógyo mu iwí brégyíbré.

17 Eke sáásí a, Paulo létí Yudafo ahandeá bubu unu fée fia. Múú òlebláa amú òbée, “Mí apíó, ibu mótóá mmọ́pọ́ lalahe kukubku gyi mí ọ́mátófọ́, mmeyintá aní anáin amándíé kuku é. Táme aní ahande ání bubu Yerusalem bekítá mí ya Romafo. 18 Bọ́yọ́ mí asúntó á, teki bekleá bési mí, tsúfẹ́ bomowun tsitsa kuku mí iwí asa bẹe bumóó mí. 19 Táme Yudafo ámu bumotsulá ání busíi mí. Amú bwehé su nọ́kúlí ọ́kpa mbée, Roma Owíe Dehen onutó ogyíi mí asún. Megyí bẹe mbu mí ọ́má iwí asvansu. 20 Mú su natí mlí fia ní. Tsúfẹ́ ọ́há ámúú Israelfọ́ buđe mu ọ́kpa kí amu sù nda íkan anfitọ́.”

21 Amú é bebláa Paulo bẹe, “Anímókúhọ́ ọ́wulú kuku tsú Yudea ọ́mátó tsú fú iwí. Aní apíó Yudafo ámutọ́ ọ́kuku é mókútsú unu bebláa aní asun laláhe kuku tsú fú iwí. 22 Táme ha aní abí fú agywun. Tsúfẹ́ anyin ání ahá buteblí asun laláhe tsú Bulusúm ọ́pasua ánfí fúbu mótó ánfí iwí ọ́tíngyíótíné.”

23 Mú su mva Yudafo ámu behie ekeá béfia. Eke ámu lófún a, Yudafo tsọ́tsọ́wtsọ́ beba befia Paulo wóyí unu. Paulo lítóí kplá amú. Ọ́lọ́pọ́ Mose Mbla pú Bulu ọ́nósú atọ́ípú amu asun wanlínhé lé Bulu iwíegyi ámu iwí asúntó súná amú tsú nyanki pọ́n owí. Ọ́lọ́bọ́ mbódí ání ọ́bédamlí amú abuhọ́ Yesu Kristo iwí asún ámusu gyi. 24 Amótó aku bohogyi, táme aku bumohogyi. 25 Amú wulewule amu ọ́nó mọ́bwe kule, bọ́wa asún ámu príi bí. Táme Paulo létrá bláa amú asun kua kule asa bedasáin. Ọ́lebláa amú òbée, “Ọ́jẹ Wankíhé lébláa mlí anáin ọ́nọ́kwali amu tsun Bulu ọ́nósú ọ́tọ́ípú \*Yesiasu. Ọ́bée,

26 ‘Yọ́ ahá ánfí wá afọ́yẹbláa amú fẹe,

Bónu lánú, táme bumóonu mú asi.

Béki láki, táme buméebi mú.

27 Tsúfẹ́ kluntọ́ bu amú odwin.

Batílá asu, bun ansíbi é.

Ní megyí alí á, teki bówun ató

bónu asún,

amú agywun bóbwií.

Bédamlí ba mí wá,

nétsa amú ulọ́.’ ”

28-29 Paulo lómɔ mu asún ɔ́nɔ́ ɔ́bée, “Mú su ndekléá mlibú ání Bulu nkpahɔ́ asún ámu lawíé ahá ání bumegyí Yudafo é wá dodo. Amú mú bɔ́hɔ́ asún ámu.”<sup>h</sup> 30 Paulo létsiá un nfinyɔ́ kéké. Oletsíá mu onutó obu háhɛtɔ́. Oletsíá hɔ́ afɔ́ ání beba besináa mu féé. 31 ɔ́lɔ́wa klɔ́n dá Bulu iwíegyí ámu twi asún ɔ́kan, olosuná aní Wíe Yesu Kristo twi asún é ahá féé ansító. ɔ́haa métin mu ɔ́kpa.

---

<sup>h</sup> 28:29 Múts yée 29 bu nwló dada amu akɔ́tɔ́: *Bréá Paulo léblí asún ánífí tá á, Yudafo ámu bɔ́kɔ́sɔ́ náttí, amú wɔ́lɛwɔ́lɛ bɔ́na bɔ́dɛ asún ámu nwéén gyí.*